



3, 387 / A

Digitized by the Internet Archive  
in 2015

[https://archive.org/details/b22018323\\_0004](https://archive.org/details/b22018323_0004)





42900

DE

CURANDIS HOMINUM MORBIS

E P I T O M E

PRAELECTIONIBUS ACADEMICIS DICATA

A U C T O R E

JOANNE PETRO FRANK.

---

LIBER IV.  
DE IMPETIGINIBUS.

---




VENETIIS MDCCCV.



Ex Typographia

J. B. VITARELLI.





D E

CURANDIS IMPETIGINIBUS.

*L I B E R IV.*









# CLASSIS QUARTA.

## IMPETIGINES.



### GENERALIA DE IMPETIGINIBUS.

§. 369. **M**agnam efflorescentiae, quas *exanthematum* sub nomine hucusque ( Lib. III. ) delineavimus, cum caeteris affectionibus, quae humanae cutis laevitatem, nitorem, integritatem deturpant, similitudinem ostendunt; et hanc ob rationem mox ab illis, istarum non incongruens nobis videtur consideratio. Sed cum exanthemata febrium plerumque castra sequantur, atque harum devicto furore plerumque dissipentur et ipsa; vel saltem, dum sine febris auxilio ad cutem illa proruperunt, breviori hic mora divagentur, nec primariam facile in pelle aegritudinem constituent: hinc ad aliam certe morborum classem hos *diuturnos*

cutis humanae affectus referri oportet; et cum nomen desit, quod illam satis exprimat, et ab exanthematum familia distinguat, *Impetiginum* illud hunc ad finem potissimum, atque cuius tum generi, tum speciei adaptatum esse censemus. Ad *cachexias* haec classis morborum a Nosologis, ut nos quidem opinamur, sine fundamento demandatur; nec etenim morbi cutanei tam evidenter ex *malo corporis*, ut ajunt, *habitu* originem ubique sumunt, ut non *localem* saepe, atque cum nullo humorum vitio sociatam offerre aegritudinem cernantur; ac manifesta in multis cachexia, color cutis foedus, atque a naturali quamplurimum recedens, immunem ac intactam prorsus in multis pellem esse sinit.

§. 370. Hinc per *impetigines* propriam nos morborum classem intelligimus, quae cum cachectico, ut vocant, habitu frequenter quidem, — sed et sine hoc non raro incedit, ac in diuturnis plerumque cutis aut maculis, aut aspredine, papulis, vesiculis, squamis, fissuris, crustis, aut demum in spontanea integumentorum

rum

rum exulceratione, vel et variis excrescentiis consistit, ac febrem, nisi *secundariam*, pro comite sat raro agnoscit.

Ipsa certe exanthemata, cum *chronicam* induere naturam observantur ( §. 275. ), ad *impetigines* revocari nil impedit: atque non raro illa, dum, flore vix non perenni, sine febre in cute persistunt, in istius magis contextu, quam fluidorum in vitio, originem agnoscunt. Plures quidem morbi cutanei, exanthematum in modum, febrium hinc inde *crisin* efformare, atque evidentem cum istis affinitatem ostendere videntur: sed praeter illud, quod *impetigines* ad interiora repulsae febribus non paucis occasionem largiantur, atque, dum naturae, vel artis auxilio ad superficiem revehuntur, non criticum exanthema, sed aegritudinis cutaneae, seu causae febrilis, ad antiquam, ex qua depulsa fuerat, sedem repristinatae nobis specimen exhibeant; diuturna hujus efflorescentiae in cute perseveratio lentusque sine febre progressus, impetiginum ab exanthemate quovis differentiam abunde manifestant.

§. 371. Cum vero sat claram *exanthematum* imaginem quotidiana eorum in febribus observatio, ac major circa has ipsas Medicorum industria nobis offerant, fateamur oportet, *impetiginum* illam tam densa hucusque caligine nascondi: ut major eorum, qui de his diffusius egerunt, verborum profusio, difficultates rerum auxisse magis, quam solvisse videatur. Ardui scilicet laboris opus est, morborum tam inconstantium; tam longorum, tamque diversis sub formis in cute luxuriantium, fidelis descriptio; atque huic rectius tradendae, pictorum potius penicilli, quam, cui colores desunt, Scriptorum calamus, pares esse videntur. Quae non immaturi adhuc in cute morbi ab eo, qui pleno jam flore hanc occupat, aut in eadem jam-jam marcescit et exsiccatur, diversitas observatur! . . . . Quam varius non unius ejusdemque morborum seminis hoc in agro progerminantis aspectus est! . . . . Aut quam sibi similes non causarum indole sua diversissimarum, in corporis superficiem furientium, effectus in hac ipsa occurrunt! . . . . Atqui in hoc ipso tam inconstanti aegrotantis naturae sermone

latet morborum, qui cuti adscribantur, et causarum, quae illos inducant, inexhausta apud Scriptores multiplicatio; rerumque unius ejusdemque penitus originis atque indolis, pro diversissimis inter se affectionibus, prolixa Nosologorum enumeratio, ac indigesta prorsus nominum confusio.

§. 372. Interim, cum simpliciori *impetiginum* expositioni nos ipsi studemus, non minor nobis causarum, ex quibus illae pendent, obscuritas ac incertitudo obest; atque ea nos potissimum difficultas premit: quod cutaneorum pars magna morborum, aliarum potius affectionum *symptoma*, quam idiopathicam hujus organi aegritudinem constituent. Illae tamen *impetigines secundariae*, exanthematum symptomaticorum vix non observantes naturam, cum primariis cutis affectibus confundi non debent: atque sic integumentorum maculae, ecchymoses, vesiculae, ac ulcera, quae ex ictero, scorbuto, viscerum infarctu, ex luis venereae viru, ex scrophuloso, aut rheumatico acri, aut alio ex morbo, *secundarie* gignuntur, licet cutem  
in-

insigniter defoedent, ad istum tamen magis, quam ad *impetiginem primariam*, revocanda erunt; ac methodo non alia, quam quae morbo, ex quo pendent, conducat, superantur. Hinc minor longe, ac a Nosologis recenseatur, *cutaneorum* morborum est numerus, atque pars major istorum calido sub coelo delectatur, ac *endemicam* saepius naturam in istis observat. *Contagiosam* non paucae impetigines, quo solo potissimum dominantur, indolem ostendunt: sed in aliud transvectae, mutata rerum, quae novo incolae favebant, positione, contagium deponunt, atque vel a causis plerumque obscuris eodem sub coelo, sine illo, foventur ac persistunt; aut temporis successu extinguuntur in totum. Aliae tamen impetigines, licet multis eodem in loco communes, ex causis tamen similibus oriundae, contagio observantur expertes: atque aliae *universam*, quo late patet, cutem adoriuntur; aliae nonnisi partem istius *locales* invadunt, atque vel fixa ad pellem possuntur sede, vel ex una in alteram incertae divagantur. *Internas* quoque dari impetigines, ex chronicarum inflammationum, quae viscerum

rum superficiem vix penetrant, — ex macularum, phlyctaenarum, papularum, ulcerum superficialium, — ex epidermidis, materiae puriformis, ichorosae, per tracheam, nares, intestina, per urethram, copiose excretorum, — ex aphtharum, acuti licet morbi, historia, et ex retropressae, ac redeuntis impetiginis externae effectibus, conjicimus. Non rarum est, impetigines sub certis anni temporibus redire; ac in genere tum vere, tum aestate potissimum recurrentibus, cutaneorum abundantior est seges morborum. Alii ex istis, qui tamen vix non ubique ad symptomaticos spectant, *periodice* prorumpunt, ac menstruorum, haemorrhoidumque naturalem aut consuetum typum, *habituales*, fere sequuntur. Quod ad divisionem ex causis petendam spectat, paucae quidem impetigines *primariae* praevium sibi humorum vitium, licet adultae hoc ipsum valeant inducere, necessario exposcunt; ac illarum hinc cura *internis* solícite nimis tentata remediis, plerumque successu frustratur. De *secundaria* aliud dicendum est impetigine: atque licet haec ipsa in *primariam*, longiorem  
post



post moram, abire et possit, et soleat; nihilominus princeps in hac *complicata* impetigine pertractanda consideratio Medentibus incumbit; atque illa, quae efflorescentiam repellunt, aut exsiccant, sine damno administrari vix queunt. *Haereditariae* impetiginis exempla nobis non pauca occurrerunt: atque plurimae ex istis, solidorum, seu cutis ex vitio deriventur oportet.

Ipsa vero, quam impetigines in cute sibi eligunt, sedes non ineptum his in rebus exponendis ordinem nobis suggerit. Aliae nempe ex istis, superficiem quasi lambentes, vix ultra *reticuli mucosi* confines descendunt; aliae, profundius demersae, pellem ipsam exedunt, consumunt. Quod si utrunque a quavis, aut neglecta aut mala methodo exasperata, impetigine perpetretur subinde: est tamen manifestus cuivis ex istis a natura concessus character, quo limites sibi ipsis plerumque ponant, atque nunc modo cutem *maculare*, nunc pellem *depassi*, cribrare, ac in ipsa corii humani substantia pertinaciter nidulari observantur.

Alibi scilicet cutis modo aspectus et nitor

a na-



a naturali abludunt; ac sine magno tumore, vel aspredine, in eadem *maculae* coloris albi, rubiginosi, lutei, flavi, castanei, cuprei, rubri, brunni, lividi, nigri, aut variegati, comparent; alibi epidermis induratur et callet, aut informis luxuriat; vel asperatur, siccescit, finditur, ac in furfures, in squamas, aut majora in frusta secedit, ac affines huic pili, vel ungues canescunt, finduntur, complicantur, crassescunt, emoriuntur et cadunt. Nunc pellem inter et cuticulam, in ipso retis mucosi contextu expansus humor hydatidulas, vesiculas, vel acri tenuique, vel puriformi materia praegnantes, inducit; aut vasculorum glomeres atque glandulae sebaceae incenduntur, ac in papulas, pustulas, tubercula, abscessulos, mutantur. Nunc demum cutis ipsa, cum subjecta huic adiposa, inflammatur, intumescit, tenditur, distrahitur ac dolet: secretionis hoc in organo pervertitur, depravatur opus, atque rancidum et infestum huic ipsi virus praeparatur: quo haec tot fibris, nervis, vasisque tam mirifice contexta tela cribri in modum exeditur, perforatur, ac in  
foe-

foetidissimum, malignissimumque ichorem colliquescit.

Interim non singulos hoc cutis affectus, peculiari quemvis tractatu, hic nobis considerandos assumimus: sed qui ex illis, ut *calli*, *verrucae*, *clavi*, *condylomata*, *excrescentiae taeterrae*, *ungues vitiosi*, *ulcera antiqua*, ad *Chirurgiam* magis pertinent, hos ista Vobis jam satis exposuit eximia scientia. De *Trichomate*, singulari, ac *Poloniae* imprimis endemico, pilorum morbo, nobis necdum ipsis conspecto, quae alii dixerunt, hic modo repetere, consultum non ducimus; atque sic omnis *impetiginum* materia duos modo in ordines divisa hoc volumine circumscribetur.

§. 373. Quae de origine, rationibus, ac differentia *exanthematum* a nobis dicta fuerunt ( §§. 274. 275. 276. ), ea, si diuturniorem, seu chronicam causarum in peripheriam corporis actionem, vel primariam, vel secundariam, superaddamus, *impetiginum* generationem ac modum in multis illustrent. Multa interim, quae vitiorum cutaneorum naturam respiciunt, hic  
at-

attentius considerabimus; plurima nos latent, ac futuri solertiam seculi, — utinam non inanem! exspectant. Illorum forte, quae in caeteris animalibus, ac in ipsis plantarum cortice ac foliis, contingunt, attentior consideratio non parum quondam hic lucis accendet. Ex animalibus minora non pauca vel ipsam quotannis pellem aut testam sub manifesto aegritudinis, dato tempore redeuntis, apparatu abjiciunt, novaque tunica ab ipsa cooperiuntur, non satis intellecta hoc in opere, natura. Quas plumis haec ornavit, aviculae, quo tempore, illas amittunt, obmutescere illico, solitudinem quaerere, appetitu privari, languere, ac manifeste aegrotare, observantur. Sub minoribus turbis, sed non sine praevia et fere simili in pelle mutatione, hibernos belluae ac domestica animalia deponunt crines; atque ipso demum in homine communis est, redeunte vere, epidermidis hinc inde a cute, ac pilorum e capite multorum, separatio. Quod si vero haec annua naturae in pellem operatio diversos in ista morbos explicare non queat: in hoc tamen, quod varia, quae aliis animalium partibus

bus communia haud sunt, in cute contingere demonstrant, a Medicis praetervideri non meretur. Pars major morborum arboribus inferiorum, primam in cortice, foliorumque externa superficie, ceu vegetabilium cute, originem agnoscit, atque cum illis, quae animalia, — et cur hac in parte patiantur, collata, cutaneorum affectuum, istisque medendi scientiam ditabit.

Quae vero utrique viventium classi praecipue insidiantur, sunt: tum impedita illorum, quae per cutis superficiem, vel sana, vel morbosa, expelli debuissent, exhalatio, sub epidermide effusio, stagnatio, depravatio, ac multiplex a stimulante hac materia irritatio; tum amplissima *parasitarum* familia, quae, jure quodam dolendo, sed vicissim eheu! viventibus a natura imposito, succi vitalis cum labore ab aliis parati avidissima, beneficae sese pelli insinuat, ac, ibidem recepta, hanc ipsam depauperat, corrodit, atque devorat.

Immundities hinc, frigus sudanti corpori incaute admissum, et quaecunque sensibilissima cutis spiracula constantius obturant, — tum  
vel

vel communia, vel propria cuivis animalium speciei insecta, non parvam cutaneorum in illis morborum partem sibi vindicant. Alias quidem transpiratio insensibilis, quam quae cum statera aurificis examinari queant, leges agnoscere videtur: nec homo, socialis vitae puritati renuncians, nec populus a solita nobis munditie alienus, pluribus adeo gravioribusque cutis subjicitur affectionibus; ut non integrae nationes, contrariis conservandae salutis momentis instructae, corpus omne oleo perfundere, cutisque poros hoc ipso opplere, sine damno consuescant.

Ast vero, qui continuo corpus robustum labore aut cursu exercent, ac in aura liberiori ruralis vitae fruuntur beneficiis, hi multas morborum causas, quae aliorum saluti insidiantur, superare, et unius partis functione alterius defectum supplere, observantur: nec vel spurcissimus aut undas semper fugit populus, aut, quo natura vel pennigerum cogit descendere vulgus, flumina abhorret. Hinc summa in ordinandis balneis ac thermis tum rituum sacrorum, tum Legislatorum ubique cura fuit posita: et si forte ob lana-

rum apud antiquos, quam recentiores apud populos, quibus lintheaminum est copia, majorem usum, major ablutionum urgebat necessitas; fateamur tamen oportet, morbos cutaneos non paucos ex neglecta corporis munditie, ex insana mulierum suspectis faciem jugulumque pigmentis obducendi libidine, et ex abolito balnearum usu, hodiernos apud homines esse derivandos; ac nullibi impetigines, quam apud plebem mendicam, ac impurioribus in habitaculis, frequentius inveniri.

Plura quidem, uti caeteris animalibus, sic et homini molesta sunt, et cutem vel puniendo, vel proprio, quem isti aspergunt, instillant, succo irritare, inflammare observantur insecta; sed propria humanae cuti et duplex pediculorum est species: quarum prima, infantibus communior, est *pediculus humanus*, qui caput imprimis, et cutem, — altera, quae pubem, axillas, supercilia inhabitat, ac *pediculus pubis*, seu *morpia* vocatur. Haec ambo insecta, fertilitate insigni instructa, ac impuros apud homines ad incredibilem subinde copiam adaucta, sub epidermide sese insinuando, cutem-

cutemque subjectam irritando, pruritus continuum, porriginem, ac foeda ulcuscula produ-  
cunt. Qua sub laesae salutis conditione *pediculus humanus* sub universi corporis cuticula,  
sine impuritatis suspicione, eam ad copiam generetur, ut ex istius poris undique ac acervatim prorumpens, *Phthiriasis Graecorum*, seu *morbum pedicularem* Latin. exhibeat: hoc, virorum fide dignorum observationibus confirmatum, morbi genus propria, quae nobis deest, experientia illustrare non possumus. Praeter *pediculos* vero, ac communem aliis quoque animalibus *pulicem*, *acarus exulcerans* seu *acari* species, homini, ut videtur, propria, saltem ex *acari farinarum*, *acari domestici*, aut alterius, extra corpus humanum existentis, acari familia non derivanda, in recentibus illorum, qui *scabie* aut *psora* infecti sunt, pustulis, ante seculum in *Italia* reperta, atque tum ab immortali *Sveco*, tum ab egregio et amico nobis Viro *Germano* nuper confirmata fuit ( §. 436. ). Ex *musca Liprae*, *Elephantiasis Nigritarum* ab eodem illo historiae naturalis hodiernae parente, discipuli experientia suffulto, de-



rivata est; sed cum in Graecorum Elephantiasis seu Arabum lepra, vermiculum, ut vocant, celebris alter Goettingae examinasset, eundem hic in *muscae domesticae* larva, ex ejusdem muscae ovis, communi ulcerum sorte, huc depositis, oriunda consistere observavit; ac plura certe ex insectis aut simplici escae animalis desiderio, aut ulcerum cutaneorum foetore sub aestivis caloribus potentius allectis, sub cuticula, vel in praesentia nec custodita satis ulcera, tum ovula, tum larvas deponunt: quae loci fotu exclusa, aut vivae, nudam jam cutem irritant et horrendo aspectu infestant.

Sed ex vermium quoque cum insectis non confundendorum classe *Gordius* tum *aquaticus*, vitulorum, equorum, porcorum etiam pulmonibus aliquando infestus, — tum imprimis longissimus interdum *G. Dracunculus*, seu *Vena*, ut dicunt, *Medinensis*, palustrium uterque aquarum incola, tum demum *furia*, ut referunt, *infernalis*, humanam subinde cutem penetrant, ac prope ossa, ad tibias, genua, brachia, quo loco carnes fere desunt, vix unquam ad faciem, tumorem, pruritum intolerabilem, do-



lores, inflammationem, nisi cautius vermibus extrahatur, facile funestam inducunt. In ipsa iterum elephantiasi, quae *Norvegos* infestat, vermiculus, Gordios ac ascarides inter medios, quem *Gordium marinum* nunc vocant, et ex frequenti his gentibus piscium marinorum victu derivant, accusatus est. Interim praeterquod vermes animalis unius speciei, cui proprias jam illorum species natura commisit, alterius domicilium vix quaerant, aut in eodem diutius morari non soleant, ulteriorem haec observatio confirmationem meretur; nec ea, quae in parte aegrotante fortuito deteguntur, pro morbi causa haberi mox debent.

In genere dolendum est, historiae naturalis partem illam, quae *parasitica* et fere consanguinea homini animalcula concernit, utilissimam licet magisque necessariam, minus tamen, ac alias omnes, quae res nobis non tam vicinas respiciunt, hucusque a multis fuisse excultas. Mirum quidem non est, cum *patredinis* ex fonte minora haec entia Antiquorum derivaret credulitas, majorem illis, quae fortuita putabantur, attentionem non adhibuisse;

et, cum microscopia deessent, eorum oculos quamplurima, quae nunc admiramur, fugisse: sed a quo tempore et futilis illa de *generatione aequivoca* theoria eviluit, et oculus nova lente armatus novum quasi in vilioris guttula liquoris orbem detexit, parum admodum hac in naturae provincia perlustranda humana profecit industria; ac si *vermium visceralium* historiam excipiamus, utilitatem Medicina scientiae naturalis progressibus non est experta aequalem.

Atqui haec eo quidem fine non movemus, ut *pathologiam*, quam *animatam* dixerunt, et qua morborum contagiosorum vix non omnium, ac ipsius demum pestis, causam in subtilissima, visumque fugientia animalcula, — neonatorum vero atrophiam in *Comedones*, ridicule conjecerunt, ut verisimilem denuo revocare contendamus: sed hoc unum hic nobis concedi optamus, inter causas, quae cutis morbos rebelles hinc inde producant atque exasperent, tum *insecta* quaedam eorumque ovula, larvas, tum *vermes* omnino spectare; atque plures forte, quam nunc, industriae majoris his rebus

impensae defectu, suspicemur, *impetiginum* species ex *causis viventibus* originem agnoscere. Plures nunc ad viscera, quam alias credebamus, ac vix non visum fugientes, a nobis ali hospites, fatemur; ignotum forte mundum aliquando in pelle humana quis deteget; ac ignotas forsitan morborum causas propria, alieno semine populata, nobis offeret superficies.

Aliae vero morborum causae humanae cutis insidiantur: atque huc *acre* quodcumque ex massa sanguinis hoc in colatorium transvectum, aut in hoc ipso ignotis secretionis morbosae legibus paratum, pertinet ( §. 274. ). Summum apud *ictericos* in cute pruritus toties moderari, aut cessare observavimus; quoties sub illo in urinis prius pallidis, aut parum flavis, copiosa iterum bilis, ac lateritium sedimentum comparerent. Ex assumptis copiosius aut sale, aut aromate conditis cibus, qui impetigine laborant, pruritus in cute majorem, quam sub victu minus acris, patiuntur: Magnum renes inter et cutaneae transpirationis organum, quoad discernendi copiam liquidi,

commercium existit; et quemadmodum sub aucto urinarum fluxu, sudores, — ita sub transpirationis incremento, lotii imminuuntur rivi. Sed cum ea, quae per istos e corpore eliminantur, aut eliminanda fuissent, non raro ipsa, per quae fluunt, aut in quibus moram patiuntur, receptacula et canales irritare, inflammare, exulcerare observentur; sic et similes ejusdem causae, cum ad cutem convertitur, effectus esse omnino oportet. Saepius hinc, cum urina vel cruda magis, vel justo parcius per renes excernitur, saturati magis sudores, — aut, si nec hi quidem urinas supplere queant, irritatae cutis phaenomena occurrunt: et quemadmodum apud infantes, crusta lactea affectos, ea, quae urinarum secretionem adaugent, efflorescentiae non parum detrahare observantur; sic et in senibus, quibus parca est lotii secretio, non paucae ad cutem molestiae, pruritus continui, herpes, ac ulcera, se manifestant. Magna hinc a lixivio illo, quod per urinas excerni debuisset, ad cutem renibus affinem converso, ac ne per hanc quidem rectius excreto, incommoda fluunt; et major, quam

quam solet, dum superficies impetigine defoedatur, urinarum habenda est ratio.

Maxime vero huc acre, quod vel in corpore generatur, vel parentum jure, vel contagio suscipitur, revocandum est: a quo scilicet, valde diverso, ut scrophuloso, venereo, rheumatico, varioloso etc., impetigines *symptomaticae* complures oriuntur.

Ipsam quidem digestionis opus, quaecumque a sanis adhibentur, alimenta in blandum ac nutrientem chylum convertit; sunt interim, quae, istis commista, huic scopo resistant, ac indolem sibi propriam nec secundis in viis deponant. Huc iterum aromatica, et alia, quae cibis superadduntur, condimenta, vel his ipsis inhaerentia acrioris aut volatilis naturae principia, revocentur oportet: ut quae sanguini copiosius, longoque usu remista, nisi sub vita laboriosa continuo diffentur, arteriosum non modo systema stimulare, sed et corporis peripheriam imprimis petere, irritare, secretiones hic pervertere, ac lympham, otiosi saltem hominis, subtili acredine inquinare valcbunt. Hinc aut laesa diutius ciborum digestio, aut talium,  
quae

quae mutari, ac animale in substantiam converti non queunt, — aut quae vel suspecto, vel stimulante principio abundant, comestio, frequentem apud divites imprimis aulicosque homines, quorum palatum alii, quam artificiali ac urenti quasi stimulo, non amplius respondet, — vel ipsos apud pauperes, qui corruptis aut carniū aut piscium, mytolorum edulium, reliquiis, — qui pane ex farina seminibus suspectis, aut modo alio, inquinata, — qui caseo vetusto putrefacto ac acerrimo, — vel cae-pis, rapis, ac allio fere solo vescuntur, frequentem utique impetiginum vel maxime rebellium rationem in se continent.

Si quis alius, — hepatis certe liquor, utpote gustum magis feriens, tingendisque partibus prae alio opportunus, inter praecipuas morborum cutaneorum causas, cum *atra* imprimis *bile*, ab Antiquis repositus, et a Recentioribus non paucis hac in potentia nocendi confirmatus est. Quid corrupta in abdomine bilis in producendis exanthematibus possit, hoc a nobis ipsis expositum habetur (§§. 274. 290.); sed simul hujus causae fallacias non reticimus

( §§.

( §§. 107. 288. ): ac licet cutem a felleo li-  
quore in *ictero* flavedine obduci videamus; non  
tamen vel quaevis in pustulis vesiculisque cu-  
taneis contenti humoris flavedo, *de bile, ut*  
*causa*, testatur. Flavissimas nos in *Clinico In-*  
*stituto* ad manuum volas pedumque plantas in  
scorbutica virgine observavimus maculas: quae  
instantem alias aegrotanti haemorrhagiam per  
nares, pulmones, supplebant, vel, hac insecu-  
ta, disparebant, quin vel minimum ad hepar  
in cadavere defectum conspiceremus; ac in  
simplici ex cutis contusione ecchymosi, color  
partis ex atro in lividum, viridescentem, —  
tandemque in flavum, *bilis sine culpa*, muta-  
tur. Saepius vix emissas matrum e sinu proles  
intense per primos a partu dies ubique rube-  
re, et cocti quasi cancri colorem in cute re-  
ferre, conspeximus: qui erythemate quasi, ut  
vocant, correptae cutis color, post tres, qua-  
tuorve dies, in flavescentem ac fere ictericum  
abivit, quin pro bilis id effectu continuo cum  
aliis haberemus: quod in multis neonatorum  
ab inassueti contactu aeris in cute sensili ac  
laxa contingit, ac in ipsius interdum epider-  
mi-



midis desquamationem furfuream terminatur. Quae vel in sanissimo homine per cantharides excitatur vesica, ea croceo frequentius liquore sine bilis suspitione turget; ac in genere, quae ex *coloribus, odoribusque*, petitur causarum in morbis cognitio, ea falsis plerumque inductionibus fundatur.

Bilem, quae remoram in cystide fellea longam experta est, resorpta parte illius tenuiori, viscidiorum non modo ac tenaciorem reddi, sed et colorem profundiorum ac atrum, singularemque amaritiam, acredinem, acquirere; atque interdum non modo vesiculam, hepar ipsum irritare, inflammare, exedere, sed et totum systema nervosum in fatalem homini consensum provocare, — aut, in tubum intestinale effusam hanc amurcam, calculorum felleorum matrem, *liquefactae picis* adinstar, hunc ipsum, stomachumque obducere, similisque materiae vomitum aut dejectionem per alvum sub horrendis torminibus et cardialgia inferre: hoc nemo prudens negabit, atque tum frequens cadaverum sectio, tum instituta nuper ab egregio Galliae Chymico hujus materiae analysis, abun-



abunde demonstrant. Quod si igitur *atram* hoc ipsum *bilem* vocare velimus, aptius certe, quo morbosae hujus materiae character circumscribatur, nomen non habemus. Sed ob id ipsum, non omne illud, quod, et colore, et tenacitate huic inspissato humori simile, per oesophagum alvumque rejicitur, aut *atra bilis* est, aut ex eadem originem trahit. Nigrae saepe faeces et sani deponunt homines; nigro saepius colore ciborum reliquiae ab assumptis medicamentis, vel a propria particularum mixtura, tinguntur, aut diuturna in abdomine mora nigredinem eadem contrahunt. Nec rarum est, sanguinem ad ventriculum, intestina, ruentem coagulari, seroque exutum inspissari; et, quod in vasculum, sani hominis e vena, susceptus, ad pelvis fundum jam facit, colorem atrum, carboni similem, assumere. Atqui has quoque materias, licet atras atque tenaces, *atrae bilis*, ut faciunt, vocabulo insignire, nominum certe abusum sistit, qui majorem in Medicina, quam in alia quavis scientia, noxam inducit. Sed ipsum in vasis suis fluentem sanguinem, dissipatis fluidioribus, crassescere, atque

que pinguem, magisque terrestrem quasi *faecem* offerre, — tunc vero *humorem atrabilarium*, *succum melancholicum* largiri, — quod si vero auctus copia, magisque *adustus*, hic humor in partibus haerescat, eundem tunc *atram* iterum nobis *bilem* offerre, docuit Antiquitas, ac Recentiorum denuo scholae hinc inde defendunt. *Lienem* imprimis, ac renes *suc-centuriatos* seu *capsulas atrabilarias*, ut *atrae bilis* culinam, illa consideravit; similisque materiae officinam in venae portae systemate non pauci ponunt: ex qua tum flavus ac cachecticus ille hominum melancholicorum aspectus, tum variae cutis maculae; — et ab aucta, atque per sanguinem diffusa, *atrae bilis* acridine, vasculorum cutaneorum erosiones, ulcera maligna, cutisque gangraenam derivant.

Subtilius certe, quam in rebus medicis con-  
ducat, et ad fornacem excogitata magis haec de *atra bile* in sanguine generatae ac fermentantis theoria est. Nec etenim cruor per vasa circulans, sicut jus in ahenis, spissescit, et sine novi ac recentis liquidi affluxu in rancidam condensatur gelatinam; nec naturae sub-  
si-

sidia desunt, quibus aut recenti imperato potu, aut moderatis suppressisque tenuiorum excretionibus, aut demum resorpto ex atmosphaera liquido, nimiam spissitudinem avertat. Quocunque salutis sub statu vix emissus cruor naturalem fluiditatem ostendit, atque pro varia rerum accidentalium conditione lentius citiusque condensatur: et quae forte contraria in siccis, melancholicisque hominibus, aut sub febre inflammatoria, instituta referuntur experimenta; ea cum sanissimo non minus, quam cum alio sanguine, nunc sic, nunc aliter, inconstanti successus, ac ab externis conditionibus pendente, lege contingunt (§. 125.). In varicibus ultra modum distentis cruorem colligi, ac forte aegrius moveri, non vero prius, nisi dempto vasorum lumine, coire, docent enormes ex illarum ruptura sequentes haemorrhagiae, fluidique sanguinis in vicina loca effusio. Cessante vero in venis fluxu, quod ex umbilicalium aliorumque vasorum historia patet, inclusus cruor, tenuiori portione resorpta, sine ullo corruptionis signo condensatur, ac in durio-rem massam brevi temporis intervallo solidescit.

Ex

Ex his igitur apparet, ex fonte bilioso cutem quidem hinc inde aut per consensum affici, aut infenso humore inundari: sed saepius a Medicis impetiginum culpam in hepar insons reponi; atque uberiolem certe causarum, quae in cutem invehant, numerum, et diversam admodum earundem naturam, existere.

Ac revera, ipsa jam *impetiginum* cum *exanthematibus* affinitas ( §. 369. ), atque nervorum tam evidens in ista imperium ( §§. 274. 276. ), *nervosam* in multis illarum originem sine dubio manifestant. Vel *aucta* scilicet praeter modum in cute sensibilitas, — vel istius a consueta impressionum perceptione *aberratio*, — vel demum *imminuta* nervorum cutaneorum sentiendi potestas, variorum in cute phoenomenorum in chronicis non minus, quam in acutis, affectibus rationem, intellectu licet difficilem, sat tamen apertam, in se continent.

Major certe in aetate infantili, ac in sexu femineo, quam alia quavis sub vitae periodo, et quam in sexu potiori, est cutis tenebritudo ac sensibilitas. Atqui sub hac ipsa ma-  
 jor

ior utique morbosarum ad corporis superficiem adfectionum conspicitur numerus, et causarum minorum promptior est ac certior in cutem effectus. Sanissimae genitricis e sinu vix exclusa, sanissima licet, proles, cutis tamen, jam primis vitae mensibus, non paucis saepe laborat affectibus; capillata pars omnis calvariae mox squamis crustosis, prurientibus, obtegitur; post aures epidermis separatur, ac foetida copiosa sanies exesa e cute per menses destillat; aphthosis oris cavum ulceribus obsidetur in istis; facies in aliis, vesiculis sero flavo repletis, atque crusta, quam *lacteam* dixere, defoedatur, multisque achores et favi et tinea prorumpunt. Cutis inter plicas ad collum, axillas, ad inguina et nates, erosa ichorem plorat; ac magna pustularum, papularum miliformium, rubrarum, in corpusculi superficie copia florescit. Crassos quidem hucusque viscidosque in pueris humores, ac acidam, aut aliam in istis acrimoniam, tantorum ut fontem malorum, accusant: sed in multis certe alia istorum, quam in *cutis sensibilitate morbosa*, non subest ratio; ac perperam ad dulcifican-

Lib. IV. c tia,

tia, evacuantia, hic non raro recurrimus remedia. Nec etenim, si tanta jam fluidorum labes homuncionem teneret, vel sola natura huic superandae tam saepe sufficeret; vel sola matrum solertia, ac frequens cutis tenerae cum frigida ablutio, aut balneum, in avertendis his cutis affectibus jam tanta praestarent; nec hi ipsi *dentitionis* sub opere, prout faciunt, continuo auferentur, aut liberae hucusque proli sub hoc majoris irritationis statu copiose succrescerent; aut delicatulos magis, quam alios, aequali caeterum sanitate instructos, aggrederentur infantes.

Vel ipsi adulti, imprimis puellae, quibus teneram ac albissimam pellem, oculos caeruleos, flavamque, aut ex flavo rufam indulsit natura comam, vel a simplici radiorum solis verni actione jam maculis notantur, et quasi uruntur ad cutem; vel solius aurae rudioris afflatu jam epidermide spoliantur. Apud mulieres teneriores, ipsa jam conceptio defoedat faciem, ac maculas, quas modo partus abluit, ad cutem inducit. Puerperii potissimum tempore, debilior tunc sensiliorque femina in mi-  
lia-



liare exanthema est pronior ( §. 324. ), atque ab isto, in chronicam efflorescentiam converso, nonnunquam per annos obsidetur. Qui cute sensiliori cinguntur, illi vel a minimo auræ frigidioris afflatu erysipelate laborant; et ipse vestium, quibus superficiem ab atmosphaeræ injuriis solícite nimis defendimus, abusus, ac major ab isto ad cutem inducta molities, non parvam impetiginum, quae pellem humanam prae alia defocdant, rationem in se continet. Nec minor est animi pathematum, transpirationis in opere pervertendo, in bilis regurgitatione promovenda, ac in excitanda sensibilitate ad superficiem corporis morbosa, potentia. Vel solus terror fortis jam pilos in cute erigit, juvenisque comam, si vera sunt, quae referunt, vel temporis momento, in senis illam, seu niveam convertit. Qui anxio res suas animo considerant, hi post aures pruritum experiri ac scalpere proverbio dicuntur. Ex nervorum magis, quam ab acedinis actione, chloroticarum, ac multorum, qui febre intermittente detinentur, ulcuscula et crustas ad genas, labra, aliisque in partibus, corro-

borantium remedium effectum proficuo inducti, derivamus. Qui ingratum cute insectum ex alio se suscepisse verentur, hi, etiamsi hoc desit, ad universam pellis superficiem pruritus sentiunt; et cum partem cutis unam ob istum vel sanus homo scalpit, in altera vicina vel ex solo consensu scalpendi necessitatem sentit. Ipsae, cum cutis prurit, scalpendi voluptas, — et, cum haec negatur, singularis anxietas, nervorum in superficie imperium ostendunt.

Sunt, qui ob cutis sensilitatem non tam auctam, quam a *communi abludentem*, vel a rerum innocentissimarum contactu, ab emplastri simplicis, aut blandi linimenti actione, jam pustulis, ac erysipelate ad cutem tententur. Sunt, qui a contusione, laesione quavis levissima, mox diuturna hunc ad locum ulcera, sola cutis, non humorum, ex culpa patiantur; ac apud multos, in chronicis etiam morbis, uti frigoris, sic et caloris extremi in pelle sola, sensum a thermometro negari, et in perverso nervorum cutis affectu consistere observamus. Hinc in tabe, in phthisi, ardo-



res genarum, volarum, plantarum, corporis sine aestu majori, aegrotis tam molesti, — hinc volatiles illi in hypochondriacis, hystericis, ad cutem ignes, ac adustionis non modo sensus, sed et quasi effectus ( §. 359. ); — hinc parva verticis in plaga apud hystericas, glaciei aut nivis liquefactae ibi haerentis perceptio, hoc ex perverso sensationis principio descendunt, ac impetigines non paucas hoc ex morbooso cutis statu derivari oportet.

Sed, et *imminutam* nervorum hac in parte potentiam similes effectus habere, sine dubio asserimus. Tactus certe sensus, ac diversa ab isto, seu communis sensibilitas, per cutis superficiem universam extensa, mutationibus non paucis, ad quas sat raro respicimus, subjiciuntur; et ex infracta, vel penitus deleta nervorum in pellem actione, quamplurima, quae hucusque non satis examinata fuerunt, phaenomena in morbis dependent. Nec ista ex longinquo semper nervorum, aut cerebri ipsius errore, ut in apoplecticis affectibus, originem symptomatice agnoscunt; sed ad solam interdum cutis pulpam nervosam spectare observan-

tur, ac in parte agendi ac sentiendi inertiam manifestant. Hanc ipsam non modo jam sola epidermidis per labores inducta densitas, aut in cute cicatrix, — sed et diuturna ejusdem compressio, extensio, frigus nimium, aut plurimus sub pelle collectus adeps, vel serosus latex, vel tumor subcutaneus, inducunt. Ea ipsa vero, quae superficiei humanae nervis vel ab intus, vel exterius admoventur, potissimum huc spectant. Saepe ex alluente, aut in atmosphaera hūmida, uliginosa, contenta, — vel sub morbis in pellem deposita, ac praecipue nervosam ejusdem potentiam obtundente materia, tum exanthemata ( §. 276. ), et gangraenae ( §. 130. ), tum impetigines, seu maculae, vitiligines, sensu quovis destitutae ( §§. 452. 455. ) oriuntur. Ipsi sudores, qui vel in debilioribus sine causa majore, vel in fortissimo quovis homine, vaporis in balneo; vel demum in aegrotis sub lipothymia, in moribundis, tam profusi prorumpunt: non sanguinis ex vitio, sed ob imminutam vasorum cutis resistantiam, exstillant. Hanc vasorum in cute debilitatem et quasi paralyisin, in aliis contagia,

gia, miasmata, venena, ac inimica nervis materia, inducunt, atque in *febris nervosis* (§§, §o. — 88. ), in *elode* (§. 85. ), in pernicioſa, quam *diaphoreticam* appellant (§. 35. ), febre, tum continuus ille, aut colliquativus sudor, tum ecchymoses, maculae, ac alia quaecunque cutis defoedatio, ex nervorum cutaneorum tenore per causas aut universo corpori, aut solis forte integumentis inhaerentes infracto, oriuntur. Non aliter externa, quae dolores sopiunt, spasmosque sedant, ex opio, plantisque narcoticis, stupefacientibus, composita remedia in cutis nervos operantur; ac sicut organa gustus, odoris, ac visus in propectae aetatis hominibus labescunt, ita tactus, et quaevis cutaneorum nervorum sensibilitas, a pellis rigiditate senili obsolet, ac impetiginum variarum fundamenta in illa ponuntur. Ex fracta nervorum, et, quibus vitam conciliant, vasorum, in scorbuto potentia, tot maculae aegrotantium superficiem contaminant; ac non paucae ecchymoses ex eadem ratione in hydrope propecto ad cutem comparent.

*Contagiorum* in pellem humanam actio vel

ex ipsa jam *exanthematum* elucet historia (Lib. III. ), ac sola *impetiginum* cum illis affinitas, communem in multis originem, in utraque morborum classe, satis prodit. In quo interim haec *contagia* consistant, hoc a nobis ignorari fatentes ( §. 92. ), fatemur simul, nos circa *impetiginum*, quas 'contagiosas dicimus, causam proximam non minus caecutire. Nec magis dubiis hinc inde caret ipsa his in affectibus contagiorum praesentia; ac mutua inter cives morborum propagatio, sicut fomiti ex uno istorum in alterum transeunti deberi, — in causae ejusdem, in omnes simul agentis, effectus esse potest. Hinc non paucae de morborum *contagiis* actae sunt inter Medicos lites: quas *injectionis* nequidem tam valido, ut credunt multi, argumento satis direptas dolemus. Quod si enim, cutaneorum saltem morborum, quod rationi non adeo repugnat, respectu, ex *visis* seminibus, ac visum fugientibus animalculis, agritudinum penderet communicatio: haec vitalis morborum, ac saepe mortis humanae causa, cum liquore, quem sanis inserimus, non minus, quam *contagia*, a nobis posset

set *inoculari*; atque si cum adulta jam atque *exsiccata* prorsus, quod de *variolis* notum est, hoc opus aequae ac cum recenti pure absolvi concedatur materia, *animalculorum* tamen *infusiorum*, ut vocant, historia, et continuata, post exsiccationem corpusculi, vitalis istius potentia, huic quoque non impar foret solvendo aenigmati. Fatemur interim, nos morborum, contagio celebrium, qui interna non minus, quam superficiem, affligunt, — qui ex ista, recentes licet, repercussi, difficiles ac diuturnos viscerum affectus relinquunt, — qui, post longas demum moras, ad cutem iterum cum emolumento expelli, ac istorum sic crisin constituere queunt, non facile *vivas* intelligere causas; atque ipsa, quae febribus non paucis praesunt, — quae veneream luem, jam sanato cutis ulcere, sine novo fomite per annos continuant, — quae blennorrhoeam, — quae, post multos a morsu canis rabiosi menses, hydrophobiam inducunt, *contagia*, insectorum in his necessitatem ac verisimilitudinem omnino excludunt. Alia vero contagia in solam modo pellem, — alia in caeteras quoque partes, ac in

cor-

corporis compagem universam, operari cernuntur. Greges ovium integras a scabie infectas, sed alias perfecte valentes, et quarum carnes hominum saluti nec minimum obsint, in provinciis haud paucis observamus; ac ipsa, quae hominem infestant, psora, pluresque species impetiginum aliae, nisi in longum protractae, praeter cutem, nil offendere videntur.

Ad impetiginum causas et *plethoram* tam universalem, quam potissimum *cutaneam*, referre nequidquam haesitamus. Qua scilicet aetate major humoribus in cute molliori vasorum patet numerus, — qua corporis amoenius floret undique superficies, — qua magis grato haec et aequaliori calore fovetur, — qua candida magis facies vel a sola verecundia rapidissimo velut ab igne accenditur: hac etiam promptior ad pellem cruoris affluxus, uberior perspirabilis ex eodem humoris secretio, atque major ad *plethoram cutaneam* dispositio, quam vestimentis calidioribus, longo mollioris lecti tepore, sudoriferis, spirituosis, volatilibus remediis, ac balneorum tepidorum abusu, non raro augemus, concurrunt. Vel a solo venae-



naesectionis, aut haemorrhagiae, quibus ad-  
suevimus, defectu, universalem in cute pruri-  
tum persentimus; ac hic ipse, quo lecti calo-  
re fovetur corpus, tempore, in succiplenis ho-  
minibus, ac in quavis impetiginum-specie, plus  
minus augetur. Frequentissime hanc *artificialem*  
*impetiginem*, qua tam vane gloriantur therma-  
rum non pauci Medici, in illis *Marchionatus*  
*Badensis* observavimus; novimusque sanum ac  
plethoricum juvenem, qui, fervidiores has a-  
quas per brevissimum licet tempus incaute  
ingressus, mox quatuordecim, aut plures, in  
pelle furunculos expertus est. Copiosas ado-  
lescentes succipleni, aut qui liquoribus spi-  
rituosis indulgent, vel necessario corporis exer-  
cizio destituuntur, ad frontem pustulas, —  
et, quibus menstrua aut difficilius, aut par-  
cius, quam par est, prorumpunt, puellae, ef-  
florescentiam vel periodicam, vel constantem,  
in facie patiuntur. Insignes saepe, quibus na-  
rium haemorrhagia, aut quibus haemorrhoides  
instant, circa nares, ad ani confinia, pruritus  
accusant; ac periculosa pulmonum plethora,  
futuram haemoptysin, ac tussim excitante in  
bron-



bronchiis, trachea, titillatione afficiuntur: quae singula demonstrant, sensationem ingratam, calorem, ardorem, pruritus, sanguinis, humoris serosi, lymphatici sub epidermide stasis, non istorum ubique vitia, sed frequenter abundantiam aut veram, aut spuriam, vel difficilem significare per vasa cutis progressum.

Ipsae vero, qui in cutem potentius dirigitur *calor externus* non exiguam impetiginum partem generare observatur. Quibus hiberno sub gelu vicinior assidemus, flammae, hae largas, lividas, ac diuturnas in pelle maculas inducunt; et a suspecto carbonum accensorum igne, quem, ne flammis faciei nitorem inquinet, sexus sequior sub cruribus tunc nascondit, non foedas modo in istis maculas, sed plura sibi ad uterum mala adsciscit. Ipsa vero *solis actio*, non *caloris* modo, sed *proprius*, nec satis intellectos, effectus producit. Quamvis enim atrum Aethiopum colorem ex peculiari reticuli mucosi constitutione magis, ac ab unico solis ardore, derivandum esse arbitremur: est tamen manifesta istius non modo in cute profundius tingenda vis et actio; sed in ipsis

ipsis solis radiis, ac varia, qua in pellem incidunt, directione, latet ignota, nec a sola locorum positione determinanda, potestas. In genere quidem, quo calidiori sub coelo vivitur, eo major morborum cutaneorum est ratio; sed illa siccitatis in atmosphaera majoris, minoris, — illa; qua solis radii a vicinis corporibus reflectuntur, — ventorum demum, habitationum, vitae generis, vestimentorumque ratio, hos effectus frequenter immutat. Alia quoque incommoda, ex solius diversitate fabricae, cutem Aethiopsis, alia nostram, tenere videntur: sed, donec fidelis ac diuturna, quemvis apud populum instituta, observatio noctem, qua res istae involvuntur, dissipaverit, impetiginum accuratior historia a Mortalium nemine exspectabitur. Quis nempe, experientia destitutus, ex sola *Insubriae* positione, et causarum, quibus subjicimur, communium confluxu, ad morbi tot rucularum strage infamis, seu *Pellagrae*, ut vocant, hac in parte felici terrarum praesentiam concluderet? Quis radiorum solis, *Insubras* longe minus ac alios *meridionalis Italiae* populos urentium, in expositam sibi

cutem tam manifestam ac simul tam obscuram actionem, et producendi hac in parte, non in alia, erysipelatis periodice redeuntis, chronici atque maligni potentiam, ex physicae Geographiae rationibus praediceret? ... Atqui, licet *interna* nimis hoc in morbo urgeant symptomata, atque, dissipato jam erysipelate, haec ipsa frequentius continentur, quam ut eundem ad *impetiginum* classem prudenter referre queamus: est tamen sat evidens radii solaris verni in accendendo apud praedispositos *Insubriae* agricultores tam flebili morbo effectus, ut in illo solius ratio *caloris* nostrorum nemini Medicorum satisficiat. Sed plura, quae aeris a sole calefacti in corpus humanum effectus concernunt, non minus nos latent. Nec etenim solus flante ab *Africae* littoribus vento atmosphaerae calor, sed *nervis* inimica, et sub alio vento a majori solis ardore non observanda, nec thermometro determinanda, illius conditio nostras vel media sub hieme vires inopinato prosternit, ac febris quasi malignae adventum praenunciat. Nec *aestivorum morborum*, licet hi caloris intensitatem fere sequantur, sub eodem tamen

atmosphærae aestu diversorum, causas ex manifestis semper caloris in animalia vel haec, vel illa, effectibus explicare valemus.

Sed, quae cutem calidiori sub coelo affligunt, aegritudines, hae forte non *solis* adeo in illam actioni, quam *secretionis cutaneae* a calore incitatae, mutationi morbosae debentur. *Inflammationis* in pervertendis, qui sub eadem separantur, humoribus auctoritatem exposuimus (§. 121.); sed et sudor abundans, quo continuo inundatur, ac fere maceratur pellis, istius contextum aggreditur, tenorem infringit, sensibilitatem adauget. Vel sanissimi hominis sudor ad pedes, axillas, sub aestivis caloribus, — non ob humorum, ut putant, in sanis corporibus non admittendam, corruptionem; sed, vel ob auctam in folliculis cutaneis, qui suum sudori liquorem commiscent ac proprium odorem conciliant, vel ob mutatam exhalantium vasorum in liquidum perspirabile potentiam, — foetore majori infestatur. Quam scilicet morbosa sanorum, si hic vel oris foetor ex sanguine corrupto scaturiret, massae circulantis conditio, — et quam infelix hominum

num illorum, optime licet valentium, status foret, qui vel hiberno sub frigore, ob peculiarem constitutionem, intolerabilem ex faucibus, axillis, aut pedibus, odorem spargunt! Quantum non foetoris ex ulcere cutaneo a causa externa non ita pridem generato, continuo, et sine morbi interni suspitione, spirat, cujus in sanguine principium non haeret? In ipso hinc secretionis cutaneae actu illud, quod acridine, quod foetore obest, in multis generatur; ac major humorum in pellem sudoribus perpetuo madentem appulsus, facilisque illorum ab occlusis vel levi etiam frigore cutis ostiis stagnatio, aut in vicinum rete mucosum effusio, hanc pellem ad morbosas secretiones dispositionem, atque ipsas demum impetigines non paucas, aetatis tempore inducunt. Ipse jam sudor, licet parvus, morbus tamen est; ac vasa, quae, praesente illius causa, hunc per extrema oscula expellere non possunt, lateraliter ac per poros, ut vocant, inorganicos, vel inter cuticulam ac rete mucosum, vel inter istud et cutem, vel demum in arctam istius cellularem, eundem aut purum, innocentem, aut, si major cutis

tis stimulus accedat, excretionis legibus morbosae submissum, et acrem, irritantem, effundunt: atque nunc pruritem majorem, nunc maculas, nunc vesiculas sero limpido, vel turbido liquore repletas, nunc pustulas, atque phymata, vel abscessulos, in corporis superficie, squamis saepe arescente, inducunt.

Interdum ex causis allatis nulla subesse, sed ex primario atque *congenito*, nec explicando, cutis vitio originem habere impetigines videntur. Saepius per *haereditatem* ex parentibus in proles tam infelix scaturit dispositio: ac visae sunt familiae, — aliae, quae, perfecta in caeteris valetudine instructae, excrescentias tamen in cute, aut maculas, in quavis prole easdem offerebant; — aliae, quae impetigines simul cum vita ex istis miserabili in filios, licet modo non eodem viventes, propagabant. Quas ex utero matris deformitates, huic ipsi non proprias, ferunt neonati, has facile praegnantis *imaginationi*, ac denegatae gravidis rei desideratae, cui formae similes esse interpretantur, impressioni adscribunt; et cum in cute vitium subsistit, *naevi materni* nomine salutant: sed

cum hanc quidem rerum originem ob validas rationes admittere recusamus, verisimilem tamen aliam, quae parentum non modo imaginem ac lineamenta, sed et certos partium defectus, in prolem transfundat, licet experientia de his testetur, proponere nequimus. Interim solidorum magis compagi, ad parentum similitudinem lege nobis ignota in filios ex utero transvectae, quam fluidorum in isto cum prole commercio, *congenitorum* vitiorum originem, ac *haereditatem morbosam* adscribere jubent copiosae prolium sanissimarum ex matre infecta genitarum historiae, ac *tardissima* in multis, et ad certam usque vitae periodum dilata, haereditariae aegritudinis manifestatio. Atque in hac certe tam obscura naturae lege, *dispositionis* illius *cutaneae*, qua sine causis manifestis, ac sine humoris morborum praevii in massa sanguinis contenti auxilio, stato fere tempore impetigines in una eademque familia eadem in cute efflorescunt, latet impenetrabile hominibus mysterium.

§. 374. Causarum, quae impetigines produ-  
cunt,



cunt, diversitas, prompta illarum cognitio, ætatis, quo cutis laborat, longitudo, ægro-  
tantis aetas, coeli conditio, efflorescentiæ in  
caeterum corpus ac in viscera effectus, — cu-  
taneorum malorum pericula et curae difficulta-  
tes determinant. In genere cuivis diuturnæ per-  
cutem excretioni tum sano in corpore a causis  
externis nascenti, tum solidorum, fluidorum ex  
vicio oriundæ, facile tandem natura assuescit;  
ac, si incaute hic fluxus supprimatur, nunc ob  
retentæ materiæ morbosæ actionem interiori-  
bus insidiosam, nunc ob *habitudinis interruptæ*  
pericula, a nervorum, ut videtur, imperio de-  
rivanda, innumerae hominibus minitantur mi-  
seriæ: atque ars medici sæpe major in judi-  
cio, num præsens cutis vitium extirpari con-  
veniat, quam in promptiori ejusdem sanatio-  
ne, consistit. Sed vel sub locali prorsus, ac  
soliùs pellis a vitio pendente, impetigine, si  
diutius continuaverit, vel a resorpto quotidie  
ac in sanguinem deducto ichore, vel ob fun-  
ctionis cutaneæ defectum, subvertitur sanitas:  
ita ut, quam sub initio absque internis curare  
licuisset ægri tudinem remediis, hanc, infecta

jamjam humorum massa, externis modo auxiliis tractare sine damno nequeamus. Interim per longum interdum tempus naturae viribus internae partes ab infectione defenduntur; et sub variis impetiginum speciebus, quod miremur, sanitas non modo seros in annos illaesa persistit, sed quaedam quasi ab aliis morbis *immunitas* sic affectis concedi videtur. Quae *crisin* alterius aegritudinis constituunt impetigines, has caute externis tractare lex esto! Sed quemadmodum febres ipsae frequentius ex illis, quam impetigines ex febribus, oriuntur: sic, ne, quae istarum forte causa fuerunt, morbi pro effectu habeantur et curari differantur, oportet. Major vero hic Medentis requiritur perspicacia, eo quod ab instante non minus, quam a praesente jam febre, impetigines non raro promptissime *dispareant*, et sic morbum, quem modo *praenunciavunt*, fecisse videantur. Ipse etiam, qui impetigines praecessit, morbus, quin semper ad cutem quid morborum deposuerit, mutationem in ista, efflorescentiis faventem, ac morbosas secretiones inducere valebit: quae singula, iudicii his de rebus fallacias,

cias, — et cur Empyricis audacter his in morbis militantibus, cautiore interdum Medici tentamina superare concedatur, ostendunt. Quae per *haereditatem* acquiruntur impetigines, aut certa in easdem dispositio, hae solidorum, non vero contagii forte cogniti, innixae vitio, radicatus auferri vix unquam possunt. Similes *congenitas* difficultas premit impetigines; ac si pellis universa in morbosas excretiones hac lege inclinet, exsiccato in una cutis plaga istarum fonte, in altera mox eadem repullulant. Locale, seu ad parvam modo integumentorum regionem restrictum, vitium *extirpationem* subinde admittit: sed exempla non desunt, ubi institutae aegrotantem poenituit curae; ac, lege nobis haud perspecta, vel mediocri, ut vocant, *naevi* sectionem incommoda secuta sunt insignia. Quae pubertatis ante tempus in cute contigerunt, ea, hac vitae revoluta periodo, maturiori sub aetate sponte nonnunquam disparent. Senilis impetigines aetatis, nisi a causis externis inductae, curationem difficulter, si unquam, admittunt, atque in dies exasperatae sub extremis cruciatibus ad mortem usque per-

sistunt. Similis impetiginum universalium multarum, quae per plures jam annos superficiem roserunt, exitus observatur; ac lenta febris, et tabes tandem, quod superest virium vitalium, consumunt.

§. 375. Pars vitae major ab animalibus, quae cutem pilis aut plumis a natura ornatam tenuerunt, in illa ab impuritatibus mundanda, et ab inimicis insectis defendenda consumitur; atque ad mutuas has inter viventia pugnas, sua cuiusvis arma concessa fuerunt. Quo haec non pertingunt, illinc rudior corporis ad lapidem, vel ad arborem affricus, aut balneum, nunc vicino a flumine, nunc a subtiliori arena subministratum, in auxilium vocatur; ac si haec aggressoris insecti non deludant insidias, tunc inutilis animal in furias raptum vel escam illius, vel nidum, et quasi ovarium constituit. Si tamen has externas impetiginum causas excipiamus, vix tantis caetera animalia, ac humanum genus, ad cutem aerumnis laborant. Etsi nempe hoc ipsum tum vestimentis ex pelibus animalium vel alia e materia consutis,

tum

tum manuum mobilissimarum beneficio, insectorum ausus a cute propria, fere nuda, facilius avertat: pars tamen causarum (§. 373.) hominem longe major, ac alia animalia, tangit; et quam insectis praedam subtrahere conatur, hanc caeteris impetiginum occasionibus quotidie exponit.

Primum igitur in cute ab impetiginum causis praeservanda curationis momentum consistit. Has maxime illa avertunt, quae hominis superficiem contra nimias a parvo stimulo impressiones, vel a *sensibilitate morbosa*, defendant; et quae robur cutis sustentare, nimiamque tum mollitiem, tum rigiditatem, in eadem impedire valeant. Ab ipsa quidem totius corporis sanitate haec potissimum pendent: sed matura cutis cum atmosphaerae impressionibus consuetudo, frequens infantum in frigidam immersio, quotidiana cum hac ipsa superficiei abstersio, et moderata frictio, vestium calidiorum, comprimentium depositio, quamplurima hic praestant.

Hac ipsa jam methodo munditiei necessariae satisfacimus praeceptis. Haec scilicet tam cu-

tem ipsam, quam illa, quae huic admoventur, concernunt. Unctuosa illa, quae nascentes obducit, materia, ut facilius abluatur, tepidam praeter aquam, alia, quae utranque combinent, requirit. Similis fere illorum, quae pellem impraegnant, aut conspurcant, et in adultis est conditio; et ut rectius cum aqua uniantur, saponem interdum, ac illius teporem exposcunt. Summa hinc balneorum tum frigidorum, tum calidorum, in quavis civitate est necessitas; ac istorum institutio, in calidis praecipue regionibus, non exiguam *Magistratus* curam sibi quondam promeruit, ac eandem sibi hodie apud omnes meretur. Nec etenim sola cutis mundities in censum hic venit: sed repentina, ac saepius repetita frigidae in nervos, non modo cutis, sed omnes, ac in vasa singula, actio, — transpirationis insensibilis, ac resorptionis restauratio, augmentum, — ipsa corii humani humectatio ac jucunda pertractatio, hujus subsidii naturalis beneficia multiplicant.

Ipsa vero cutis puritas ab illa linteaminum, quae hanc involvunt, et a vestium munditie quamplurimum pendet. Frequens hinc istorum,  
pau-



pauperioribus eheu! nimis denegata, permutatio, atmosphaerae, in qua vegetamus; ac habitationum sollicita purificatio, ad cutis integritatem summopere contribuunt.

Maxime vero interest, in prima jam hominis aetate, caput pueri, quod impetiginis tot speciebus exponitur, non modo sensim sensimque atmosphaerae mutationibus assueferi; sed pilos quoque frequentius tondi, et a nimio humorum affluxu non minus, quam a pediculorum caterva inimica liberari.

Sic et ab alimentorum, potuumque tepidorum, ac illorum, quae principio volatili, aut acriori, in cutem prae aliis tendunt, abusu abstinendum est. Ipsa jam potulentorum calidorum in stomachum actio, digestionis, a quo cutis integritas non parum pendet, infringit officium; et ista non minus, quam spirituosa, aromatica, acria, volatilia, quemadmodum sudorem facile sollicitant, sic et plenitudini cutanae, et morborum hac in parte secretionibus, favere observantur. Non tam stricte interim haec sumenda sunt, ut non contrarii subinde calefacientium effectus in calidis regionibus ab experientia



rientia suggerantur. Vel sub coeli non tam ardentis caloribus aestivis, superadditum frigidae spiritus vini pauillum, eorum, qui sub sole labores pertractant, et sitim et sudores egregie moderatur. Aromatum, quibus Africae Asiaeque populi solis aestu vexati uruntur, copia languenti stomacho non parum conducit, ac nimios forte in illis sudores coercet. Ast vero condimentorum tam acrium frequentiori sub usu, a potu calido, quo ista magis ad cutem diriguntur, proxsus abstinent hae gentes, in frigidam quotidie descendunt: quibus auxiliis ac celeriori stimulantis materiae per cutem diffusione, noxii condimentorum in cutem moderantur effectus.

Oleo superficiem, quod Antiquis in usu fuit, frequentius perfundi, et cutem strigili, qua longe patet, perfricari, ad potiora, licet neglecta, hanc a morbis praeservandi auxilia pertinet. Ipsa jam natura ab innumeris cutis folliculis sebum, quo necessaria ejusdem flexibilitas ac mollities obtineretur, secerni jussit; et ab aucto corporis partiumque motu, hoc smegma majori ex illis copia exprimitur, frictio-

nem

nem imminuit, ac siccitatem, rigiditatem avertit. Sub aetate juvenili hoc oleum animale in cute abundat; et ad loca, quae pellem aut cartilagini aut ossibus superimpositam agnoscunt, copiosior illius proventus, ac pinguis splendensque integumentorum habitus, observatur. Apud adultos, senes, atmosphaerae calidiori expositos, aut continuo exercitio exhaustos homines, siccescit, induratur cutis, ac non modo vasa exhalantia quamplurima, sed et folliculorum sebaceorum, ut videtur, ductus obliterantur, ac functionum hoc in organo pars major languescit. Hinc omnes fere Africae populi in cute cum oleo, aut pinguedine animali, pertractanda continuo versantur; atque per hanc propriae superficiei curam non tam nimios sudores, quam cutis exsiccationem, asperitatem lentamque phlogosin, ac demum inimica insecta, avertere experientiâ didicerunt. Hinc senum imprimis, hominumque adustorum seu macilentorum superficiem non exigua ex oleo beneficia exspectant; atque cum hujus sub usu praesentes jam impetigines non paucas illico disparere videmus, hoc saepe, non tam effectibus,

bus, quam istorum causis, resistendo, ab unctio-  
 nibus praestatur. In conservanda pilorum,  
 qui caput ornant, copia, pulchritudine, vis  
 magna in adipe, quo calvariam quotidie un-  
 gunt, habetur; ac pars magna virtutum, quas  
 linimentorum, unguentorumque in profundio-  
 res partium affectus penetranti adscribimus effi-  
 caciae, ex superficiali protinus illorum in cu-  
 tem actione derivanda videtur.

Potissimum vero in dirigendo *secretionum* o-  
 pere., sanitatis tum corporis universi, tum il-  
 lius, quae cutem concernit, ponitur momen-  
 tum. Prima quidem ex illis ea est, quae, in-  
 sensibilis sub specie vaporis, per cutem absol-  
 vitur: et hujus integritas ab allatis non mi-  
 nus rationibus, quam a provido vestimento-  
 rum usu, a corporis exercitio, a ventriculi,  
 et ab animi pathematum regimine, quamma-  
 xime pendet. Sed et aliarum *secretionum*, at-  
 que *excretionum*, tum naturalium, ut urinae,  
 bilis, lactis, seminis, imprimis vero illius,  
 quae per uterum periodice absolvitur, — tum  
 morbosarum quidem, sed ex causarum laten-  
 tium ac habitudinis lege fluentium, ut hae-  
 mor-

morrhoidum, haemorrhagiae narium, fonticulorum ac ulcerum, non minor est auctoritas; et recto istarum moderamine cutis nitor ac sanitas praecipue conservatur.

Praecipuum vero impetiginum curandarum in eo haeret punctum: ut, quae causa has produxerit, quam citissime eruatur; atque haec ipsa, priusquam morbosae secretionis consuetudinem cutis ineat (§. 374.), quantocyus extirpetur. Quod si nimirum in hominibus perfecta in caeteris salute instructis, ab *externis* laesionibus, ab insectis, a contagio, vel a solius modo cutis actione morbosa, impetigines oriantur, internis certe tempus terendum non erit remediis; et sicut vanus istorum usus esse consuevit, ita promptioris procrastinatio auxilii, praeter majores tandem impetiginis auferendae difficultates, ipsius quasi necessitatem mali saepissime inducit. Si causa forte *interna* cutis morbo subfuerit, tunc omnis primum attentio in illam convertenda, ac impetigo, ut alterius *symptoma* morbi, ad leges huic proprias, vel salutaris interdum ut crisis, tractanda est. Non raro, interim, qui profundio-

rem

rem agnovit originem, non tamen internis in totum cedit, morbus cutaneus; atque vel continuato istorum usu exasperatur, vel locale tandem, sive externum sibi auxilium, ut sanetur, exposcit.

• Magnae interim his in rebus difficultates Medentem premunt. Morbosa saepe hominum dispositio ac latens in lymphâ vitium non prius, quam accedente laesione ad cutem violenta, vel contagio, evolvi, — atque tunc non aliis comitari symptomatibus observatur, quam quae vel in sanissimis corporibus, ob majorem modo partis affectae sensibilitatem, simplicissimum subinde cutis vulnusculum sequantur. Atqui cum hoc ultimo in casu externa promptissime aegrotis conducant remedia, in illo certe ob complicatam laesionis cutaneae, licet satis recentis, naturam cum damno subministrantur. Sic octogenarii nobis exemplum viri occurrit, qui, cum perfecta omnino salute pro aetate frueretur, contusionem ad tibiam, et ex hinc ulcus molestum, expertus est. Per sex modo hebdomadas hoc ipsum sine alio sanitatis detrimento abunde fluxerat, cum impatiens mor-

bi senex, consilio Chirurghi, exsiccantia medicamenta, — dum vero haec non prodessent, fasciam constringentem adhibuit; atque hac incauta sub methodo, paucarum modo dierum intervallo, apoplecticus expiravit. Qui diathesi scrophulosa, aut scorbutica laborant, his superaccedens forte, externa ab origine, psora, nisi citius auferatur, mox complicatum, nec solis amplius externis sine periculo dissipandum cutis morbum accersit: atque sic nec recens sat impetigo mox, quovis in casu, sine praevia constitutionis examine percuranda erit; nec ea semper, quam profundius latentis causae commitari signa videntur, internis ideo subsidiis indigebit.

Alteram in curandis cutis affectibus difficultatem, *remediorum internorum*, quae propria his virtute opponantur, *inopia* constituit. Quod si nempe symptomaticas, easque non multas, excipiamus impetigines, quas *specificae*, ut ajunt, methodo per interna dissipari medicamenta conceditur; in caeteras vix illi tam certum est, ut externis illae carere queant, remedio imperium. Actionem prae aliis manifestam r



stam, sub debita atmosphaerae conditione, antimonialia, refractis dosibus porrecta, in cutem ostendunt; sed ipsa haec virtus partim ex longinquo magis abdominales in nervos effectu, quam ex specifica, ut vocant, stibii in pellem actione, pendere, nec aut istius secretionem morbosam, aut latens in humoribus vitium corrigere videtur. Quae, principio subtiliori atque aromatico instructa, cordis, vasorumque vires intendunt, ac simul nervis amica sunt remedia, sales volatiles, olea aetherea, haec equidem tepidis imprimis praeter atmosphaeram potulentis, aut balneo, fomentatione locali, suffulta, sudoris, quem promonent, testimonio, prae caeteris ad cutem appellunt; atque tum aquae thermales, sulphureae, tum evolutum ex ipso sulphure principium, ad hanc usque potentius penetrare videntur: sed peculiaris, aut specifica, ut appellant, virtus, paucis, quod sciamus, ex istis concessa est; et laudata toties *dulcificantium involven:ium*, *corrigen:ium*, viperarum, lacertarum viridium, lignorum, sarsaparillae, solani scandentis, aliorumque actio, impetiginum aliquid



quid vix detrahit ferociae. Sic et acidorum mineralium usus, non alia, quam quod nimiam haec irritabilitatem infringant, ratione impetignes, quae cum *suppuratione* incedunt, moderare dicendus est. Mercurialia efflorescentias cutaneas, nisi veneream forte indolem agnoscant, vix mutare observantur. Quae alvum, aut urinam, potentius movendi virtute instruuntur, ea, sicut vasorum lymphaticorum actionem intendunt, ac stagnantis ad pellem acris resorptionem secundant, ita impetignes exsiccare, aut e superficie protinus dissipare cernuntur: sed aut nec causas istarum satis auferunt; aut, si hoc praestent, abdominalem ac symptomaticam potius illae, nec secundas ad vias extensam, originem habuere.

Quodsi vero istorum per experientiam quotidianam confirmata sit veritas, fatendum tamen est, aut paucas certe alias, quam *symptomaticas*, et *criticas*, solis internis superari remediis impetignes; aut, si contra *primarios* cutis affectus interdum ista quid possint, vix alia, quam complicationis causarum ratione, et actione *secundaria*, id ipsum efficere.

Alia omnino remedium, quae corpori *exterius* applicantur, contra impetigines *primarias* est auctoritas; ac licet istarum non paucae illis modo pertinaciter resistant, modo cum damno totius dissipentur, hoc tamen vel tardio rem topicorum ob usum, ac dilatatum jam ad interiora vitium, vel ob neglectas in cura morbi habitudinis leges, sic evenire consuevit.

*Externa* vero, quae ad impetigines *primarias* adhibenda sunt, remedia, licet odioso *repellentium* sub titulo vix non omnia veniant, non sola tamen adstringentium ex classe, sed, pro variis illarum indole ac causis, nunc ex illis, quae cutem humectant ac emolliunt, nunc ex siccantium, stupefacientium e numero, nunc ex familia excitantium, roborantium repetuntur, ac multorum ex istis ad solam corporis peripheriam non limitantur officia. Vel salivae solius externo usu impetigines haud raro dissipantur, ac animalia, quae cum lingua attingere queunt, cutis ulcera lambendo sanant; nec ideo, quod de succi gastrici a saliva vix distincti virtute expectant, hoc vel istius, vel

*aquae simplicis* ac purioris, superabit efficaciam. Sordidissima crurum cutisque ulcera in *thermīs*, quae saepe vix majori, quam ista, virtute pollent, sanari conspiciamus; et a solo recenter mactati animalis, cui, ut balneo, partem herpette affectam committimus, vaporem, hunc disparuisse experientia commonstrat. Sub majori cutis ab impetigine tensione, ac rosionis quasi sensu, mucilaginoso certe magis, ac emolliens fomentatio, nec non balnea tam simplicia, quam cum lacte commista atque tepida conveniunt; et ab istis non modo symptomata sedantur, sed ipsam hinc inde efflorescentiam dissipari observamus.

Qua demum agendi ratione *oleosa* et pingua, dum cuti inunguntur, impetigines tam saepe ex ista dispellant, ignoramus: sed partem certe remediorum, quae contra efflorescentias cutaneas vix non omnes a vulgo adhibentur, principalem oleum pingue constituit, a quo non modo rancido, sed etiam recente atque blandissimo, impetigines saepe nimis cum summo aegrotantium damno ad superficiem disparent. Ipsa certe, quae sub unctione

adhibetur, frictio, licet vasorum, nervorum cutis actionem abhinc excitari fateamur, hos effectus non explicat, et poros ab oleo, ut plures defendunt, obturari, experientia populo-  
 rum refutatur ( §. 373. ). Quod si cutaneo-  
 rum pars major affectuum ab *insectis* nasceretur, non difficilis tunc foret actionis, quam oleum, his animalculis infensissimum, in hanc morbi causam exerceret, explicatio, nisi altera ex curationis effectu tot aegrotis funesto difficultas reluctaret. Sed et ista disparebit, si cutis morbos, qui *symptomatice* prorumpunt, aut quibus ob adultam secretionis morbosae indolem natura jam *adsuevit*; aut a quibus forte jam aliquod in lympham vitium redundavit, a *primariis*, nec vetustis, efflorescentiis separare velimus: ut in quibus, aut vivens, aut inanimis earundem supponatur origo, oleosorum frequenter utilissima esse solet applicatio. An forsitan relaxatis per pingua integumentorum fibris, tum istarum, tum vasorum, nervorum, quae morbosae secretioni praefiguntur, sedantur motus, ac, sicut ab effuso super procellosas maris undas oleo placantur aquae,  
 ita

ita partium, quae cutem constituunt, frenantur impetus? . . . an haerens in cute acrimonia oleosis involvitur, nervorumque obtunditur sensibilitas? . . . an tristes aliquando pinguium, aliorumque externorum, in *primaria* licet impetigine, effectus a suppressis quidem in cute, sed ad viscera transvectis, solidorum turbis, ac sicut violentos hominis convulsi motus per fascias sistendo, ad interna hos ipsos augemus: ita ab irritatione a superficie corporis aversa, majores partium internarum agitationes excitantur? . . . Ast, quaecunque his subsit effectibus ratio, certum tamen est, innumeras a pinguibus impetigines *primarias* medicinam habere, methodique istius non ex remedium natura, sed ex perversa eorum applicatione, infamiam venisse.

Summos quoque *sulphur* exterius adhibitum in varias impetigines imperium exercet: quod licet partem et pingua, quibus illud plerumque commiscetur, habeant, ex cognitis tamen vel illius, vel istorum qualitatibus, nisi ubique iterum insecta pro morbi causa statuatur, explicare nequimus. Ipse quidem sulphu-

ris, vel hepatis, ut vocant, sub forma, vel cum adipe remixti foetor, principii cutem ac vasa inhalantia penetrantis praesentiam testatur, ex cujus in illam actione hujus remedii effectus interpretari viderentur: sed sicut ex *psorae*, seu scabiei, per sulphur curatione apparet, non hanc, sed peculiarem illius, in viventem morbi causam agentem, virtutem hos effectus producere; ita, cum idem remedium et in aliis quibusdam impetiginum speciebus prodesse observamus, ad eandem et in istis causae viventis traheremur suppositionem, nisi argumentorum, quae solo remediorum effectu nituntur, in causarum morbosarum indagine fallacias nosceremus.

Conspicuos in cutem effectus edit *plumbum*; cujus tamen copiosae praeparationis ab omni fere aevo ad impetigines adhibitae non aequali ubivis ratione operari videntur. Satis certe sub forma, acidisque saturatus, *Saturnus* adstringentem in solida potentiam exercet; sed aut oleo, muco animali remixta, aut pulveris sub specie adhibita, et a vapore [cutaneo ex parte soluta, calx plumbi tam fortiter vix partes,  
ut



ut contenta repellat, aut ab istis infarciatur, strangulentur, constringit. Aliud vero hoc in metallo continetur, quod nervis blandiatur quidem, sed, vaporis potissimum sub forma his admotum, insidias saepe struat, ac, durissimis ad intestina excitatis cruciatibus, vitalem in extremitatibus potentiam frequenter extinguat, principium. *Sedantem* interim in plumbo exterius adhibito virtutem experientia testatur; atque hoc magis, quam alio, impetigines *primarias* non paucas dissipari, ac radicibus interdum sanari, lubenter fatemur. Ex insidioso plumbi principio a vasis lymphaticis ad cutem resorpto, internorum stragem complures verentur; ac certe *tristes* impetiginum plumbeis tractatarum, qui illorum ab istis aversionem explicent, non desunt exitus: sed cum hi ipsi, in *secundariae* potissimum impetiginis speciebus, aliorum non minus sub usu remediorum occurrant, ac certum, quo nocivi plumbeorum effectus ab aliis distinguantur, signum non existat; hinc facile injustum his de rebus fertur iudicium, ac summa rei dignitas, ne insons forte, et non parva agendi potentia in-



structum, criminis damnetur remedium, nobis cautelam injungit. Certe non omne, quod interno usu sanitatem laedit, — hoc, extus admotum, cessat esse remedium; nec idem semper a re eadem vel ore, vel corporis superficie suscepta, in hominem effectus obtinetur. Aliorum nos quidem, prout decet, experientiam veneramus: sed si nostram simul certe non paucam hoc de argumento consulamus, fate-mur, nos plumbeorum externo ab usu, quotiescunque haec nobis indicata videbantur, non semper quidem bonos, sed nec tam flebiles, ac multi recensent, effectus observasse.

Salium quoque *mercurialium* celebris in multas, diversas licet a venereis, impetigines est actio, et in illis vel aqua solutis, vel unguento receptis, istarum non paucae medicinam agnoscunt. Nec tamen adeo in fluida, quam in solida agendo, mercurium, ut qui ore assumptus in impetiginem, sub media licet salivatione, saepe non agit, hic operari censemus; ac singularis et hujus medicamenti in necandis insectis potentia *viventem* impetiginum plurimarum causam iterum confirmaret, nisi

nisi *excitante* magis, aut *caustica* interdum, quam alia in pellem virtute hoc idem, saltem in multis impetiginum speciebus, operari videretur.

Optimos interdum ex *maris balneo* in morbis cutaneis effectus experimur; atque ab illius virtute tum stimulante, tum simul ob undae frigus roborante, morbosa cutis actio mutari, ac languens diu transpirationis opus excitari, promoveri videtur. Sed et *acidorum* tum vegetabilium, tum mineralium, cum aqua communi dilutorum, quin ipsius adeo *urinae*, non raro conspicua, ac forte similis *maris balneo*, ad abigendas impetigines est virtus.

Nec vanae ubique sunt laudes multorum quae eutem manifesto condensant, *adstringunt*, ac orientem ex vasorum debilitate humorum impetum non minus, quam sensibilitatis excessum, a parte aegrotante avertunt. Hinc solo *fasciarum* usu non pauca crurum ulcera radicitus auferuntur; ac ipsum jam atmosphaerae *frigus*, aut cutis cum aqua frigida fomentatio nunc meliori, nunc pessimo sub rerum eventu, efflorescentias coerces. Eadem est tum aluminis,

nis, tum vitrioli albi, cupreorum, saccharique saturni, conditio; ut quae singula, nisi rectius indicata, atque vel in *symptomatica*, vel jam in *consuetudinem* deducta, impetigine, aegrotantis quidem interitum, — sed sub attentata causarum indagine, soloque cutis sub vitio, sanationem promovebunt.

Ea ipsa interdum, quae fortiori cutem stimulo exasperant, alienum in eadem motum excitare, ac morbosam in pellis particula secretionem invertere, delere valebunt. Hinc tum cantharidum ipsi, quem impetigo defoedat, loco applicatio, — tum escharoticorum, ipsiusque ignis aut solaris, aut artificialis, in ulcus, cujus superficiem consumit, atque corrigit, actio, antiquas non raro impetigines perfecte sanarunt.

Quae vero in cutem impetigine correptam, manifestam satis actionem exercent, aut amara, aut acria, vel et stupefaciente, ac sedante instructa principio vegetabilia: ea, sicut morborum, qui ab insectis oriuntur, causae viventi resistunt, ita solidorum in cute actionem vel augendo, vel deprimendo, immutare

videntur. Hinc summos ex seminum Delphiniæ staphisagriae, Sabadillae, apii pétroselini, ex hellebori nigri, ledi palustris, Nicotianae tabaci, cicutae virosae, veratri albi, Menispermii cocculi, juniperi Sabinae etc., externo usu; in cutem vitiatam effectus observamus: et sicut alia prorsus medicamentorum, cum extus applicantur, quam cum ore hauriuntur, in hominem est actio; ita optandum foret, ut, quæ ratione potentiora ex illis vel solam in pellem tam sanam, quam aegrotantem, vel in universum systema operentur, experimentis sat fidei innotesceret.

Quemadmodum vero ex suppressa sanguinis evacuatione aut naturali, aut in habitudinem conversa, — vel et sine hac causa, ex peculiari vasorum cutaneorum plenitudine impetigines interdum gignuntur ( §. 373. ): sic non infrequens in curandis cutis affectibus tum venae-sectionis, tum scarificationum, necessitas occurrit. Jam ipse cutis irritatae pruritus, aut dolor, affluxum sanguinis vel in illis adeo impetiginum speciebus, quae ex cruoris abundantia originem non habent, ad pellem in multis

tis adauget; ac spasmodica hac in parte contractio facilem humorum circuitum in eadem impedire non raro videtur. Hinc major saepe in cutis affectibus, quam ab inexpertis crederetur, cucurbitularum scarificatarum observatur utilitas; atque tam importunum hae ad peripheriam pruritus, quam facilem ab externis remediis, quae cutem roborant ac vel minime coarctant, phlogosin, his praemissae avertunt.

Maxima in morbis cutaneis, quos tandem externis tractare coguntur, in *ulcera artificia- lia, setacea, fonticulos* multorum collocatur fiducia; ac, desumpto ex hydraulicis argumento, quam illinc aquarum obturare scaturiginem, — hanc, excavata in carnibus fossa, humiliores ac declivem ad locum derivare nituntur. Ast vero, quem sibi forte natura locum, quo peccantem expellat materiam, hac in parte elegit, hunc ab arte in aliam, quo lubet, transferri tam facile non sinit; nec sola pellis incisio, et excitata, cum peregrino, quod huic committunt, corpore, ejusdem exulceratio, conditionem, sub qua noxius illinc humor fluebat, novo fonti ubique concedit. Jam dictum est,

fre-

frequentius solidorum, quam fluidorum, e vitio impetigines oriri ( §. 373. ); ac si ille, qui ex foniculis quotidie destillat, humor et manifestam prode acrimoniam, et foetorem intolerabilem spargere observatur, hoc ipsum in sano non minus, quam aegrotante in corpore contingit; atque insignem iterum cutis laesae aut irritatae in contentos humores, sub ipso, quo hos secernit, actu, pervertendos potestatem ostendit. Non alius certe, quam qui per singula humani corporis vasa circumfertur, liquor ex artificiali integumentorum apertura ut plurimum expellitur, sed inflammata, vel exulcerata, istius superficies peregrinum ab illo, qui in vasis agitatur, humorem sibi praeparat; cujus excretio saepe non aliter, quam si fluidorum quid forte abundet, ad sanitatem conferre, — saepe vero praesentem jam machinae debilitatem augere, irritationem vicinis partibus infensam communicare, aut resorpto interdum, has ad oras corrupto, liquore, internis obesse observatur. Quae ex clausis incaute his, diuturno jam fluxu confirmatis, ulceribus propullulant, lethalia non paucis, infortunia: haec



saepius non tam ob retentam in sanguine acrimoniam; quam ob infractas cum impetu *con-  
aetudinis*, quae altera natura est, leges, in  
hominem redundant; ac impetiginis cujusvis  
primariae quidem, sed jam inveteratae, sequun-  
tur pericula ( §. 374. )

Summos interim setaceorum, fonticulorum in  
Medicina usus, quos sola ratio non satis ex-  
plicat, experientia persaepe confirmat; atque  
sub cutis ipsius forte magis, quam partium  
profundiorum sub affectibus, conspicuam arti-  
ficialia haec ulcera virtutem non paucos apud  
homines manifestant. Non ipsis adeo in va-  
sorum canalibus, quam in cellulosa, quae i-  
stos, nervosque cutis, — aut quae hanc ipsam  
cum musculis ac ossibus colligat, acrimoniae  
colliguntur et stagnant. Atqui, ut ex *anasar-  
ca* hydropse docemur, ad inflictum cuti vulnu-  
sculum, non modo vasculorum, quae in hoc  
ipsum hiant, sed cellulosae vicinae diriguntur  
ac continuo destillant humores; atque sic pel-  
lis infarctae depletio, ac irritantis excretio ma-  
teriae per praescriptum ab arte colatorium ob-  
tineri, impetiginisque symptomaticae causa bre-  
vio-



ieri via eliminari e corpore potest. Profundius, quam primo quidem aspectu crederetur, hoc beneficium descendere: ex summo fonticulorum in *cyphosi* prope spinam positorum effectu, — ex artificialis in nervosa, ut ajunt, ischiade ulceris prope poplitem virtute, — et ex *moxae*, in rheumate pertinaci actione comparet; atque si forte ob excitatam magis in parte sana inflammationem, quam ob peccantis excretionem materiae, haec ulcera prosint, fatendum tamen est, in hoc ipso illud, quod impetiginum sub cura quaeramus, consistere; et quocunque demum haec ulcera modo operentur, secretionem tamen in superficie morbosam ad parvum saepe ac circumscriptum ab arte ulcus limitari, ac stimuli prius incogniti indolem in cogniti illam, seu in simplicem fonticuli phlogosin atque suppurationem permutari.

Non vana hinc ulcerum artificialium in affectuum cutaneorum medela ubique dicenda est theoria; atque tum in *symptomatica* impetigine, quae, priusquam morbi fomes extinguere valeat, externum sibi promptumque auxilium aliquando exposcit, — tum in primario quidem,

scd

sed *inveterato* cutis vitio, fonticulus in vicina impetigini parte, et antequam spontanea ac morbosa in cute secretio supprimatur, excitatus, ad potiora securitatis majoris ac desideratae sanationis momenta referendus est. Non tamen igitur, fonte licet novo ad cutem vix aperto, impetuosa nimis antiqui vitii curatio suscipienda, aut naturalium excretionum negligenda sunt subsidia; sed fluxu ulceris jam satis confirmato, et abactis, in quantum hoc licet, morbi causis, a mitioribus initium faciendum, et ad fortiora gradatim ascendendum est.

Quod vero de ulceris artificialis ab impetigine ipsa, quam forte, alias tam rebellem, sine alterius auxilio remedii exsiccavit, differentia testatur, est summa illius, licet jam vetusti, ad *spontaneam* sanationem dispositio, ac diversa, multum ab impetigine in cicatricem perfectam promptitudo. In eo quidem utrumque mali genus conspirat, quod ex praepostera fonticuli non minus, quam ex incauta impetiginis suppressione, ob dictas jam alibi rationes, non exiguae sanitati ac vitae struantur insidiae: sed, praeter haec aequalia sibi pericula,

cula, singularis ab impetigine provecta remediis opponitur resistentia; quae, reducto in fonticulum cutis vitio, vel ab ipsa, quovis certe ulcere facilius, superatur natura. Major scilicet in pelle non in totum soluta, sed ad superficiem modo, vel ad dimidiam quasi substantiam, ab impetigine distracta, erosa, et inaequaliter lacerata, irritatio occurrit; atque difficilius humoris iniqui in cellulas cuti subjectas simul effusi, per corium impervium, quam per ulcus hoc ipsum penetrans, exspectabitur separatio. Nec ideo tam *perpetua* sunt, ut ajunt, fonticulorum incommoda, quin sub iisdem, quas pro impetigine inveterata, ac in consuetudinem deducta jam praescripsimus, cautelis, circumspectam ac lentam sanationem in multis admittant.

His igitur de impetiginum natura, diversitate, causis, et cura generali, praemissis, ad specialem earundem pertractationem descendimus: atque primum de *maculis*, seu coloris proprii in parte cutis una vel altera, vix, aut modo parum super sana elevatae, mutatione morbose, disseremus.

## O R D. I.

## IMPETIGINES MACULOSAE.

## G E N. I.

## E P H E L I S.

§. 376. **A** levissimo cutis vitio, *Ephelide*, impetiginum ordimur historiam. *Solis* in cute hominis non modo, sed et in fructuum horaeorum pellicula, petalisque florum tingendis, potestas, quocunque demum, a *calore* certe diverso (§. 373.), nitatur principio, insignes in gentium diversarum superficie, ac in hominum eodem sub coelo viventium pelle, colorum differentias inducit. Ipsa Aethiopum, retis mucosi sub epidermide peculiari structura suffulta, nigredo hac a causa intenditur; ac vestium in conservanda partium albedine effectus, quas cutis hoc a sidere mutationes patiat, abunde demonstrat. Nec tamen ideo vel quavis humana pellis eandem a sole eodem actionem agnoscit, vel quaecunque in cute eadem par-

particula cum eodem effectu a solis iisdem percutitur radiis: sed aut tenerior ac pervia magis integumentorum vel in toto, vel in parte, textura, aut major hinc illinc sensibilitas, aut certa demum ac incognita dispositio, diversos, a causa eadem, in superficie humana effectus inducit.

§. 377. Qua igitur in circumscripta cutis parte color nativus a sole, magis quam ad vicinam, in subflavum, aut fuscum, aut fere nigrum mutatur: in hac ipsa nascitur *ephelis*, vel a *sole macula*, quae vix aliam in cute, quam coloris mutationem, nec tumorem, nec aliud, quam laesae venustatis, incommodum producit.

§. 378. Nunc vero sat largam in cute plagam haec macula, et densam quasi umbram in longum latumque diffusam, nec interruptam, praesentat: *umbrosa* hinc a nobis *ephelis* dicenda; — nunc partes tot quasi punctis subflavis, fuscis, mox densius, mox rarius, quasi guttatim inspersis, lenticularum figuram et colorem aemulantibus obsidentur, quod cu-

tis vitium *ephelis lentigo* vocatur. Sed et ignis actione, qui vicinius huic assident, similes ephelidi maculas, subflavas, obscuras, pertinaces et amplas, ad tibias et crura experiuntur: quibus *spuriae* nomen *ephelidis* impertimur.

§. 379. Infantes, feminae, et qui fulvo, rubroque capillo, cute vero tenera, albidiori instructi sunt, *ephelidi* tum *umbrosae*, tum *lentigini*, prae aliis subjiciuntur. A prima solis ad nos redeuntis, licet debilioris, in pellem actione fere major, quam aestivis a radiis, macularum in facie, jugulo, ad superiorem thoracis partem, atque ad manus, prorumpit copia. Nec teneriora quidem plantarum folia, nec fructuum, qui ab illis pendent, cuticula, hac impetiginum a specie sunt immunia; ac licet ab insectis haec frequenter conspurcentur, maculentur, post tenuissimas tamen pluvias, quas solis urens mox excipit radius, tot puncta fere nigra, quot aquae guttulae, in iisdem comparent. Nunc vero segregatae ab invicem lentigines, nunc racematim congestae, aut ubique partium dictarum tam confertae existunt, ut



intermedia vix cutis albedo transluceat, et color hujus obfuscetur in totum.

§. 380. Nec tam levis quidem in cute mali originem sat clare intelligimus. A *bile* quondam, solis a radiis exusta, ut vix non omnes coloris nativi mutationes, sic et ephelides immerito derivarunt. Sanitate caeteris hominibus aequali gaudere illos, qui rufo, fulvoque capillo signantur, tum ratio, tum experientia confirmat. Atqui cum hi ipsi prae aliis obtectam nobis ephelide superficiem exhibeant, — cum haec ipsa verno magis, quam alio quovis tempore, e cute progerminet, oportet aut in tenera magis ac sensibiliore integumentorum his in hominibus compagine, aut in copiosiore ac magis foetido, qui horum e cute propellitur, sudore, veram ephelidis causam latere. Quae in foliis plantarum, fructuumve in extrema pellicula a sole nascuntur, subtiliorem post imbrem, lentigines: hae ex illius radiis ab aquae guttula, quasi a lente vitrea, aut speculo, ut vocant, ustorio, in centrum, seu focum collectis, producuntur. An similis et *len-*



*tiginum* in homine subsistit ratio? Ad poros certe eorum, qui copiosius transpirant, invisibilis haerens sudori guttula, non minus ac plantarum in foliis, a solis percutitur, penetratur radiis: et qui ex istis, aqueam post lenticulam, in focum collectis, concentrati adinstar ignis in cutem agerent, hi similes in ista, quam in vegetabilibus, maculas relinquere, ac lentigines formare possent. Nec obest, nullam hujus ignis in cute sensationem excitari, aut effectus causae ejusdem in alios, qui fusco ornantur capillo, non similes haberi; aut aestate, qua solis magis urget ardor, qua sudor copiosius prorumpit, vix tantas in cute lentigines formari; ac demum illaesam in lentigine epidermidem subsistere. Nam primo, celerior, ac nimis superficialis radiorum solis in summam cutem, quam dolorem ut inferat, actio hic est; secundo, fuscorum minor cutis observatur teneritas; tertio, sub aestivis caloribus, sudoris et copia et impetu majore propulsi guttulae mox diffuunt, neque cutem, calori jam magis, quam verno tempore, assuefactam, lentis vitreae in modum perurere queunt; ultimo vero,

qui

qui epidermidem transgreditur, et ad rete mucosum formatur, — non illam certe, sed istud, pro *foco* agnoscit, radiorum concursus. Quod vero aliquam huic opinioni probabilitatem conciliat, est velorum tenuissimorum quidem ut cribriformium, sed solis radios divertentium, in praeservanda non a calore, sed a maculis cute, formosis non ignota puellis potestas. Rēte igitur mucosum in cutis punctulo solis igni subjecto, pro stagnantis atque coactae in eodem lymphae conditione, colore nunc subflavo, nunc fusco transparens, lentigines, easque mox perennes, mox vagas, ac redeunte solis astro redeuntes, formaret. Cui praedicta lentiginum non arridet derivatio, hic citius forte nodum discindet, si easdem non aliter, ac *petechias* (§. 317. ), in cute oriri contendat; ac sub deli-  
catulo istius contextu, radii solaris, ut ex vasculis cutaneis humoris guttula coagulabilis hinc atque illinc transudet, lentiginemque creet, jam forsitan sufficit violentia. Hoc saltem modo *ephelides umbrosa*, ac *spuria* oriri videntur; et cutis a sole, aut ab igne rubor, ariditas et quasi erysipelacea constitutio, prae-

viam ephelidi, leviolem licet, sub epidermide phlogosin, aut ecchymosin confirmant.

§. 381. Nulla quidem salutis hic pericula, — sed plurimae, nec injustae, apud feminas, fugientis ab ephelide formositatis sunt curae. Vix multum hoc cutis in vitio ab arte sperandum est, et innumera, quae hic celebrantur, auxilia, venientis potius efficaciam hiemis, quam propriam virtutem, in ephelides confirmant. Spes major in praecavendis, vel saltem in illis, quae vix semel apparuere, dissipandis, ponenda est maculis. Quod interim Medicina non aufert, — hoc mulierum astutia fucocultare jam nimis edocta est vitium. Quo tempore *lepra* domicilium in Europa fixerat, nec *lentiginosa* quidem in cute *macula*, dum *sensu* simul *privaretur*, ad illius morbi non pertinebat diagnosin ( §. 451. )

§. 382. Ad ephelides avertendas, quod eripi feminis cura cultus sui non possit, tum solarium, flammaeque viciniae fuga, tum sollicita partium per velamenta custodia, requi-

quiruntur, et verni potissimum solis, et, ab instituta vix faciei aut manuum lotura, aeris rigidi in cutem evitanda est actio. Hanc ipsam praevertit, qui has partes cum ovorum albimine, aut seminum cydoniorum, gummi tragacanthae, Arabici mucilagine, in frigida solutis, defendit.

Contra praesentes jam ephelides interna nil possunt remedia; externa vero, quae interdum hic prosunt, in sequentibus consistunt. Cutis primum cum sero lactis, vel aquis destillatis, iisque tepidis, aut cum massa saponacea ( N. XXXIX. ), cremore lactis dulci, ac similibus emollienda et abstergenda est. His vero peractis, ad illa, quae cuticulam magis penetrant, extravasatam sub ista, condensatamque materiam eliquent, ac vasculorum lymphaticorum in hanc ipsam actionem promoveant, recurramus. Hinc vapor aquae et aceti, quibus sambucus infunditur, — aqua destillata, aromatica, cum aceti salisque ammoniaci pauxillo remista, linimentum camphoratum ( Num. XXXVII. ( superaddita salis volatilis portione, — acetum camphoratum ( N. XIV. ), aut  
mi.

mitior compositio ( N. XL. ), — ac disparente demum ephelide, fomentatio cum frigida, cui iterum albumen ovi, ac aluminis, vel sacchari saturni portio superaddi potest, tentari merentur. Fortiora, et quae cutem nimis irritant, remedia non sine majoris, quam quod auferre contendimus, mali administrantur periculo.



## ORD. I. GEN. II.

## C H L O A S M A .

§. 383. Non aequo satis consilio, quas *gravidæ* maculas, sine ignis aut solis effectu in cute patiuntur, has *ephelidum* (§§. 376. 377.) subordinare familiae, — et alias, quae ab hepate originem vix ducunt, has et *hepaticas* nominare, et ad *vitiliginem* referre voluerunt. Hinc *Chloasma* has, affines sibi, impetigines vocare, ob coloris et causae communioris rationem, arrisit: atque hoc nomine intelligimus maculas ex flavo viridescentes, aut pallidas, subinde fuscas, et ex flavo nigricantes, nunc faciem, nunc pectus, abdomen, aut inguina occupantes, in longum ac latum extensas, indolentes, saepe leves, alias paullisper asperas, quae suam ex causis internis originem, mitiorem plerumque, agnoscunt, ac alia, praeter cutis foeditatem, vix afferunt incommoda.

§. 384. In *gravidis* frequentius, quam in aliis, hae maculae comparent (*chloasma gravidæ*—  
da-



*darum* ), atque frontem potissimum, ac genas, sed et collum similiter et manus, ad pollicis, vel et palmae latitudinem, fere luteae, subvirides, aut fuscae, interdum subnigrae, aspredinis plerumque expertes, deturpant. Inceitum quidem factae conceptionis hae maculae signum constituunt, nec prolis, ut aiebant, hae sexum manifestant; non paucae interim mulieres, si utero non ferant, hanc ignorant, — si ferant, mox patiuntur impetiginem; nec desunt aliae, quae, *puero* onustae, his semper maculis carere; — quae sinu *filiam* occultant; ab eisdem continuo obsideri, aut, licet miri ratio nos lateat phaenomeni, contrarium affici in modum cernantur.

Sed et femina non praegnans, et vidua, et virgo, *chloasmate* non raro laborant: quod cum ex suppresso plerumque fluxu menstruorum oriatur, *amenorrhoeicum* vocari nil impedit.

Et menstrui sine vitio mulieres, ac viri adeo non pauci, ad partes non tam nudas, quam vestimentis munitas, ad pectus imprimis, et ad inguina, a *chloasmate*, per amplam cutis superficiem extenso, quidquam aspero, atque  
 pru-



pruritus, caloris externi sub augmento; interdum summi, non semper experte, foedantur. Haec est *hepatica*, ut injuste appellant, *macula*: quam, ob aliquam cum porrigine (§. 413.) similitudinem, *chloasma pseudoporriginem* vocamus.

§. 385. Velut primo impraegnationis jam tempore, aut tardius in aliis, hae maculae (§. 384.) comparent; sic vel cum caeteris, quae gravidas infestant, incommodis, post primos jam menses dissipantur; vel ad partus ipsam periodum, et ultra, rebelles subsistunt. Major vero illis in feminis macularum esse numerus consuevit, quae praegnationis sub statu esculenta fastidiunt et vomunt, vel quae subtumido et chlorotico fere corporis habitu hoc tempore incedunt. Sic et pallidis aspectu languidisque, aut menstruo privatis mulieribus, puellis, similia contingunt, et circumscriptam ac unius quasi plagae in cute chlorosin hae maculae praesentant. In tertia demum chloasmatis indicata vix specie sicut major interdum pruritus occurrit, ita volubilior macula-

la-

larum conditio, ac facilis in loca dissita transitio est. Sic *Clinicum* nuper adiit vir robustus *Institutum*, cui et pectus et axillae hac impetiginis a specie pridem undique obsessa, vix pallida hujus vitii vestigia offerebant; sed diuturna ad fauces, et ad palatum phlogosis, et magna deglutitionis difficultas successerant: quae ab illita thoraci cantharidum tinctura, revocato hic loci chloasmate, brevi mora disparuerunt.

§. 386. Quae ratio in gravida his maculis subsit, difficilis est quaestio. Nec enim menstruus, qui fluere hic desinit, sanguis acridinis prudenter accusari, — nec plethora, nec uteri, humorum circulo adversa moles, in morbi causam, apud omnes, et quavis praegnationis in periodo, revocari queunt. Ipse hinc uteri cum pelle consensus, et mirum nervorum hujus visceris in corpus omne imperium, hic attendi prae aliis merentur. Hac certe ex causa periodicus ille sub oculis *livor*, ac singularis in facie mutatio, mulieri, cui menstrua prorumpent, vel quae utero vix concepit, contin-

tingunt; et ex principio non alio, in puellis hoc fluxu privatis, quo tempore hunc expectant, tot in fronte tubercula, tot pustulae, maculae ad labra, ad mentum, efflorescunt. Sic ulcusculum in fronte feminae quadragenariae per duos fere annos conspeximus rebelle: cujus perfecta, ut videbatur, cicatrix, quotiescunque menstrua sat abundans successit excretio, iterum iterumque aperta est; atque sic non sanguinem ab utero repulsum, et copia peccantem, sed peculiarem ac periodicam hoc ex viscere in cutem faciei actionem, pertinacis ut causam ulceris, manifeste indicavit. Similia in *chloroticis* hinc inde occurrunt: ut quae, licet menstruis fere careant, minus tamen cruoris plerumque ob copiam, vel acrimoniam, quam ob singularem, atque symptomaticam in cute irritationem, pustulis ad superficiem crustosis obteguntur, quae veram, — non in sanguinis missione, non in rebus acrimoniae obversis, sed in solis corroborantibus, et restituto menstruorum fluxu, medicinam agnoscunt. Suppressas, quibus jamjam assuevimus, haemorrhoides, non absimili principio in cutem ope-

operari, suspicamur: et hoc quidem sensu, ex opposito sanguini venae portae ad *hepar* obstaculo, corporis interdum superficiem maculis, si ita lubet, *hepaticis* foedari concedimus. Interim non tam simplex forte chloasmatis *pseudoporriginis*, quam macularum in gravidis chloroticis, natura est; ac latens aliquando, quocunque demum in viscere, defectus, aut acre rheumaticum, scrophulosum, aut aliud, hoc porriginosum subinde ac inconstans in cute vitium generare valebit.

§. 387. Nullum gravidarum in maculis, nisi spontaneum, vel primos post menses, vel tardius, ex partu veniens, auxilium, — sed nullum quoque ex istis, nisi faciei defoedatae, est incommodum. Quin ipsa interdum foetus exclusio has in illis, quae saepius citiusque concipiunt, non delet maculas. Quod ex amenorrhoea, haemorrhoidumque suppressione procedit chloasma, hoc morborum, quos comitatur, insequitur: — vix auget pericula. Difficilior pleurumque *pseudoporriginis*, si ab acri incognito, viscerumque oriatur vitio, sanatio est. Nec haec  
qui-

quidem impetiginis species ad *leprae* quondam signa revocata non est.

§. 388. Nihil est, quod certas praegnantes his a maculis praeservet; et vix ullum habetur, quo praesens jam cutis vitium depellatur, auxilium. Nec enim causae ex utero in cutem imperantis indolem, modumque agendi tam bene perspicimus, ut internis hanc debellare queamus, vel sat tuto audeamus, remediis; et quae in illam vix reagit, externorum ad cutem applicatio, subsidii haud multum hoc rerum sub statu promittit. Baccarum lauri hic interim, si decorticentur, subtilis cum melle subactus pulvis, — vel unguentum (N. XLI.), quo facies a balneo illinatur, a quibusdam proponitur. Cum pomo subacido, aut citrino, per medium dissecto, aliae hic pellem, quo loco foedatur, quotidie perfricant; aut cum emulsione ex cannabis seminibus et lacte parata frequenter abluunt: quae singula remedia a nobis quidem, utpote propria hic experientia destitutis, nec laudari, nec tamen ut noxia damnari cum fundamento queunt.

Quae vel a partu supersunt, vel graviditatis sine causa oriuntur, maculae, hae, si languentium, aut suppressorum forte menstruorum, haemorrhoidum ex culpa propullulent: tunc sanguinis missione, hirudinibus, — interdum vero contrariis quasi, ac roborantibus auxiliis tolluntur.

Si viscerum forte obstructio, aut latens in humoribus acre, chloasmatis pseudoporriginis in causa videatur: tunc, pro varia istius indole, resolventia, antimonialia, mercurialia, antiscorbutica, vel demum alia indicantur, atque externis praemittenda sunt auxilia.

His vero aut praemissis, aut, si cutis modo in culpa sit, depositis, ad externa transgredimur tum allata jam supra, tum paulo fortiora, remedia. Hinc aut illud ex sinapi ( N. XLII. ), aut cantharidum emplastrum, aut unguentum ex mercurio ( N. XLIII. ) impetigini applicamus; atque irritatione moderata, et a causae morbosae stimulo diversa, subjectae pellis debilitatem auferre, agendi modum immutare, et alienam a sanitate secretionem corrigere, exsiccare contendimus.

ORD.



## ORD. I. GEN. II.

## E C C H Y M O M A.

§. 389. Succorum effusionem, *suggillationem*, *Ecchymoma* aut *Ecchymosis* significat: sed cum plurimas hoc nomen significatione tam lata aegritudines exprimeret, hinc modo sanguinis. ex vasis propriis sub cute effusionem, atque maculam in illa ex cruore transparente cum tumore plus minus conspicuo oriundam, hoc nomine intelligunt. In multis quidem cutis aut universae, aut in parte circumscriptae, rubor, naturalem superare, atque primo in casu *phoenigmum*, — in altero vero maculam, quam, forte congenitam, *naevum* nominarunt, constituere, observatur: sed, quemadmodum ille, ex vasorum sanguiferorum in cute teneriori. quantitate aut repletionem majorem, ac fere universali, — hic vero nunc ex structura cutis in parte, a naturali abludente, nunc ex retibus vasorum cutaneorum varicosis pendere videntur; ita *maculae morbosae* materiam in cutis telam cellularem, praeter naturam, effusam,



et colore suo a fluidis in sano homine hic loci excretis diversam, nunc liquidam, nunc vero densiorem, atque cum cellulosaë telae lamellis concretam, subesse testantur. Sic ex lymphâ coagulabili inter *corneas* transparentis lamellulas in ophthalmitide deposita ac solidescente, *albuginem*, seu *leucoma* explicuimus ( §. 150. ); atque sic ex quavis materia radios lucis aliter, ac serum sanguinis, ac humor lymphaticus ab hoc ipso solutus, vel quam aëps, reflectente, nunc sub epidermide, nunc ipsa sub cute stagnante, oriuntur maculae, quae, si cruoris secum commisti quid offerant, ad *ecchymoma* referri merentur.

§. 390. Haec vero species impetiginum ( §. 389. ) sine febre plerumque, ac sine dolore, incedit; interim nec ista ab ecchymomate perpetuo excludi, tum *petechiarum vibicumque* jam exposita historia ( §. 316. ), tum luxationum, vulnerum, inflammationum, ecchymosi junctarum, exempla demonstrant. Hinc pro morbi, *cum quo*, — vel pro causae, *ex qua* haec aut major, aut minus extensa, descendit, diversi-

ta-

tate, oportet esse diversa, atque nunc violentiora, nunc pauca ecchymomatis symptomata. Nec ipsius adeo coloris sat constans in isto natura est: sed, pro varia cruoris sub cute effusi quantitate, — pro loci, quo confluit, ab epidermide distantia, — pro materiae aut liquidae, aut congrumatae consistentia, — ac demum pro temporis, quo vasa dereliquit, conditione, color maculae nunc coccineus ac laetus, nunc profunde ruber, sublividus, aut niger, vel tandem viridis, flavescens, ac pallidus observatur. Pro ipsius vero cellulosaee telae inundationi cruentae aut resistentis, aut in longum latumque cedentis ratione, ecchymomatis tam figura, decursus, quam elevatio, durities, ac tensio variatur, et pro vasorum lymphaticorum, quae fluidiora in parte laesa resorbent, numero, libertate, actione diversis, humoris effusi et densitas, et color, et natura mutatur.

§. 391. Plures igitur ecchymomatum sunt formae: quae tamen, nisi causae diversae ratione, non tam *species* distinctas, quam *varie-*

tates offerre videntur. Sic certe color maculae aut ruber, aut niger, *ecchymosin* inter et *melasma* differentiam vix constituit; et *vibex*, alia, quam formae ratione, a *macula* nequaquam distinguitur. Frequentissime alterius modo *symptoma* est morbi *ecchymosis*, atque contrarios inter se corporis affectus constantia aequali comitatur. Ipsa certe inflammatio tum phlegmonosa ( §. 123. ), tum erysipelacea ( §. 283. ), cruoris in cellulosa, cum rubore partis, effusi exemplum largitur; ac in scorbuto, hydrope, febre tum intermittente, tum continua, in spurio aneurysmate, insignis macularum rubrarum, nigrarum est numerus: quae, licet *ecchymosi* consanguineae, ac origine consimiles, vix tamen sortem illius, methodumque medendi eandem sequuntur. Potissima hinc causarum in eruendis *ecchymomatis* speciebus est auctoritas; et ex illarum consideratione diversitas istius non obscure comparebit. Hae vero aut *externis* in corpus operantur, atque *ecchymoma traumaticum* nobis exhibent; aut, ab internis mutationibus orientes, *ecchymoma spontaneum*, quod alterius nunc morbi *symptoma*,  
nunc

nunc *primariam* aegritudinem constituit, praesentant. Frequentius, ac vulgo creditur, *internas* ecchymomata partes sine causis, externis circumdant; ac saepius, cum *intimam vasorum majorum* in cadaveribus examinavimus *superficiem*, ad cordis vicinias prae aliis, hanc undique et per longos satis tractus sine phlogosi *suggillatam* conspeximus. Post mortem forte haec magis, quam in vita, contingunt; nec ulla nobis, quae, sub ista, hanc vasorum affectionem, ut propria, comitentur, symptomata innotescunt. Frequentissima puerperarum in uteris, rudiori obstetricantis a manu, vel ab instrumentis sine cautela introductis, observatur suggillatio.

§. 392. Quaecunque vero aut partium, aut totius, *externa* laesio, contusio, concussio, distensio, compressio, laceratio, vulneratio, vasorum, superficiei non minus, quam viscerum, integritatem infringere, et canales sanguiferos aut nimis dilatare, aut penitus aperire, destruere, ac liquidi contenti vel in solam cellularem, vel in cavum vicinum, vel simul per

vulnus, effusionem excitare valebit. Quae tegumenta quidem penetrant, ac vasa plura, aut majora offendunt, sed cutem non satis aperiunt, aut vulneris oras collabi atque claudi mox sinunt, laesiones, — ut illae, quas instrumenta acuta, quas sclopetum, inferunt: hae, latiores non modo ecchymoses, sed partium tumores, tensionem, majores inducunt. Quae istarum magis tenorem, concutiendo, contundendo, afficiunt: hae nervorum sensibilitatem, fibrae carnae irritabilitatem, et vasculorum lymphaticorum actionem aut imminuunt, aut prorsus auferunt; atque effusi humoris corruptioni spontaneae, putredini, gangraenae sphaceloque, vel maxime favent.

Ad *internas* suggillationum causas referri praecipue merentur, quaecunque vasorum resistantiam a fluidis superari faciunt, ac eandem vel diminuunt, vel auferunt. Si humorum aliquando tenuitas hic subesse videatur, haec ipsa solidorum prius infracto tenori attribuat oportet. Hinc major sanguinis in vasa sua, vel a cordis imperio pendens, vel modo haec ipsa in parte quadam afficiens, impetus, hinc febris

vic-

violenta, exercitium musculorum immoderatum, tussis impetuosa, aut vomitus violentus, nixus fortior, contractio fibrarum spasmodica, oppletio vasorum et sanguineae excretionis suppressio, — hinc vel sola cutis suctio, vel cucurbitula superimposita, vel acris vicini subitanea ac major rarefactio, — hinc vasorum atonia, paresis, aut totius systematis vasculosi, et nervosi, ut in febribus malignis, debilitas, et nunc propria, nunc a consensu derivanda, inertia, — hinc demum suppuratio propinqua, vel ulcus, aut acris et corrodens, vel stupefaciens materia, praecipuam ecchymomatis rationem in se continent. Quanta sit *nervorum* in cute maculanda potestas, tum ex dictis ( §§. 274. 386. ), tum ex terroris ab incubo, a phantasmate, effectum et maculis in pelle, imprimis vero ex scrofi in strangulatis suggillatione, et ex morientium ecchymosibus, comparet.

§. 393. Ecchymomata *symptomatica*, ipsius morbi, ex quo nascuntur, discrimina, partim jam sub exanthematum historia exposita, sequun-



quuntur. Quae vero ex causis sibi propriis oriuntur, *primaria*: haec, istarum, ac loci, quem occupant, pro indole, — pro sanguinis effusi, vel liquidi, vel coacti, quantitate, — pro febris, aut inflammationis forte conjunctae ratione, — pro vasorum resorbentium, nervorumque in parte, quam tenent, integritate ac robore, exitus diversos, atque vel nulla, vel maxima interdum pericula agnoscunt. Hinc saepius ut *signum*, quam ut *morbus*, ecchymosis timenda; — et non tam color, quam origo macularum attendenda est. Qui vero, in cellulosam effusus, diutius hic stagnat sanguis: hic nunquam in *pus verum*, sed aut in propriam corruptionem, quae putrida est, cum gangraena partis abire, aut solidescere et cava cellularum delere, conspicitur. Mira interim naturae in his avertendis supersunt subsidia: ac si modo aeri accessus denegetur, ac partis affectae non labescat vitalitas, per longas saepe moras immutatus hic sanguis delitescit; ac tandem, licet, summe compactus, fere ligneam in parte, ut in scorbuto ad crura, duritiem inducens, inexpectato resorbetur, ac a massa cir-



culante, labe quavis immunis, reassumitur. Pertinacissima interdum, licet indolens, ad oculi albugineam ecchymosis occurrit, ac plures post menses vel sponte disparet. Diuturna quoque sub unguibus suggillatio, (*hyponichon*) esse solet, ac illorum corruptionem nonnunquam inducit. Neonatorum calvaria sub partu difficili, obliquo, aut vectis ab impetu, frequenter ecchymomate, et conspicuo tumore afficitur; qui, fluctuationem cum prodat, per cultrum apertus in mortem non raro terminatur. Sub aponeurosi effusi humores, nisi cito aut resorpti, aut sectione educti, febres, violentas inflammationes, deliria, convulsiones, ac mortem, hinc inde producant.

§. 394. Quae ecchymosis exanthematicae curationem concernant, ea satis a nobis (Lib. III.) exposita fuerunt; et quae alias suggillationes *symptomaticas* respiciant, haec ex morborum, quos comitantur, historia patebunt. In ecchymomate *primario*, tum febris ac inflammationis, si quae hoc ipsum circumdet, tum causae praecedentis, habenda est ratio. Si major par-

partis extensio, distractio, contusio, ecchymosin praedicant: tunc cita illius in frigidam immersio, fomentatio cum nive, aut cum glacie contusa, ac interdum compressio, suggillationem ac tumorem avertunt. Si ipsa sub venaesecione in cellulosa subcutaneam sese cruor infiltret: tunc fasciae detractio, ac brachii, seu pedis, in situm, in quo, cum cutis incidebatur, haerebant, repositio indicatur. Sub ipsius ecchymomatis a causa externa pendentis praesentia, in robustis ac plethoricis hominibus venaesectio praemittenda; ac, nisi inflammatio et partis laesae jam tumor ac durities impediant, fomentatio cum posca, sale ammoniaco et nitro, vel acetum lithargyri, saccharum saturni, cum frigida, et alcohole, — vel radicis bryoniae recentis rasura, cum aequali spiritu vini portione, conducent. Si fortior contusio, aut ictus sclopeti, partis, quae suggillatur, vitalitatem imminuerit: tunc calida et spirituousa fomentatio cum sale ammoniaco et aceto requiretur. Si major forte sanguinis, quam quae commode resolvi, ac prompte resorberi speretur, copia, aut cruor in grumos


toactus, sub cute integra, vel parvo tantum, aut jam collapsio vulnuscule perfossa, vel sub tensa aponeurosi, stagnaverit: tunc pellis, aponeurosis, sine mora incidenda, aut vulnus dilatandum, vel profundae satis scarificationes, ut liquidum cruentum exstillet, ac tandem externa, quae diximus, remedia, et fasciae comprimentes, in auxilium trahenda sunt. In casu majoris a sanguine in tela cellulosa putrefacto corruptionis, ea, quae ad gangraenam commendavimus, auxilia (§. 136.) indicantur. Nec tamen ob atrum ecchymomatis colorem, de gangraena imminente mox cogitandum est. Nigrimum undique abdomen, sclopeti, quo scrotum perfossum erat, ab ictu, observavimus. Huic phaenomeno accesserunt et vomitus copiosus, et singultus sonori, et summa anxietas. Ter interrim venam aperiri, fomentationes aromaticas cum vino et aceto calide imponi, et mox largam opii dosin imperando, nigredo ventris in viridem, ac tandem in flavum, pallescentem, colorem mutata, et sanitas moribundo, ut credebant, homini restituta est. Apud teneros calvariâ a partu suggillatos infantes sectionem

hac in aetate vix innocuam, vini spiritus cum camphora, infusum aromaticum, vinosum, et calor aequalis, per impositum tumori gossipium obtinendus, supplebunt.

Quod ecchymoma *spontaneum* concernit, si menstrui forte, aut haemorrhoidum excretio impedita suggillationem induxerit, adaptata morbi causae auxilia conveniunt. Si spasmodica macularum observetur origo, tunc opium cum potu aromatico ac haustu salino propinandum, cutis mador aut sudor lenis excitandus, ac tepida fomentatio ex infuso chamomillae, roris marini, salviae, cum sale volatili et opio, exterius imponenda est. Quae sanguinem stagnantem *specificè* resolvant, vix noscuntur remedia, et *arnicae* hoc in casu adscripta virtus, ab irritante, vasorumque lymphaticorum actionem augente principio pendere videtur. Vix aliquid a *calaguallae* ab *Hispanis*, et nuper apud nos, laudatae radice exspectamus. Si major in parte vasorum inertia ecchymoses inducat: tunc corticis Peruviani decoctum cum vino, vel aqua calcis, vinum camphoratum ( N. XL. ), unguentum cum sinape ( N. XLII. ), tinctura

can-

cantharidum, vel emplastrum ex istis, conducent. Si forte primis in viis, prout exanthematum occasione jam monuimus (§. 274.), sigillationis in pelle causa latuerit: tunc emeticum, aut purgans, quod istam evacuet, ac resorptionem simul augeat, indicabitur remedium.



## ORD. I. GEN. IV.

## ERYTHEMA.

§. 395. **N**on sine taedio morbum cutis, quem *Erythema* appellant, et cujus sub *erysipelatis* descriptione mentionem jam injecimus ( §§. 280. 285. ), ab ista tam affini aegritudine divellimus, et alii morborum classi subordinamus; sed haec est *impetiginum* conditio, ut cum *exanthematum* saepe confluant et ex hac ipsa orientur familia ( §§. 275. 315. 316. ): quo in casu, si, ob communem in multis originem, similitudinis quid maternae retineant, non tamen ideo aut sine ordinis desiderati laesione, aut curationis sine damno, cum illa confundi mox queunt. *Erythematis* igitur nos titulum ad *chronicam* cutis efflorescentiam referimus: quae *erysipelati*, externo habitu, simillima ( §. 279. ), eodem tamen constantior, aut frequenti reditu importunior, hujus quidem, si ita lubet, *habitualis*, *apyretici* denominatione, ut ipsi nos fecimus ( §§. 285. 290. ), potest insigniri; sed ad *impetigines* melius, istarum ut

genus, quod *guttam*, ut vocant, *rossam* pro specie agnoscat, referri meretur.

§. 396. *Erythema* hinc est macula superficialis; a cutis phlogosi non febrili, vel in longum extendi solita, vel habitudinis lege recurrens, cum rubore, aut colore ex rubro flavescente, a compressione albescens, cum pruritus, ardoris, tensionis sensu, tumore plerumque parvo, diffuso, suppurationis, saltem benignae, experte, cute frequenter levi, pustulis interdum obsessa, frequentius ab epidermidis in furfures separatione exasperata.

§. 397. Nunc vero partem fere semper eandem, nunc aliam; atque aliam, erythema infestat. Frequentius hoc ad faciem et crura, quam aliis in partibus, non tamen raro et in istis, efflorescit: atque cum in illa, cum ad nasum praecipue, vel ad genas, frontem, aut mentum, rubore profundo; fere livido, ingrante splendente, interdum pustulis intermistis, longo tempore, sine magno saepe pruritu, aut incommodo, comparet, insulso satis nomine



*gutta rosea* appellatur ( §. 399. ). Quae ad manus et pedes praeprimis, vel ad aures nasumque, a frigore praegresso, oriuntur, — insigni, quavis hieme redeunte et a calore lecti aut ignis vicini adaugendo pruritu instructae, maculae: hae conspicuos, ac in taediosa cutis ulcera satis pronos, tumores in multis efficiunt, et *perisionum* sub nomine ad erythema revocandae sunt. Nec minus huc spectat cutis, ad *phias*, quas, apud infantes, praecipue ad collum, axillas, aures, inguina, nates, ad poplites, efformat, lenta et in partis exulcerationem inclinans phlogosis, et cognita *intertiginis* sub nomine affectio.

§. 398. Vix magnis hoc morbi genus, nisi forte a superficie repulsum, symptomatibus se prodit. Interdum quaedam anxietas, morositas, torpor, horripilationis et caloris interni sensatio, praecedunt. Haec, levis in parte tensio, calor, aut pruritus insequuntur. Mox cutis rubor aut floridus, aut profundus, plerumque pallidus, comparet, qui, cute compressa, aufugit; liberata, revertitur. Tumor quidem,

si *pernionem* excipiamus, vix ullus, nisi planâ, et late diffusa pellis elevatio; interim a frequente erythematis accessione cutis ipsa crasset, induratur, molemque informem et acquirit et retinet; aut pustulis hinc inde obsidetur, quae tenuem acremve ichorem fundere, atque irritantibus male tractatae, ad nasum praecipue, carcinomaticam interdum naturam assumere, cernuntur. Diutius erythema, quam erysipelas, persistit; ac in multis per vitam, nasi, genarum regionem non dimittit; aut facile, ac fere periodice, sine ullius caeterum functionis laesione, recomparet. Non ubivis, sed plerumque, cuticula arescit, ac terrei coloris in furfures tenuesque squamulas separatur; maximeque partis sensibilitas, ac prona in malum idem dispositio, relinquitur.

§. 399. Sicut erythematis natura ab illa erysipelatis, — ita causae utriusque mali non multum, nisi violentiae, atque constantiae ratione, inter se differunt. Originem scilicet, nisi forte *internam*, a frigore, ab urinae, faecum, transpirationis acrioris reliquiis, a fu-

catis saturno linimentis, pulveribus, — plerumque perennem ac rebellem erythema agnoscit ( §. 288. ); mulieres, senescentes, iracundos, tristes, bibaces, debilesque homines frequentius, quam alios, invadit. Ex menstrui, haemorrhoidum suppressione, ex pedum, axillarum suppresso sudore, ex viscerum infarctu, ex acri latente, specifico, ut quondam, *leproso* ( §. 459. ) aut alio, ex spirituosorum abusu, ex frigore majori extremitatibus admoto, et adhibito mox istis ab igne, ex cutis debilitate, irritabilitate morbosa, locali, interdum nativa, frequentius hic morbus descendit. Ex matre, crurum ulceribus perpetuo fere obnoxia, filium, et ex ista nepotem, cum cute pedis, in illo dextri, in isto vero sinistri, ad malleolum crassiori, tensione, calore ac aliquo rubore frequentius affecta, observavimus. Qui Baccho indulgent, hi ad nasum praecipue, ac in vultu, perpetuo rubore pustulisque frequentius notantur. Haec diuturni species erythematis, si per lentem examinetur, ex vasculorum, quae cutem innumera percurrunt, minimorum habitu *varicoso* principium, remediis

diis rebelle, agnoscit, atque hinc *erythema varicodes* a nobis nominatur. Similis interdum a *variolis* ad mentum relinquitur macula, quae nitidam puellarum faciem saepe nimis defoedat. *Intertrigo* puerorum, hominumque adipatorum, ex cutis inter plicas immunditiae originem sine dubio in multis agnoscit; sed certe *lymphaticorum* vis insignis *vasorum*, qua in partes sibi appositas et vicinas *erosionis* actionem exercent, quamplurimum huc facere nobis videtur.

§. 400. Diversam erythema, pro varia morbi causa, medendi methodum expostulat: quae partim ex dictis de erysipelate habituali ( §. 290. ), partim ex regulis, quas ( §§. 388. 394. ) tradidimus, eruenda est. Rarius ac in erysipelate, venaesectione hic confert. Interdum cucurbitulae scarificatae conducunt; sed in causas magis, et quae aequali humorum circulo in visceribus, et excretionibus naturalibus, aut solitis resistendo, corporis ab illis inundari faciunt superficiem, respiciatur oportet. Hinc res solventia frequenter, et ea, quae menstruo-

h 3                      rum,

rum, hæmorrhoidumque fluxum, quæ sudorem naturalem, licet copiosum in multis et foetore ingratum, ad pedes, axillas restituant, — maxime vero prudens animi pathematum directio, sobrietas, ciborum acrium, aromaticorum, potusque spirituosus fuga, — tum ea, quæ intestina a collecta forte saburra, aut bile acri liberent, leniora ac repetita evacuantia, semicupia, — aquarum mineralium, martialium usus, rectumve corporis exercitium, potissimam hic opem largiuntur. Eadem, ac in erysipelate ( §. 290. ), cum cautela, externa subministrentur oportet remedia: in locali tamen affectu, et si forte sola cutis laxitas, aut nimia sensibilitas, erythemati pro causa subesse videantur, tunc proposita jam alibi ( §§. 382. 388. ) auxilia prae aliis conducent. Ad *perniones*, in hominibus alii lymphæ vitio, ut scrophuloso, scorbutico, subjectis aliquando sat maligno, et ad ulcera impura, ipsamque subinde gangraenam dispositos, ab extremitatibus avertendos, tam frigus nimium, quam subitanea partis ab isto correptæ calefactio, evitanda sunt. Incipienti vix malo, affecti

cti membri in frigidam repetita immersio, frictio cum nive, fomentatio cum aqua, alcoholis portioni remixta, cum aqua marina, aut cum spiritu terebinthinae, cum puro vini spiritu, aut cum muria, salis ammoniaci volatilis portione superaddita, conducit. Si haec adhibendi jam aufugerit occasio, et dolor fortis et phlegmone partem occupent: tunc impositum gossipium oleo olivarum recenti imbutum, emolliens fomentatio, cataplasma anodynum, interdum venaesectio, scarificatio, hirudines, succus hyoscyami assidue illitus; — si forte minor hic phlogosis, sed major subsit partis affectae laxitas, — fomentatio cum decocto herbarum aromaticarum vinoso, aut cum vino, et aequis portionibus aluminis ac farinae, indicantur. Si evitari hac in parte suppuratio non queat, fugienda sunt, quae partem ultro debilitant, cataplasmata emollientia; ulcusque fungosum cum unguento digestivo, cui mercurius praecipitatus ruber commistus sit, potissime tractandum est.

Ad *intertriginem* curandam summa cutis mundities, et frequens cum frigida, plicas inter,

suscepta lotio, deterasio, auxilium suppeditant: sed in pinguioribus, et quibus cutis tenerior est, pueris, nisi haec ipsa linteo, aut filis mollioribus, aut pulvere farinae, lycopodii, cretae, cerussae, plicis cutaneis interpositis, a mutuo contactu praeservetur; superficiei erosio; exulceratio evitari vix poterunt. Si haec ipsa apud infantem jam diutius continuaverit, tunc usum externorum et hic loci circumspectum esse oportet. Ad *erythema varicodes*, praeter allata, acetum destillatum cum quinque fere partibus aquae purioris, vel saccharum, acetum saturni cum frigida remixta, — et si forte tubercula simul cutem obsideant, unguentum saturninum, vel rubrum mercuriale ( N. XLIII. ) conducent.





## ORD. I. GEN. V.

## VITILIGO.

§. 401. Cutis firmitas, mollities, crassities, flexibilitas, aequalitas, in variis non modo animalibus, pro speciei, sexus, aetatis, coeli ratione diversa sunt; sed et ipsos inter homines, aetate, sexu sibi similes, et partium, quas circumdat, et temporis, et valetudinis respectu, quamplurimum differre observantur. A nativo scilicet hujus organi contextu, ab atmosphaerae, vestium, et rerum caeterarum, externa, interna in cutem actione, a musculorum huic ipsi suppositorum exercitio, imprimis vero a *telae cellularis*, quae pellem cum partibus colligat, laxitate, firmitate, repletione diversis, haec singula dependent; et mutua communis involucris *cohaesio*, cujusvis partis, quod propria vi sua non posset, et formam et habitum determinat. Hinc telae cellularis lamellis pellem inter et partes alias aut firmiter contractis, concretis, aut modo quovis destructis, aut propriis demum succis, imprimis ad-

pe,

pe, privatis, ingratas oculo mox cutis in foveas collabitur, morboso nexu cum ossibus aut musculis concrescit, tenditur, corrugatur, et amoeno nitidoque colore spoliatur in totum; et hinc abolito semel vel a vulnere, vel a laceratione, suppuratione, cutis nexu, prompta licet istum *cicatrix* restituat, foeda tamen et vix unquam delenda superficiem macula infestat: quae depressa, inaequalis, varioque et a sano abludente colore notata, aut et pluribus hujus indolis stigmatibus conflata, aliquando exsanguis, et insensilis, *vitiliginem*, licet eadem haud apud omnes significatio huic nomini tribuatur, constituit.

§. 402. *Vitiligo* igitur nobis maculam, aut macularum minorum congeriem in corporis superficie significat; quae, mutata a causis vel internis, vel externis, cellulosa subcutanea vel integrae, vel exesae, actione, cum pellis aliqua depressione, naturalem istius colorem, mobilitatem, laevitatem, sensilitatem, et functionem hoc in loco, aut ex parte, aut in totum pervertit.

§. 403.

§. 403. Nunc vero cutis hoc vitium in eadem sola generatur, et non tam partium internarum, aut humorum a sanis aberratione, quam ex propria pellis affectione, producitur (*Vitiligo primaria*). Nunc alio a morbo, et ab acri in cellularem subcutaneam, vel in cutem deposito, *symptomatice* exoritur (*Vitiligo secundaria*, carcinomatosa, leprosa, scorbutica, venerea, scrophulosa etc.). Utraque ex istis nunc *sicca* est, nunc *humida* ichorem foetentem et acerrimum protundit: qui ipsam, ex qua distillat, cutem aggrediens, epidermidem in furfures ac in squamas comminuit et separat (*Vitiligo squamosa*); vel pellis superficiem exulcerat, pilorum bulbos, quod et *sicca* interdum *Vitiligo* jam facit, infestat, colorem habitumque immutat, aut prorsus e cute evellit (*Vitiligo ulcerosa*).

Ipse vero hujus impetiginis (§. 402.) color interdum fere *lacteus* aut et *niveus*, aut superficialis modo; aut profundius demersus, ac pilos albos, lanuginosos ostendens, habitu fere subaspero, vel ut quaedam quasi guttae dispersae videantur, — subinde umbrarum in modum

dum *nigrescens*, squamulis obtectus et pruriens, eandem a Graecis, Arabibus, curiose nimis distingui, ac primo in casu *alphon*, *morphoeam albam*, — in altero *melan*, *morphoeam nigram*, vocari induxit. Vitiligo demum *cicatrix* est macula nunc depressa, nunc aspera, quasi consuta, a continui laesione, et praegressa ut plurimum suppuratione, post illius reunionem, relictæ.

§. 404. Vitiliginis origo ex dictis (§. 401.) quodammodo elucet. Quidquid scilicet aut cellulosam sub cute telam delere, destruere, ac pellem arctius cum carne, aut ossibus connectere, aut naturalem hujus involucri communis contextum in se ipsum contrahere, et sanguinis influxu, aut nativa sensibilitate privare potest, hoc vitiliginis ad causas pertinebit. Materno subinde ex utero, quasi dissectae ac resanatae cutis, aut vitiliginis amplioris, *naevorum* iterum sub nomine, vestigia depressa comparent; et famosa sunt vetularum *stigmata* multarum, quae superstitionis injuria, cum ab acu perfossa nec sanguinem effunderent, nec do-

dolorem sentirent, pro *sagis* illas, rogoque dignis veneficis, declarari jam pridem fecerunt. Ad abdomen mulierum, quae saepius pepere-  
runt, non simplices modo rugae, sed maculae albescentes, cicatricibus fere similes, atque cuti profundius impressae, nascuntur: quae istam hinc in plicas relaxatam, illinc arctius cum musculis subjectis concretam, ostendunt.

Quod si tamen illarum vitiliginum, quae a suppuratione, a vulnere, ulceribus, variolis, compressione diuturna in utero, aut a cutis nexu cum subjectis partibus vitioso, oriuntur, non difficilis intellectus sit indoles: fateamur oportet, illarum, quae fere *sponte*, pluribusque simul in locis, ad pellem nascuntur, disparent, revertuntur, et morbum gravissimum vix superabilem vel praenunciant, vel ipsaemet constituunt, obscurissimam esse vitiliginum originem. Cum vero tum istae, tum aliae difficultates, ad *lepram* magis, quam morbi praesentis historiam, pertineant, sub illius descriptione (§. 454.) hanc iterum quaestionem pro viribus tangemus.

§. 405. Si a leprosa, carcinomatica, aliaque symptomatica praescindamus vitiligine, nulla quidem a caeteris speciebus pericula, — sed curationis difficultates forte aequales expectandae sunt. Nec enim exesam sub cute cellulosa sic affectis restituere, aut morbosas cutis adhaerentias, et male tractati vestigia vulneris, nisi talia ope chirurgica avertendo, delere valemus. Indelebiles a confluentibus; et a malignis *variolis* ad nasi, menti, genarum confines, et ab *ulceribus venereis* circa pudenda, et a *scrophulosis* ad jugulum ac faciem, vitiliginis generantur.

§. 406. Vitiliginem a vulnere, aut a phlogosi cutanea instantem praeveniunt: illius, recentis, reunio sat prompta, aequalis, et integra, inflammationis majoris, suppurationis aversio. Quae a puris vel sub cute adhucdum illaesa, vel in abscessu aperto, aut in ulcere collecti effectu, et a cellulosa subcutanea concretionem, consumptionem timetur vitiligo: hanc, pro varia materiae illinc haerentis acredine, et pro loci, quo colligitur, indole, prompta

pta maturatio, puris, ichoris latentis evacuatio, ac cita demum et aequalis cicatrix, moderabunt. Jam factam ab his causis vitiliginem, nunc oleum, balneum animale, fofus emolliens, vapores ex aceto et aqua, — nunc blanda et frequens cutis collapsae agitatio, sublevatio, dilatatio, — nunc aliqua in parte sana, circa maculam, compressio, — nunc sicca huic ipsi hinc inde apposita cucurbitula, aut frictio, et quae vasorum, nervorumque hoc in loco vitam excitent, conducunt. In vitiligine *secundaria*, remedia morbo ipsi, ex quo haec scaturit, adaequata indicantur. In humida, aut in squamosa vitiligine, tum alia atque alia, ratione causae, subsidia, tum ea, quae ( §§. 382. 388. 400. ) proposuimus, auxilia tententur.





## ORD. I. GEN. VI.

## ALOPECIA.

§. 407. Quo loco pars corporis, quam pilis natura obtexerat, hac veste animali, fere plantis parasiticis non absimili, spoliatur: eo nascitur non vera quidem in cute ipsa macula, sed humanae superficiei decorem offendens et morbosa mutatio, quam Graeci *Alopeciam*, *ophiasin*, *aream* Latini, dixerunt. *Alopecia* sub qualibet figura dilatatur; si vero in longum et tortuose inter capillos area proserpuit, *ophiasis* tunc nomen a Veteribus obtinuit. Si forte incipit, vel omnis calvaria capillis priventur, *calvitiam* salutant.

§. 408. Ipse quidem pilus sine sensu rescinditur, sed praecipua, quae volatilia, dum plumas, — quadrupeda, cum pilos quotannis deponunt, patiuntur symptomata ( §. 373. ), et gravissima ab evulsis vibrissis mala, — et mentis in soporosis per pilorum evulsionem excitatio, — et istorum a summo furore erectio,

ctio, — a morbis certe, ac, si fides est historiae, a terrore canities, nervorum in bulbos sub cute pilis concessos imperium non parum demonstrant.

§. 409. Hinc et fortior cephalaca, et febris nervosa ( §§. 87. 88. ), et puerperii incommoda, pilorum defluvio favere cernuntur. Ob ignotam corporis conditionem, in certis familiis praematura constanter calvities occurrit. Quo loco viscida et oleosa cellulosam, folliculis copiosis stipatam, impraegnat materia, hoc major latiorque pilorum proventus est; atque hinc auctis sub febre quavis calor, et quae hoc smegma adipemque consumunt, exsiccant, tabes, senectus, ignis a ferro crispandis capillis admoto in cutem frequenter agens, pilorum jacturam inducunt. Acre quodcunque, imprimis venereum, leprosum, purulentum, atque aliae, quae cutis contextum, ut pediculi, tinea, profundius corrodunt, exulcerant causae, in teneros pilorum bulbos agendo, calvitiem aut areas relinquunt: ex quibus apparet, pellis magis

culpa, quam vitio pilorum, alopeciam in multis oriri; hancque ipsam pro aliorum saepe magis symptomate morborum, quam pro morbo primario, esse habendam. Plerumque certe a parte, quae pilos, non aetatis, sed morbi ratione, amittet, epidermis in furfures delabitur, aut acris ex area destillat humor; aut demum cutis glabra colore mutatur, et subsidet, vel subpinguis et densa tumescit. Interim non ita pridem vir juvenis se nobis ob *alopeciam universalem* conspiciendum exhibuit, cui, si luem veneream tredecim jam ab hinc annis superatam excipiamus, morbosi vix quidquam in vita nec acciderat, nec sub examine inesse videbatur; licet per *menses* jam *duos* sibi barbam protinus decidisse, capitis, ciliorum, pubisque pilos vix non omnes defluxisse, et unguis manuum emortuos, ac sicca quasi carie exesos ostenderet. Vox erat immutata; potentia coeundi, in homine uxorato, a pristina non diversa; ac omnia, excepta debilitate a paucis modo diebus accusata; de illaesa valetudine testimonium edebant.

§. 410. Pro causae, quae alopeciam, aut ophiasin produxit, differentia, judicium hoc de morbo, vel morborum magis signo, diversum est. Quae senem calvitiesprehendit, aut quae bulborum destructionem agnoscit affectio, haec artis superior est subsidio. Simile de alopecia, quae elephantiasin comitatur, aut indicat, feratur judicium. Cute licet detracta, capillus renascitur interdum; quem vero cicatrix locum defoedat, hunc pilus nec unquam ornabit. Quod lues venerea, aut tinea induxit capillorum defluvium, hoc, morbo primario per artem devicto, novae spem comae relinquit. Si pallida, aut insensilis est area, nec adhibita frictione rubescit, tunc ab arte, ut in ipsa *morphea*, vix quidquam praestabitur.

§. 411. Nemo certe Mortalium, quo cutis loco pili radix non subest, aut quo haec ab acri exesa, consumpta fuit, eo crines per artem educet. Cum vero praesentis forte sub cute bulbi propriae, ob quas pilus a sua radice secedit, affectiones nos lateant; hinc facile intelligitur, cur nullibi tam empyrice, quam his

in rebus tractandis et versati sint Medici, et versari vix non ubique debuerint. In symptomatico pilorum defluvio, morbi, qui huic ut causa subest, curatio instituenda est. Caeterum, quae pellis pilosae integritatem, nutritionem, munditiem, transpirationem aequalem, ac robur concernunt, et nimiam irritationem, sensilitatem, debilitatem, siccitatem, ab eadem avertunt: haec crines, et ex quibus nascuntur radices seu bulbos conservare, ac amissos jam pilos resarcire, experientia confirmat. Hinc locorum, quae pilis ornantur, mundities; sudorum, pinguis, viscidaeque materiae, quae illos conglutinant, et acridinem conspicuam mox contrahunt, sollicita abstersio; ferri calidioris, quo crines crispantur, et farinae, quam his inspergunt, corruptae, aut cum calce, vel oleis acrioribus copiosius remistae, fuga; frequens pectinis et levis frictionis, tum unguenti blandioris, cutemque subjectam lubricantis; usus; pilorum jam nimis longorum, extenuatorum, aut in apice fissorum, recisio, commendari merentur. Nil melius est, quam novacula quotidie radere, quia, cum paullatim sum-

ma pellicula excisa est, adaperiuntur pilorum radicae. Neque ante oportet desistere, quam frequentem pilum nasci apparuerit. Labentes ob nutritionis necessariae defectum, vel ob debilitatem, — per alimenta facilia, frequentius subministrata, aut per roborantia restituimus pilos. Acre specificum, aut aliud, quod pellem infestat, remedia sibi propria alibique tradenda exposcit. Ab adstringentibus vix tanta expectamus remediis.



## O R D. II.

## IMPETIGINES DEPASCENTES.

## G E N. I.

## P O R R I G O.

§. 412. **I**nter eas impetiginum species, quae cutem non modo commaculant, sed superficiem simul depascuntur ac lambunt, *Porriigo* hic primum spectanda est. Hanc vero ad capitis integumenta, non caeteram ad pellem, reducere complures non satis apte, ut videtur, maluerunt: ut quae ad illa quidem interque capillos, imprimis densiores, frequentius, — sed certe et ad supercilia, et ad barbam, ad alas, et pubem, et in omni, qua patet, superficie, corpus defoedat; nec ratio est, cur in ista, quod ad caput *porriigo* est, hoc non diversum, nisi gradu ac loco, malum, *lichenem* appellemus; aut quod in pelle affecta *humiditatem* ostendit, hoc, ob istam, ad *herpetes* reducamus.



§. 413. *Porrigo* hinc erit, cum epidermis a cute aspera, nunc furfuris, nunc squamularum sub specie, praevio plerumque pruritu, citra manifesta vel phlogosin, vel papulas, vel vesiculas, vel ulcuscula, copiose resolvitur; et pellem nunc siccam, nunc acri, vel et foetido humore madentem, subtumidam, nunc pallidam, nunc ex luteo rubescentem, denudat.

§. 414. Ex his ( §. 413. ) apparet, non parvam hanc inter affectionem, et *erythema* vel aliorum ( §§. 280. 285. ), vel nostrum ( §§. 395. 396. ), affinitatem subesse. Interim nec tam derepente *porrigo* invadit; nec rubor partitis adeo in ista conspicuus, nec dolor ardens, aut calor magnus, ut in illo, separationem epidermidis praecedunt: sed modo pruritus, interdum vix ullus, aut tensio, ac levis dolor in cute affecta occurrunt, quae decidua modo cuticula, et cum frictio adhibetur, rubicundior apparet. Nunc ad parvam modo plagam *porrigo* quasi *fixa* limitatur, atque vel incertam, vel *circularem* omnino, cum centro rubente, figuram assumit; nunc *volatica* et inconstans est,

aut ad vicinia dilatatur ac proserpit ; nunc certis fere anni periodis recurrit ; nunc *universalis* ac *congenita* a quibusdam Scriptoribus , et , magno certe exemplo , in septem ejusdem et sanissimae familiae prolibus a nobis observata est . *Internam* quoque dari porriginem , licet tunc furfures sub forma *sicca* separari non queant , complura nobis persuadent . Sub aphthis certe , quae stomachum , intestina obducunt , epidermis nunc illarum sub habitu , nunc in squamulas et quasi furfures comminuta , per alvum secedit ( §. 365. ) . In dysenteriis , ac drasticorum effectu , licet materia puriformis , coagulabilis alimentari a tubo morbose secreta , hic interdum solidescat , et membranae sub specie per anum ejiciatur : intestinorum tamen villosa interdum ab istis separari , ac furfuris levioris sub forma per alvum excerni videtur . Quod *scabiem vesicae* Antiquitas vocavit , hoc in furfure copioso ac levi in urinis suspenso , ab aegrotante hoc viscere excreto consistit . Sub catarrho tracheali , et sub specie illa cynanchis , quam *trachealem* appellavimus ( §. 173. ) , nisi ipsa epidermis , similis saltem huic  
pseu-

pseudomembrana, aut integra, aut squamularum furfurumque sub specie, in sputis compareret. Quod si quidem haec a quavis, et plerumque ab erysipelacea, superficiei secernentis inflammatione leviori contingant: fateamur tamen, quod porriginis a causis, his locis admotis, non absimiles effectus oporteat oriri; et quod nunc herpes, nunc porrigo, pro externis, quas derelinquunt, internas in trachea, in bronchiis, in vesica, etc. sibi sedes nonnunquam eligere videantur. Sed et causae ratione in porriginē diversitas occurrit: quod scilicet mali genus nunc cutis e vitio *primarium* existit; nunc indolem ab aliis distinctam, *symptomaticum*, ostendit, et significationem diversam assumit. Sic ipsam elephantiasin praevia haec quondam praesagiebat impetigo, nec rarum est venereae hoc signo prodi luis praesentiam; et in genere porrigo speciebus se aliis impetiginum frequenter adsociat.

§. 415. Potissima porriginis sedes capillata pars capitis est, ac neonatis infantibus, quo tempore capilli emergunt, epidermis in densas

ac duras saepe squamas elevatur, et sub intenso pruritu in furfures copiosos resolvitur. Cephalaea in adultis quibusdam vehementior nonnunquam periodica, praecurrit, et furfure permulto inter capillos decedente terminatur. Post febres, praecipue nervosas, petechiarum sub decursu interdum, sese capitis manifestat porrigo: quam defluvium capillorum non raro comitatur, aut sequitur. Qui, pelle subtiliori instructi, rudiori verni temporis atmosphaerae se exponunt, aut, lota vix facie, sicciore frigidoque a vento perflantur, his epidermis sine pruritu in farinas dehiscens mox vultum deturpat. Ad tibias frequenter, ac fere sine pruritu aut rubore, epidermis in furfures secedit, et ad inguina scrotique confines similia cum scalpendi desiderio quibusdam contingunt. In ea, quam supra tetigimus ( §. 414. ), familia, epidermis in tribus ex pueris continuo cutem asperam, duriolem, quercus cortici non multum absimilem, ac sulcis notatam, ex luteo rubescentem et siccam, sine quovis dolore, aut pruritu, in albidas farinas conversa obsidebat. In tribus ex sororibus non tanta,

ac in quarta et juniore, cutis erat asperitas; sed frequens in parte nunc ista, nunc illa, porrigo. Una quidem ex illis, rachitide affecta, gibbosa, capite praegrandi ac infirmi, asthmate ac strumis, mente simul imbecilla, laborabat. Ex pueris unus a phthisi pulmonali enectus est; ab asthmate alter, — ac tertius hypochondriacis affectibus, adhucdum tenentur.

Plerumque partes, quae porriginē laborant, siccescunt ac asperae tanguntur; saepe interim sub squamulis ichor paucus, lymphaticus, sub specie madoris, ex cute integra scaturit: quin diversa, ob id, mali utriusque natura sit, aut *liebenis* illinc, hic vero *porriginis* magis nomen conveniat. Vel in ea ipsa, quam *siccā* appellant, affectione furfures tam copiosi apud multos secedunt: ut, nisi lymphaticus, qui hic continuo per morbum secernitur, et mox ab aeris actu vel sponte solidescit, liquor suppleret, epidermis non sufficeret. Quo loco squamulas, ne prompte decidant, capilli prohibent, eo tenax, sub illis collectus, ichor hos conglutinat, corrumpitur, et acredine, quae sub-

subjectam saepe cutem arrodant, instruitur. Ali-  
bi tenuis, et in furfures mox abitura, hoc ex  
liquore crusta generatur.

§. 416. Ex illis, quae (§§. 414. 415.) di-  
cta sunt, jam plures porriginis causae elu-  
cent; et qui cutem inter et epidermidem nexus  
intercedit, hic certe ob rationem non unam  
aboletur. Nunc etenim liquida vel ob vasculo-  
rum cutaneorum lacerationem, erosionem, —  
ob infractam resistentiae potentiam, vel ob  
morbosam, ex haerente hic stimulo, secretio-  
nem, sub epidermide effusa, nec promptius re-  
sorpta, hanc ipsam a cute divellunt, et in pun-  
ctis nunc minimis, nunc largas per plagas, aut  
in miliares hydatidulas phlyctaenas, aut in am-  
plas vesicas ac bullas attollunt: quae, diffuen-  
te, vel denique consumpto humore, arescunt,  
ac tenuis lataeque pelliculae, aut squamularum  
ac furfurum sub specie, a cute separantur;  
nunc vi morbi continuo, uti arborum e cortice  
*gummata*, exsudans humor lymphaticus ad par-  
tis, quam inundat, superficiem dispersus, ex-  
panditur; in alteram novamque epidermidem,  
aut



aut crustosum, informe operculum ab atmosphaerae attactu solidescit, inaequaliter siccatur, mox finditur, retrahitur, separatur, ac farinosum in pulverem fatiscit. Si nullus in porriginē *sicca* humor stillari dicatur, potius intelligendum est non satis exstillari, ut cutem tactui madidam offerat, difflato prius, aut solidescēte humore, quam cuticula decidat.

Quaecunque hinc causae in cutem, aut in rete mucosum agentes, et istorum cum epidermide nexum dissolvunt, et, proprio in pellem stimulo, loco tenuis, subsalsi madoris, liquorem in coagulum proniorem, morbosum, acriorem, aut et foetidum excerni, aut aliunde huc deponi faciunt: eae *porriginis* tum primariae, tum illius, quae caeteras impetigines, exanthemata non pauca comitatur, rationem largiuntur. Non igitur specifica hic materia, aut praevium semper in humoribus vitium, et criminis ubique Veteribus damnata bilis; sed vel acre, nunc illud, nunc istud, — vel, mitior lentiorque erysipelate, ac herpete ( §. 420. ), aut pellis aut reticuli mucosi phlogosis, — vel glutinis nutrientis in cute aut. copia,



pia , aut defectus , — vel morbosa in pellis.  
 contextu sensibilitas ac perversa secretio , —  
 impedita cutis, ob pilos numerosos, aut spurci-  
 tiem, transpiratio, — pulveris cyprii acrioris,  
 aromatici usus, radiorum solis actio in cutem  
 diuturna, porriginis ut causae praecipuae accu-  
 sari merentur.

§. 417. Varia hinc porriginis, ejusque a cau-  
 sis repetenda, est prognosis; atque nec ubique  
 sine aliquo vitio corporis nascitur, vel ex to-  
 to in omnibus inutilis est; nec solius modo  
 pellis a culpa non interdum occurrit; aut ma-  
 jorem, quam ipsa sit, morbum subinde non in-  
 dicat impetiginis haec species.

§. 418. Qui ad diversas porriginis causas  
 ( §. 416. ) respexerit, is non unam, sed aliam  
 aliamque cuivis ex istis oppositam, curationis  
 sibi eliget methodum. Hinc aliorum, ex qui-  
 bus haec affectio pendet, morborum fomes in  
 genere tollendus, et actio in cutem praeverten-  
 da sunt ( §. 375. ). In ea, quae istius modo  
 culpa prodit, aut quae ab acri hic elaborato,  
 aut

aut collecto inducitur, porrigine, illa, quae pellis aut siccitatem, rigiditatem, aut laxitatem, sensibilitatem perversam, aut plenitudinem corrigant, et quae stimulantem per poros cutaneos expellant materiam, conducunt. Summa hinc cutis puritas, et frequens pectinis ad sordes inter capillos removendas usus, indicantur. Densiolem forte, importunamque comam, imprimis si tenax illam foetidusque ichor conglutinet, rescindere, — sed simul, ne capiti, resecto vix pilo, frigus obsit, cavere oportet. Ariditatem, rigiditatem pellis, decoctis seminum lini, herbae malvae, partium animalium et pinguium, lactis balneo, aut fotu, axungia recente, corrigimus. Laxitatem, frictio, frigidaeque usus, aut vini alcohol cum ista conjunctum, aut corticum quercus, vel chinae decoctum, solutio aluminis, salis saturni, aut fascia, tollunt. Perversam cutis sensibilitatem, ac pendentem forte ex hac ipsa secretionem morbosam, si praedictis, aut internis remediis non cedant, oleo hyoscyami cum opii portione illito, — vel et stimulo contrario ex cantharidum tinctura, ex urina recente, sero lactis

cum

cum aceto remixto, moderamur. Plenitudinem cutaneam scarificatio dispergit ( §. 375. ). Quo vero tempore externis porriginem primariam aggredimur auxiliis, excretionum naturalium, transpirationis scilicet, urinae atque alvi habenda est ratio: quae, si recte succedant, ac moderate augeantur, porriginis curationem eximie secundant.



## O R D. II. G E N. II.

## H E R P E S.

§. 419. **E**pidermidem modo *porrigo* (§. 413.), — mucosum vero reticulum, et cutis ipsius superficiem, *Herpetes* arrodunt. Quam vero illa cum *erythemate* (§. 396.) formae affinitatem manifestat (§. 414.), hanc isti cum *erysipelate* pustuloso (§. 282.), ejusque imprimis specie, quam *zonam* appellavimus (§. 287.), febre tamen plerumque expertes, ostendunt; et communissimum in civitatibus, lateque per familias expansum, cutis morbum nobis exhibent, qui propria non minus diuturnitate, quam natura rebeli, ac insidiis, quas visceribus saepe struit, infamis est.

§. 420. *Herpes* vero est species impetiginis, quae papulis exiguis, aut rubris aut pellucidis, subflavis, aggregatis, cum pruritus, tensionis, ac ustionis quasi sensu, ad cutem sub-tumidam ac subduram efflorescit; his vero vel sponte, vel scalpendo disruptis, pertinaciter

ulceratur, sanientque acrem vicinas saepe partes arrodentem plorat, ac squamis, vel crustis informibus obtectae in lemas atque furfures resolvitur.

§. 421. Herpetis solita in *miliarem*, *rodentem*, ac *phagedaenicum* divisio, formae potius, ac vehementiae, quam diversae hoc in morbo naturae, fundamento innititur. Nec alia nunc temporis *Mentagrae*, quam *herpetis*, nisi loci, quem illa occupat, differentiâ, est indoles; ac si proprius haec singula describi nihilominus mereantur, non tamen ideo pro morbi speciebus distinctis, quae gradu violentiae, aut sede, modo differunt, declarari debuissent. Alia vero causarum ( §. 423. ), quae haec singula producant, est ratio; ac ipsa medendi methodus hac a morbi tam multiformis divisione dirigitur: eo quod scilicet nunc cutis ipsa, injuriis occultis agitata, *primarium*, nec ab aliis pendentem, secretionis vitiosae effectum, sibi morbum elaboret ( §. 416. ); nunc vero ab acri quocunque ad superficiem *symptomatically* invadatur; ac illius magis, ut ab hoste liberetur,

tur, quam sui ipsius, nisi jam *complicata* morbi indole, curam exposcat. *Congeniti* in quibusdam, — *haereditarii* in aliis, — *epidemic* aliquando, exempla *herpetis* occurrunt; ac demum in aliis hiemali hic tempore disparere, solis aestu redeunte redire, et quas illinc in viscera furias exercuit, has ad pellem hinc, quadam fere *periodo*, ac *metastasi*, seu *crisi imperfecta*, convertere observatur.

§. 422. Sed, qua sub forma herpes in cute compareat, et quas illa mutationes eodem in morbo patiatur, dicendum nunc est.

In parte scilicet nunc hac, nunc illa, pruritus ingratus, ac sensus ardoris, tensionis percipitur; et mox papulae vel rubrae, vel flavae ac pellucidae, circa limbum rubellae, sat copiosae, sed dispersae, sine cutis intermediae phlogosi, ac sine febre, comparent: quae papulae vel sponte, vel unguibus disruptae, mox squamis obteguntur, quas latens sub eisdem superficiale ac urens ulcusculum mox abjicit, mox renovat; donec lento hoc ipsum decursu siccescat, ac in lemas, furfures, et albescentes qua-

si farinas, fatiscat. Ad faciem, praecipue pone-  
 aures, mentique confines, circa poplitem, et  
 collum, manuum ad palmas, plantasque pe-  
 dum, hic *simplex*, vel et *farinosus*, ut appel-  
 lant, *herpes* frequenter occurrit, ac internos  
 saepe partium dolores, et nervosos, ut vidi-  
 mus, affectus hinc inde dispergit.

*Miliarem herpetem*, pustularum seminibus mi-  
 llii similium a forma, — ac si paulo majores  
 observarent vesiculas, *phlyctænoden*, vocarunt  
 illum; qui majori, quam *simplex*, pruritu, ca-  
 lore, tensione, tumore partis his a papulis co-  
 piosius obsessae, ac rubore per interstitia ex-  
 tenso, incederet. Insignes non raro, hoc sub  
 statu, cruciatus, digestionis sub tempore, lau-  
 tiores post epulas, et ad noctem cum vigiliis  
 crescentes, experiuntur aegroti, ac interdum,  
 licet rarius, febricitant. Tumor splendens ac  
 ruber, ustionis quasi sensus, manifestam hic  
 phlogosin, ac magnam cum *circini* (§. 287.)  
 symptomatibus similitudinem, sed longiorem  
 ac pertinacem magis decursum, ostendunt. Bre-  
 vi tempore vesiculae, ad fundum jam erosae,  
 ad apicem subalbæ, rumpuntur; ichor acris,  
 qui



qui effluit, saepe foetet, et partim in crustas sat tenues, inaequales, scabrosas, colore nunc cinereas, nunc luteas, nunc a sanguine commisto, vel ex fissa epidermide squamosa stillante, subatras, concrescit. Ad manus ( facile utriusque ) dorsum, ad brachia, crura, non raro ad scrotum, perinaeum, vel quavis alia in parte, si forte faciem excipiamus; haec impetigo frequenter prorumpit; ac saepe per menses, et, ut vidimus, per annos, renovato saepius pustularum reditu, moderato hinc inde furore, nunc eodem, nunc alio in loco, nunc in pluribus simul, ferocissima continuat.

Minori plerumque violentia *herpes rodens*, vel *serpigo*, incedit; sed conspicua rapiditate extenditur, atque a crustis eodem sat densis oblecto, contentus sub istis ichor in vicinas sibi partes invehitur, ac faciem imprimis, aut partes quascunque, exulcerat, quasi larva obducit, atque cutis vestigia exesae hinc inde relinquit.

Huic ipsi hepeticis varietati, vel et *leprae*, ubi mentum, aut vultum fere totum defoedabat, *mentagrae*, si recte judicemus, est no-

mēn impositum. Solius menti herpetem squamosum et quasi farinis conspersum in *Clinico Instituto* observavimus: in eo certe singularem, quod viri ab eodem affecti barba pilos, prope cutem, penicilli in modum unitos, mox vero divergentes, crassiores ac asperos ubique exhibuerit.

*Herpetis phagedaenici* non alia, quam *herpetis rodentis*, ejusque peioris, aut cutem, in tumorem elatam, profundius ac fere integram exulcerantis, nec ideo in vicina tam late serpentis, conditio est.

Quod vero hic adducta herpetum divisio non nisi varios ejusdem mali gradus nobis offerat, vel ex eo, quod illorum unus in alterum saepe transeat, conjicere licebit. Pro varia scilicet sensibilitatis cutaneae, ac pro rerum aliarum positione diversa, a causa prorsus eadem herpes nunc simplex, nunc miliaris, nunc rodens, aut ulcus herpeticum, eodem in homine nascetur. Quo fortior irritatio hoc a malo inducitur, eo plura tum localia, tum a consensu derivanda, excitantur symptomata. Ad internas saepe partes, ut per nares, laryngem etc., herpes proserpunt; ac disparens, aut repul-

pulsum a cute malum, eventu non raro lethali convertitur ad viscera. In eodem homine, ad iras effrenes proclivissimo ac simul hypochondriaco, vertigines et salutis alia non pauca incommoda ab herpetis *simplicis* ad pedum plantas eruptione mox cessasse conspeximus. Hunc tamen spirituosis et acribus tractari aegrotanti placebat. Nascitur hydrocele: quo per sectionem testiculi sanato, et vulneris jam clausi superficie serum acre, ad plures in die uncias, per binas fere hebdomadas cum emolumento exsudat. Sed hunc quoque fontem vir consiliis rebellis exsiccat, et primum hepatitis, — hac vero persanata, maniaca per menses insequuntur deliria. Ipsa iterum ad scrotum cicatrix aperitur, ac humor acris effunditur: quo fluere cessante, in manus utriusque dorso herpes *miliaris*, ac tandem *depascens* comparet, et immanes rebellis dolores producit. Externis iterum abacta impetigine, periculosa otitis se prodit: qua feliciter dissipata, ad tibias herpes, ac pristina cum illo valetudo revertitur. Ex venereo ad perinaeum herpete represso, dolorem in thorace punctorium, sputa sanguinis ac tandem

purulenta, cum macie extrema et singulis pulmonalis phthiseos symptomatibus, mercurialium virtute superare nobis licuit. Vel ad pulmones, vel uterum, vesicam, vel alia ad viscera aberrantis, vel istius ex illis ad cutem felici cum omine transvecti, copiosa occurrunt exempla: quae singula herpetem ad internas non minus laete, quam externas ad superficies florere, ac symptomata pro sede mali diversa excitare, luculenter ostendunt.

§. 423. Ipsius certe cutis extremis in oris, ac reticulo mucoso, sicut *porriginis* (§. 416.), ita et *herpetis primarii*, praeparatur, aut nascitur, ac fovetur, incognitae licet naturae, materies. Nec forte magna inter illam, cum pellem pertinaciter, quasi arborem lichenes, deturpat, — ac herpetem, nisi majoris ac fere causticae in ista acredinis, differentia est. Quid vel *sola* in vasculis cutaneis *secretio mutata* in mutandis humoribus valeat, hoc simplicioris ex vulneris pus inodorum ac blandum fundentis, — sed forte neglecti aut stimulati, ac in *ulcus* conversi, ichorem foetidissimum ac

vicina rodentem ex sanguine sanissimo separantis, historia elucet. Forsitan non tam male diceremus, herpeticam, vel aliam, specificam atque acrem, tunc in cute; sanguinis sine culpa, generari materiam: cum ejus vascula, per causam peculiarem modo sic, modo aliter, incitata, prout vasa *melois vesicatorii* sponte ac sine morbo pro aliis — ita rodentem atque causticum sibi ipsi, liquorem secernant. Hujus certe sic, humorum sine vitio, praeparatae formes materiae, modo cutem, ex qua stillat, ac vicinias arrodit, exulcerat; modo copiâ adaucius, et ad sanguinem resorptus, — aut forte in isto non mutatus, aut transpirationis urinaeque per vias non rejectus, perpetuam herpetis causam constituit: quae, nisi ad cutem expulsa, febres nunc lentas, sive hecticas, — nunc glandularum, viscerumque infarctus, — ad pellem vero delata, propriam in ista irritationem, secretionem morbosam, ac impetiginem analogam, vix tamen, ut nobis videtur, in alios contagio, nisi forte symptomaticus, ut venereus, sit herpes, transituram, constituit. Quid hominis integumenta, fluidorum si-

ne vitio, ut herpeticum ichorem loco blandi maderis secernant, inducat, hoc equidem determinari non potest: sed vix *unum*, vel, ut vocant, *specificum*, hoc esse; causarum aliarum, quae similem in cute impetiginem producunt, effectus commonstrat.

In *bile* praecipuam herpeticis causam Antiquitas quaesivit: et negari non potest, hoc fluidum aut exuberans, aut mora, vel aliter corruptum, in cute, tum ex hepate regurgitans ac resorptum, tum solo abdominis in pellem consensu, istius integritati non parum obesse ( §§. 274. 373. ). Major forsitan herpetum in iracundis, quam [aliis in hominibus, frequentia occurrit; in ictero rebelli tum pustulae cutaneae, tum insignis pruritus comparent; et quae de chronico ac habituali jam dicta sunt erysipelate ( §§. 288. 290. ), sectio pathologica de herpetibus aliquando confirmat. Sed reticendum simul non est, Veteres ex flavo magis contenti in pustulis liquoris aspectu, ac insana de *quatuor humoribus* theoria, quam ex alio fundamento, herpetum, aliorumque affectuum, qui cutem defoedant, originem a bile

de-

derivasse. Nec etiam, cum abdomini consensus in cutem conceditur, hic idem et isti in illud negandus est; — nec detecta post mortem in hepate labes pro causa magis, quam pro effectu herpetis, ubique declaranda fuisset: cum vel ipsa sub psora, seu scabie, quam ex hepate nemo jam derivat, jecinoris obstructio, quae impetiginis inveteratae aut male tractatae effectus est, subinde occurrat.

Nil interim aptiorem generandis herpetibus materiam, quam longa in cibis aut rancidis, corruptis, aut aromate acriori conditis, ac potu spirituoso intemperantia, largiri videtur: cui, si otia, animique curae graviores superaccedant, nascitur singularis illa in lymphâ hominum aulicorum vel procerum ad herpetem, ut altera, in podagram, huic coetui prae alio fere propria, dispositio.

Illud ipsum vero, quod vel affectibus rheumaticis, vel scrophulis, vel scorbuto, lvi venereae, vel crisiibus imperfectis, subest, — herpetis non raro in pelle condit principium. Ex acri interim *venereo degenerante*, *herpeticum* oriri, non minus quam pomorum e semine  
 pru-



prunos expectare, absurdum videtur. Ex parentibus herpes, vel fluidorum, vel solidorum ex culpa, in filios, haereditatis sub specie transire, experientia confirmat. Quid excretionum naturalium, vel illarum, quibus jam ad-suevimus, suppressio in pellem queat, jam satis expositum est ( §. 274. ); et copiosa mulierum, quibus aut menstrua, aut fluor albus, — multorum, quibus haemorrhoides, aut sudor pedum solitus, aut ulcus artificiale, vetustum, — imprimis senum, quibus et urinae et cutanea simul excretio, aut languent, aut suppressa sunt, exempla, herpetis originem ex uberrimo hoc fonte non parum illustrent.

Sed quod frequentes herpetis ex locali cutis stimulo natales demonstrat, illius vel a simplici feminarum *collari*, ex pilo humano, — vel a presbyterorum illo, ex lino scilicet confecto, oriundi exemplum est. Jam solae, quas oculus inflammatus exstillat, lacrymae, et genas arrodunt, et phlyctaenas in illis quasi herpeticas attollunt; quid igitur mirum est, si cutis, quocumque demum modo stimulata, humorem, quem continuo exspirat, insonte licet

sanguinis massa, in acrem ac fere causticum ichorem convertat?

Caeterum et cutis immundities, et lanarum, pannorum, vel oleo impuro ac rancido, vel rebus acribus. imbutorum, tinctorum, tractatio, sartoribus, textoribus, atque aliis, qui impura et uliginosa simul loca inhabitant, hanc foedam impetiginem hinc inde communicant.

§. 424. Sicut varia herpetis natura et origo, ita diversa quoque prognosis hujus mali est. In genere, herpes gentilitius, congenitus pubertatis post epocham continuans, inveteratus, difficulter, si unquam, superatur. Quae alterius symptoma est morbi, aut istius quasi crisis constituit, herpetica affectio; illius, nisi vitii primarii recisa radice, vel certum aegrotantis in damnum, vel sine magno successu, suscipitur curatio. Nec symptomaticus quidem herpes, ablata licet causa principali, si natura jam ulceri adsueverit, sine quovis respectu de repente per externa suffocandus est; ac majora plerumque sanationis perversae, quam ipsius externi herpetis, pericula cernuntur. Quo tempore.

re menstrua apud mulieres suspenditur, aboletur excretio: eo herpes non raro malignam, et carcinomaticam quasi, naturam assumit. Qui recens est, et a solo cutis vitio exoritur herpes, hic non modo facilius, et sine noxa, externis tractari, sanari mox potest; sed internae infectionis, et contrahendae habitudinis ob metum, extirpari celeriter debet. Quo major caeterum herpetis in cutem est impetus, quo magis hanc penetrare, exedere, ac crustis defoedare cernitur, eo major plerumque in eodem sanando difficultas, et factae retrocessionis fortiora timenda sunt pericula.

§. 425. Sub cura herpetis, ad illa imprimis, quae alibi ( §§. 375. 418. ) jam dicta sunt, respiciatur; — mox vero num primaria, vel secundaria, num recens, vel antiqua impetiginis sit indoles, — et qua ex origine haec fluat, inquiratur necesse est. Prima igitur et hic erit regula: ut quae causa interna herpetem pro effectu agnoscat, haec opportuno regimine ac remediis huic ipsi oppositis corrigatur. His vero peractis, aut etiam, si cutis modo vitium subesse videatur, omissis, sub-

de-

debito habitudinis jam forsitan contractae respectu, ad externa mox subsidia ( §. 375. ) recurrendum est.

Quam sibi *herpes secundarius* curandi rationem exposcat, hoc aliis hujus operis ex locis eruendum relinquimus. Cum vero non una, sed alia aliaque sit herpetis materia, quin vera ejusdem indoles ex clariori, quam solius cutaneae affectionis, signo ubique eluceat, atque hinc multa in corrigendo incognito hoc fomite difficultas nos premat: hinc generales saltem in eo curationis amplectimur regulas, ut, habita causarum ratione, cutis potissimum naturalem excretionem, ac stimulantis exhalationem materiae, per summam illius munditiam, debitumque atmosphaerae regimen, promoveamus. Frequentior herpetum origo ex eorum, quae per cutem vel renes excernenda fuissent, retentione derivanda videtur; vel saltem illa, quae urinas, cutaneam transpirationem adaugent, ab experientia hoc in morbo proficua esse docentur. Hinc corporis exercitia, frictiones, balnea, indusia quidquam aspera, ex lana puriori confecta, ut ea, quae prae aliis in cutem

tem agere videntur, medicamenta, antimonia-  
lia imprimis refracta dosi porrecta, antimo-  
nium crudum, Aethiops antimonialis, vinum  
antimoniatum, sulphur antimonii auratum,  
cum gummi resina Guajaci vel et mercurio  
dulci conjunctum, flores sulphuris, cum suc-  
cessu nonnunquam adhibentur.

Qui vero acre herpeticum sui generis supponunt, hi certis, ac specificis, ut vocant, hoc ipsum medicamentis corrigere ac subjugare studuerunt: atque tum stipites dulcamarae, seu *solani scandentis*, tum corticem *ulmi campestris* internum, pulsatillam nigricantem, seu *anemonem pratensem*, *jaceam*, seu violam tricolorem, vel et *alkali volatile causticum*, in auxilium vocarunt. Laus dulcamarae ad magnas satis doses in decocto ( N. XLIV. ) vel in debiliore hoc ipso extracto porrectae, a sat multis hucusque confirmata est, et sub forma pilularum cum aliis ( N. XLIV. ) remixta medicina tentari meretur. Fatemur interim, frequenter in vanum haec singula praescribi; nec major est virtus illorum, quae ad acre, ut sibi persuadent, involvendum, dulcificandum, ut

sarsaparillae, saponariae, chinaeque radicum, aut viperarum, testudinum, ranarum decocta, aliquando per menses aegrotantibus ingeruntur. Seri lactis vel solius, vel cum succis plantarum, fumariae, cichorei, rumicis acuti; seu lapathi, menyanthes trifoliatae, seu trifolii fibrini, remisti effectus haud magnos in herpette conspeximus; interim, si viscerum obstructio huic ansam porrigere, aut biliosa colluvies aut scorbutica dispositio subesse videantur, tum ad ista, tum ad alia, quae his causis opponantur, confugere licebit. Quibusdam rebellem salis acidum marini herpetem profli-gavit.

His vero atque aliis pro morbi causa vel adhibitis vel omissis remediis nisi herpes superetur, ad externa veniendum est auxilia. Sub diuturna ac in habitudinem jam conversa impetigine, huic ipsi vicinus non sine fundamento, priusquam illa persanetur, excitabitur foniculus. Sub fortiore herpetis phlogosi, tensione, dolore, aut si crustae densiores hunc efformant, emollientia et anodyna, vapor tepidae, cataplasma ex lacte cum pane, oleum,



butyrum recens, fomentatio cum malvae decocto, adhibeantur necesse est. Si febris, quod rarum est, urgeat: venaesectio, vel sopiens dolores ex opio remedium, conducunt. Sedata vero quidquam irritatione, ad illa, quae secretionem morbosam vel exsiccent; vel proinus immutent, veniendum est. Extractum saturni liquidum cum aqua remistum, vel cataplasma ex ista et pane confectum, vel unguentum saturninum, hic multis auxilio sunt; atque damna, quae a plumbo derivantur, praeposterae herpetis sanationi non raro tribuenda fuissent. Quibusdam interim in casibus tensionem ac dolores hac a methodo adauctos observavimus. Similia de usu externo mercurii sublimati in aqua soluti nunc summo opere proficuo; nunc nimis irritante, dicenda sunt. Unguentum mercuriale album ( N. XLVI. ), vel citrinum ( N. XX. ), bis in die ad pisi magnitudinem herpeti illitum, vel aliud ex zinco ( N. XLVII. ), hunc saepius dissipavit. Sed haec singula tam a succo Nicotianae tabaci, emplastri sub forma ( N. XLVIII. ) applicito, quam imprimis ab aceti destillati fortioris usu, superari conspeximus.



mus. Corticis quoque nucum juglandium viridis, sed prius siccati, decoctum ( N. XLIX. ) ad ulcera herpetica laudatum est. Interdum rebellem aliis herpetem, vesicans ex cantharidibus emplastrum huic ipsi impositum radicitus extirpavit; nec aliter Antiquitas, quam urendo, suppurationem et tandem cicatricem inducendo, hoc mali genus obstinati pertractabat. Summos non raro in dissipandis herpetibus effectus maris balneum habuisse observavimus; nec minora eosdem in thermis sulphureis subsidia expectant. Sed quocunque demum externo remedio herpetem dispellere conemur, opus est, ut secretionis cutaneae ac renalis simul ratio habeatur; atque multis, nisi aliter forte jubeat debilitas, lenis ac repetita per alvum evacuatio conducit.



## ORD. II. GEN. III.

## HYDROA.

§. 426. Non absimile forma herpeti simplici cutis vitium *hydroa*, seu phlyctænae, granumilli plerumque aequales, interdum majores, confertae, vix cohaerentes, levioribus ex causis derepente cum pruritu oriundae, fugaces, aut brevi mora in squamulas aut furfures resolvendae, nobis sistunt.

§. 427. Aliae vero ex istis ( §. 426. ) pellucidam, sphaericamque hydatidulam praesentant: quae nunc diaphana, ut cutis ipsa, albescit, — nunc figurae magis conicae, leviphlogosi ad basin suam cincta est, ad apicem subturbido, flavescente liquore turget, et, originis ratione, *hydroa sudamen* vocatur. Aliae sub febribus tum acutis, ut illa, quae peripneumoniam comitatur ( §. 193. ), tum in ipsis intermittentibus, ad pectus, labra, vel alias ad partes, nunc evidenti cum fructu, nunc sine isto, cum pruritu et ardore, copio-

se prorumpunt, et sponte disruptae, herpetum adinstar, in crustas exsiccatae, brevi tempore in squamulas resolvuntur: *hydroa febrile* dicenda. Vel a solo terrore, oris circa ambitum, phlyctaenae prodierunt; et apud hystericas, chloroticasque virgines, apud hypochondriacos, similia hinc inde sine causa manifesta occurrunt. Ipsa demum in feminis delicatulis miliaria, quae febris sine impetu per menses in cute teneriori florescunt ( §. 322. ), — atque illa, quae ex tendinum laesione, ex ossium fractura, vulneribus, hinc inde oriuntur ( §. 324. ), huc spectant; ac singula nervosae prosopiae phaenomenon nobis offerunt, quod *hydroa nervosum* appellabimus. Alia phlyctaenarum, rariorque, est species; quae, coloris nunc albi, nunc lividi aut subnigri, circa limbum inflammata, ac in vesiculis lenticulae vel et fabae magnitudinem aequantibus consistens, vel noctis modo tempore ad cutem erumpit, vel eodem dolore acerbos, diluculo remittentes, inducit, et *Epinyctidis* sibi nomen a Veteribus obtinuit ( *hydroa epinyctis* ). Ipse forte *pemphigus* ( §§. 357. 359. ), cum sine fe-

bre comparet, hoc ad genus morborum referri meretur.

§. 428. *Hydroa sudamen* aestivam atque calidis regionibus magis propriam, levioris momenti, cutis affectionem constituit. Frequentior sudaminum sub aere simul calido ac humido proventus est; et, qui huic necdum ad-sueverunt, coeli frigidioris incolae, hi prae aliis a pruriente hoc pellis affectu per annos bene multos sub quavis aestate tenentur. Infantes, prae adultis, et ex istis illi, qui cute teneriore obteguntur, sudamina patiuntur: quae in facie non minus, quam ad manus, totamque superficiem, sub forma descripta ( §. 427. ), nunc alba, nunc rubra, cum summo et ad noctem praecipue crescente pruritu efflorescunt, et a quovis corporis exercitio, vel frigidioris ab aquae potu, mox numero augentur. Saepe qui sub fervida aestate undae frigidae solatia sibi quaerunt, mox a balneo ad cutem copiose his a pustulis obsidentur. Quemadmodum vero hae phlyctaenae ad pellis superficiem quam citissime erumpunt,

sig

sic a moderato atmosphaerae calore ex eadem promptissime disparent; ac licet ab istis plerumque nil damni observetur, non tamen desunt exempla illorum, qui pruritus ad cutem impatientes, sudores salutes arcendo, vel flumina petendo, in febres, diarrhoeas, ac alia incommoda non pauca, inciderunt. Post paucas modo dies sudamina arescunt, ac in squamulas resolvuntur; sed donec solis aestus dissipetur, in cute mox nova succrescunt, ac somnum vix ullum sic affectis sub stragulis concedunt.

*Hydroa febrile* morbi primarii, cujus comes est, decursum vel totum absolvit; vel, ut crisis salutaris, huic finem imponit.

Similia de *hydroa nervoso*, alterius plerumque morbi symptomate, dicenda sunt.

*Epinyctis hydroa*, nisi *circinum* aut *zosterem* (§. 287.), aut *pemphygum* (§. 395.), pro ista Auctores, ut dubitamus, describant, perraram, nec visam nobis, forte eandem cum *termintho* Graecorum, aegritudinem constituit: sine sexus, aetatis aut roboris ratione, nunc praevis, nunc exclusis, torpore, lassitudine,

anxietate, pallore, anorexia, ex cute tenera vel transparentes et albae, vel lividi aut atricoloris, phlyctænae nunc discretæ, innumerae, nunc largam cutis plagam occupantes, ad lentis, sive fabae magnitudinem, raro magis, extensae, ad noctem, plerumque cum febre, erumpunt; vel, si solis ab ortu nascantur, sub illa tamen vehementius, et supra magnitudinem ulceris, aegrotum torquent. Singulas phlyctænas rubor urens circumdat; atque dum illa rumpitur, humor plerumque transparentis, et cui lividum vel atrum fundus ulceris latentis colorem impertiverat, effluit. Spoliata humore contento epidermis collabatur, atque cum ipso demum ulceris fundo post paucos jam dies arefcit, et in squamas, non sine cutis erosae vestigio, resolvitur.

§. 429. Non sanguinis certe, sed sudoris, calidiori sub coelo copiosioris, foetidioris, acrioris, et ad pellem sensiliorem a causis minoribus retenti ex vitio, sudamina nascuntur. Contractis scilicet a frigore incaute admissis cutis spiraculis, impulsus his ipsis liquor transpirabi-

bilis, lateraliter rete inter mucosum ac epidermidem transudat, hanc ipsam ab illo dividit, vesicula miliformi inclusus tensionem stimulumque hic concitat, ac specifica acredine a morbosa secretionem, vel propria natura, instructus, subjectae pellis nervulos, ut cantharidum huic impositum acre, irritat, istamque exulcerat; vel in sanguinem cum violentia et in copia revector, nunc in canalem intestinalem, nunc alias in partes invehitur, ac choleras, diarrhoeas, aut febres, anxietates, catarrhos, ac rheumata inducit. Nulli certe major ex suppressa transpiratione, quam illinc, morborum est cumulus: ubi fervidae atmosphaerae aestus ac humiditas continua affluxum humorum ad cutem laxiorem simulque magis sensilem perpetuo invitat, et ubi major coeli inconstantia maceratae pellis opus suspectum interioribus frequentius ac cum impetu transmittit. Non alia phlyctenarum ex terrore, ex affectu quovis nervoso, qui vasa cutis impetuose constringunt, ac majorem in cute sensibilitatem inducendo, secretionem in eadem morbosas inducunt ( §§. 276. 359. ),

ori-



origo videtur. In *hydroa febrili*, ac *epinyctide*, eas ipsas, quae nunc miliaria ( §. 324. ), nunc erysipelas ( §. 288. ), nunc pemphygum ( §. 360. ) progenerant, rationes subesse arbitramur. Quid in secundo ex illis tam graves noctu dolores excitet, hoc non magis, quam venereorum ad ossa dolorum augmentum nocturnum, intelligimus.

§. 430. Sudaminum nulla, nisi, quae diximus ( §. 428. ), retrocessionis subitaneae, discrimina existunt. Qui plures per annos coeli calidioris in cutem acriori assueverunt, hi tandem sudamina, quam advenae, pauciora patiuntur. Phlyctaenae febriles nervosae ex morbis, quos ut crisis, vel symptoma sequuntur, iudicium desumunt. Epinyctidis, ut naturam, sic et prognosin ex propriis observationibus indicare nequimus.

§. 431. Ab adversis modo rebus in sudaminibus abstinendum est; et qui causas hujus incommodae magis quam morbosae affectionis evitare non potest, hic, ne talis demum haec fiat,

fiat, sudorum non impatiens, a subitaneo corporis refrigerio, et frigidis a balneis, atque illis, quae cutis poros obturent, sibi caveat. Sub majori pruritu, quies corporis, atque regimen, ut vocant, antiphlogisticum, conducunt. Si post subitanam phlyctaenarum retrocessionem internae irritationis symptomata sequantur, in robustis interdum venaesectio, ut plurimum vero balneum, quod cutem reaperiat, tepidum, infusum sambuci cum oxymele, ac similia indicantur.

In *febrili hydroa*, et in illo, quod *nervosum* est, remedia primario, unde pendent, morbo adaptanda sunt. Si crisin istius effecisse videantur: ab externis, nisi fotu emolliente si dolor urgeat, abstinendum est.

*Epinyctidis* nos curam experientia destituti hic tradere abstinemus. Fortiorem interim, si nobis occurreret, phlyctaenae dolorem tum anodyno cataplasmate, tum opii externo internoque ad noctem usu moderato, atque illis, quae nimiam in pelle irritationem sopirent, tractandum fore crederemus.

## ORD. II. GEN. IV.

## P S O R A.

§. 432. *Scabiem* Latini nominarunt morbos fere omnes cutaneos, qui ob majorem pruritus ad *scabendum* invitarent aut cogerent infectos. Graecorum *Psora* non minus vagam, ipsique *leprae* subinde concessam, significationem agnovit: sed quod a tam communi, tantasque impetigines comitante scalpendi pruritu derivationem non sumat, hoc nobis nomen ad morbum, de quo nunc sermo erit, designandum, praeter illo scabiei, arripet.

§. 433. *Psora* vero impetiginis est species; quae vel proprio et contagioso a fomite, vel potius ab *acaro* humanae cuti infesto, contagii praemissi sub aspectu, sed sensim sensimque, et ex parte in partem, producta, in pustulis exiguis, miliaribus, hinc illinc majoribus, solitariis, ad fundum duris ac rubellis, ad apicem pellucidis, albescentibus, excepta fere facie, ubique, — sed manuum inter digitos et

ad carpos praecipue conspicuis, super cute elevatis, voluptuose sub motu aestuque corporis et ad noctem imprimis prurientibus, ac disrupta cuticula, crustosis, ulcerosis, in squamulas abeuntibus consistit.

§. 434. Impetiginum haud paucae (§. 439.), externo quidem habitu, cum *psora* conveniunt, et confundi cum ista perfacile queunt: sed sicut origo, ita species hujus morbi videtur *una*; et quae pustularum, ab habitu nunc arido, nunc puriformi, in *siccam* et *humidam* suscepta est divisio, haec, licet illa prae istà magis pruriant, rem protinus eandem, et modo forma diversam, scientiae sine fructu bipartit. Cum aliis quidem psora affectibus hinc inde *complicatur*, et a scrophulis, scorbuto, a venereae, aut rheumaticae materiae, vel ab epidemicae constitutionis, plenitudinis cutaneae, aliorumque effectu, exasperari, mutari observatur: sed ex istis, modo *acarus* si desit, non illa, sed similis huic aspectu morbus, generatur. Quae *crisis* hinc inde constituisse refertur psora, ea vel haec ipsa impetigo haud fuit; vel ab hominis.

minis infecti, aut rei ab eodem tractatae, contactu clandestine profecta est; vel ut quaevis alia cutis, non specifica, exulceratio aegrotanti conduxit. A febris non raro, ut aliae impetigines, sic et psora e cute disparet: vel quod morbi causa, *insectum*, aegrotante in solo incrementum viresque non habeat, et febricitantis superficiem, ut morituri caput hominis pediculi, mox deserat; vel quod stimulus a latente sub cuticula animalculo, ob totius laborem, non, ut sana in pelle, respondeat. Ut vero rebus inanimatis quibusvis, — sic et corpori aegrotantis, diutius haec insecta interdum adhaerere, — vix autem a succo animali sustentari videntur: quo tandem, sub restitutae valetudinis conditione, ut prius, et cum pristinae exulcerationis, et quasi *criseos* effectu, uberrime fruuntur. De *psora epidemica* observationes ( non interim sine magna alterius impetiginis cum illa confusae suspicione ) testantur; sed ut vermes intestinales, atque varia in campis insecta, hac sub anni constitutione longe melius ac sub alia sobolescunt; sic et *acarus exulcerans* non minori, quam ista,

pri-

privilegio gaudebit. Sub certis atmosphaerae constitutionibus psora non aliter *epidemicè* grassari videtur, quam quod pauperum familiae, a frigore vel pluviis in angustis tuguriis longo tempore in unum coacervatae, morbi fomitem ab infectis facilius suscipiant. *Endemica* certe *psora* in civitatibus populo refertis, in pistriinis, nosocomiis, orphanotrophiis, monasteriis, castris, novo fomite vivente continuo infectis, dicenda est. Interim saepe alia est impetiginis, quae pro *psora endemica* declaratur; natura.

§. 435. Ad partes primum infectas prima pustularum ( §. 433. ) rudimenta comparent, ac sensim sensimque propagantur in alias, et volumen acquirunt. Praecipuum in psora symptoma, crescens ad noctem, a calore et a cibis acrioribus *pruritus* est; ex quo, pro varia pelliculis affectae sensibilitate, plenitudine, ac pro ipsa infecti hominis constitutione aut sana, aut morbosa, diversa pustularum forma, exulceratio aut minor, aut major ac latius extensa, inquietudo nocturna; anorexia, pallor,

lor, macies, ac interdum febricula, curaque difficultas, dependent. A frigore, et a quovis cutis spasma, psora, nisi multa, sub ista nascondi videtur. Plures aliquando vicinae sibi pustulae inter se confluunt, ac satis amplum in cute ulcus, aut omnem fere pellem erosam, et crustis defoedatam, ostendunt. Hoc a totius peripheriae affectu transpiratio non parum cohibetur; ac licet pruritus ad recentes et exiguas modo pustulas longe major quam ad amplas has plagas sentiatur, latens tamen ad istas et sub crustis ichor, vix *acar*  
*is*, qui illic modo resident, onustus, ut sanies quaevis in cutem subjectam operatur: pars ejus resorpta cum sanguine miscetur, visceribus tandem et glandulis, nisi a sanis expulsa, separata, insidias structura. Apud alios in toto fere corpore nascuntur parvi, rubicundi et rodentes furunculi: qui mox purulenta materia repleti, circa basin quasi circulo inflammato cinguntur, ac sponte aperti, in latas, densasque crustas exsiccantur. Interim tempore sat longo psora non nisi cutis solius aegritudinem et affectionem prorsus, ut



vocant, localem constituit; et quaecunque de-  
 mum erosionis in ista indicia compareant, vix  
 tamen pellis celeriter de his quidquam cum  
 internis participat. Sat lentos scabies incipiens  
 progressus in multis agnoscit, ac interdum ex-  
 tremitatibus per menses contenta videtur. In  
 aliis celerior impetiginis istius expansio, ac  
 citior pustularum in ulcera transitus est: quae  
 diutius nutrita, vel a psorae causa jam aba-  
 cta, cum iisdem, quam ista, remediis persana-  
 ri vix queunt. Non quaevis pellis ab eodem  
 contactu, facilitate eadem, a psora invaditur;  
 sed neque pediculos fert quaevis caesaries; et  
 ipsa contagia, ob rationem non minus obscu-  
 ram, non quovis tempore in omnes agunt. Qui  
 farinas tractant, aut inter equos ac in stabu-  
 lis versantur, vel spirituosos liquores distil-  
 lant, hi psorae minus subjecti videntur. Juve-  
 nilis aetas, teneraque cutis, huic morbo, qui  
 pluries hominem eundem non raro invadit,  
 prae aliis favent.

§. 436. Ex dictis ( §. 433. ), quae cau-  
 sa psoram inducat, jam satis elucet. Haec

*Lib. IV.*

m

vul-

vulgo prius, quam ipsis innotuit Medicis, et ex amplissima *acarorum* familia descendit. Distinctus scilicet ab illis, qui farinam caseumque inhabitant, *acarus humanus*, aut *acarus exulcerans*, non maturas ac pure jam plenas vesiculas, sed pustulas vix cutem egressas, limpidoque sero recenter impletas inhabitat; ac epidermide tectus, ad vicinas sub hac ipsa partes, quasi per fodinam, macularum, striarumque rubrarum, filiformium aspectu detegendam divagatur. Incognitum hoc extra corporis humani confines insectum, in aliis, quam psorae, vesiculis nequaquam reperiendum, nec fortuito hic nascitur, nec eandem, quam forte larvae muscarum in ulcere neglecto ac vetusto, originem agnoscit; sed ab aegrotante, aut re quavis ab isto infecta, in sanos transfertur, et pustulas, quas inhabitat, fecisse credendum est. A calore externo, interno, pruritus augetur; a frigore, cum imminuta insecti agitatione, hic idem immittitur, febrisque ipsa saepe pustulas exsiccatur. Ab immundis difficilius, facilius ab illis, qui puritati magis student, haec viva  
mor-

morbi causa, quod cum *contagio* non liceret, a cute avertitur. *Phthiriasis* vero historia hanc ultro confirmat de *acaris* theoriam. Hic de *contagio*, ut pruritus, pustularum, ulcerumque causa, cum *pediculum humanum*, aut *pubis*, sub cuticula detegimus, a nemine cogitatur: cur de *acari* in *psora* mox ab istius principio non minori domicili jure habitantis, ac hanc ipsam *praecedentis* potentia aequali dubitemus, vix ratio superesse videtur. Celeritate aequali tum *pediculus* uterque, tum *acarus*, cum interna vix curent, ab *externis*, ejusdem fere indolis, remediis extemplo et actione longinqua necantur; ac *psora*, quo citius, eo facilius aufertur: felices, qui talia, tamque multa, tam certa, pro *unico contagio* possident antidota Mortales! A *psora*, ut vocant, *retropressa*, non pauca certe mala derivantur: sed praeterquod, saepius *effectum* cum morbi *causa* a Medicis confundi, nimis constet; non specificum ad *psorae* vestustae, aut complicatae, celerius aut incaute sanatae, noxas explicandas requiritur *contagium*; nec ipsa, quae *pediculi* ad caput pro-

duxerunt, ulcera, si diutius jam fluxerint, — nec innocens, cui, sani licet, jam assuevimus, foniculus, sine damno ubique, celerius exsiccantur. De psorae, quam *criticam* appellant, fallaciis jam supra (§. 434.) mentionem iniecit. Quae sartoribus, quam aliis opificibus, communior esse dicitur, et ex *lanae* infectae contactu derivatur, psora, ea vel aliam impetiginem symptomaticam (§. 440.) constituit; vel ex *vestibus* laceratis, quae renovant atque consuunt, *jam infectis*, non ex *lana*, originem agnoscit.

§. 437. A psora, nisi cum aliis affectibus complicata, aut diutius neglecta, aut hoc tandem sub statu incaute suppressa, periculum haud imminet. Difficultas curationis apud pauperes, in nosodochiis, aut in castris, a necessariae puritatis defectu, et continua cum infectis societate, derivetur oportet. Exempla psorae, quae *sponte* in totum disparuerit, per pauca habentur; sed licet haec existant, si *contagium* aliquando sic deleri dicamus, cur *accuros* ob causas ignotas aliquando disparere, aut

aut in pelle mutationem; quae istorum actioni resistat, contingere, negemus, ratio non apparet. Post psoram longiorem, interdum abscessus, glandularum, viscerumque infarctus succedunt: quae singula non tam ex specifica morbi causa, quam ex ichore diutius vel copiosius resorpto, vel ex vitio alterius naturae in corpore praeeistente, ac per psorae stimulum evoluta, derivanda esse censemus. Interdum alios psora dissipavit effectus morbosos; et, eosdem suo stimulo ad cutem invitando, visceribus immunitatem restituit. Interdum morbos alios, cum psora hic accedit, quamplurimum exasperat haec ipsa.

§. 438. Primum certe curationis momentum in vera hujus morbi diagnosi consistit. Si psora (vel a *contagio specifico*, vel ab *acaris* haec pendeat) est *recens*: ad externorum mox usum, cum interna nil possint, sine temporis jactura recurrendum est. Si hominem infirmo ac alio affectu detentum haec impetigo corripuerit: tunc videndum est, an per stimulum et ulcus superficiale tam late a psora

ra in cute excitatum, natu prior affectio emolumentum habuerit; et antequam hic psorae medeamur, artificialis in cute exulceratio, quae illius virtutem suppleat, excitanda est. Si per longam jam moram a psora cutis male affecta est, et aegrotus cum hac, morbosa licet, excretionem habitudinem contraxisse videtur: tunc lentior et cautior morbi cura esse debet; ac iterum, artificialem fontem quae internis minarentur mala, ab istis derivanda sunt. Si cum alia impetigine, interno forte ex vitio pendente, psora complicezetur: tunc illi per interna occurrendum, et istius per externa sanatio differenda est. Sub eorum vero, quae ad psoram simplicem conducunt, usu, non alia, quam ea, quae sanum in aliis hominem decet, vivendi ratio requiritur; nec ulla, quae, si balnea rerumque infectarum depositionem excipiamus, ad curam praeparent, vel psorae retrocessionem impediunt, indicantur auxilia.

Insignis eorum, quae ad psoram laudentur, est numerus: sed, praeter summam munditiam, pauca in malo simplici sufficiunt, in-

ter-



terque ea *sulphur* et *mercurius* praeferri merentur. Primum igitur totius corporis superficies ope balnei vel communis, vel sapone remisti, ab immunditie ichorosa et a crustis depuranda, aut probe saltem cum spongia abluenda, et ad istas, donec decidant, fovenda est. Nil juvat, prius, quam adhibitis per aliquot jam dies remediis, apud pauperes, quibus copia vestimentorum non est, tum haec, tum lintea mutare; quod tamen post tres, quatuorve frictiones necessario suscipitur. Sic et omne cum infectis commercium, rerumque ab istis tractatarum usus fugiantur oportet. Sub cutis plenitudine majori, ac ardore, pruritu ex eodem insigni, scarificatio praemissa conducit.

Ipsam vero *sulphur*, tum vaporis, tum balnei, tum unguenti sub forma, aequali cum successu adhibetur. Non parva interim ab hoc ultimo, ex foetore, et maculis ad lintea relictis incommoda sunt. Vapor sulphuris sub ipsa psorae principio, et cum pustulae exiguae ad partem comparent, cum debita cautela aliquoties in die adhibitus ulteriorem hujus mor-



bi progressum praescindit. Pauperiorum vestimenta ac lintea in aere aperto hoc fumo impregnata, ac furno demum calidiori commissa, egregie purgantur. Sub thermarum sulphurearum defectu, vel hepar sulphuris ad uncias fere duas, — vel calcis aequae ac sulphuris libra una, in aquae fluviatilis mensuris septem vel octo decocta, pro balneo adhibentur. Unguentum ex pulvere florum sulphuris uncia una cum axungiae recentis quantitate sufficiente, vel si pinguis cuti non conducatur materia, cum ovi vitello, praeparatur. Sunt, qui huic unguento salis ammoniaci, vel hellebori albi drachmam unam aut alteram adjiciant; sed in multis ab usu istorum in cute irritatio excitatur, ac solum jam sulphur bene tritum hic sufficit, si pars quarta aut minor unguenti, prope ignem, quotidie ad noctem, nunc digitorum interstitiis, nunc carpo, nunc alias ad partes, illinitur. Tanta vero est sulphuris in viventem psorae causam potentia, ut corporis vel unam modo partem cum eodem frequentius unxisse jam sufficiat. Hinc magnam sibi famam unguentum

tum ( N. L. ), quod soli manus volae, ad nucis avellanae magnitudinem, affricatum, non parvo certe commodo, jam scabiem non raro dispergit, acquisivit. Vix interim nisi *sulphur* hic agere, ac vanae laudes, quod hoc unguentum psoram et *expellat* et *dissipet*, nobis esse videntur.

*Mercurius*, sub quavis demum forma, aut cum adipe remistus, aut, salis sub specie, in aqua solutus, in psorae causam, exterius admotus, cum aequali ac sulphur, nisi forsitan majori, potentiâ operatur. Interius, ad ipsam licet salivationem usque, porrecto huic remedio, psorae ( si modo haec, et non alia impetigo, subfuerit ) causa reluctari est visa; sed pauca hydrargyri portio exterius admota, uti *pediculos* tum capitis, tum pubis, sic et *acaros* in psora, veneni adinstar, mox trucidat. Ad meliora praeparata *unguentum album* ( Num. LVI. ) omnino pertinet: quod ad fabae, vel avellanae magnitudinem quotidie ad loca indicata illinitur; ac, salivationis sine metu, vel psora jam disparente ( quod de aliis quoque auxiliis retinendum est ) per quas-

dam

dam adhuc dies subministrari oportet. Non absimiles et unguentum *citrinum* ( N. XX. ), et solutio mercurialis vel simplex ( N. LI. ), vel *phagedaenica* ( N. LII. ), cum qua partes infectae semel, aut bis, quotidie laventur, in psoram effectus exercent.

Sed, praeter sulphur ac mercurium, quamplurima cum successu interim non semper aequali contra psoram adhibentur. Huc imprimis pertinent decoctum vel succus tabaci *Nicotianae*, balneum ex reliquiis a distillatione spiritus frequenti, aqua vegeto-mineralis, aqua maris, lixivium, decoctum rumicis acuti, inulae helenii, cum unguento ex eadem radice ac butyro parato, et alia; a quibus tamen, ut magis incertis, melioribus instructi; lubenter abstinemus. Observandum vero hic est, quod unguentorum sulphureorum sub usu interdum novae ad cutem pustulae, quae ad psoram non pertinent, sed ab ipso unguento nascuntur, prorumpant. Has, unguento suspenso, balneum ex tepida dispellit. Interim non mox a psora exsiccata medicamenta cito nimis seponenda, sed aliquandiu post  
il-

illam continuanda, — aut, si ex morbi semine ad cutem non integre destructo nova series pustularum efflorescat, resumenda sunt.

Si hominem, ut vocant, cachecticum, aut vitio quocunque alio laborantem, *psora recens* invaserit. non ideo in istius, ut quae *critica* non est, curatione cunctandum, ac summa malorum in eodem augenda est. Aliter se res habebit, si alia impetigo, psorae aspectu modo similis, sed indolis diversae (§§. 439. 440.), — aut si haec ipsa jam diutius in cute haerens, foniculi aut ulceris artificialis quasi vices cum emolumento aegroti assumpserit, — aut si ipsius psorae stimulus, forte latens in corpore vitium scrophulosum, aut aliud, excitaverit: quo in casu, ut monuimus, vel symptomata affectio cum remediis internis corrigenda, — vel psorae ipsius effectus non specificus, sed fortuitus, per artificialem exulcerationem, ac interdum per auctas alibi secretiones, supplendus est. Similia de ea, quae sanum alias hominem diuturno jam tempore affixit, psorá dicenda sunt: ut quae, materiae suae, non

non ut specificae, sed ut ichorosae, ex pelle continuo resorptae, actione internis simul obest, ac simul, suscepto jam habitudinis jugo, ad illam derepente sanari sine damno non potest, quin praedictas sibi curationis cautelas exposcat.

Ex his vero artis praeceptis aut non satis observatis, aut prorsus neglectis, non pauciora, nec minus, ac ab impetiginum aliarum incauta tractatione, lethalia incommoda propullulant: quibus iterum ad regulas jam satis alibi (§§. 290. 326.) expositas occurrendum est. Cum vero morbi a psora male tractata et praepostere exsiccata oriundi, non ex ipsa psorae causa *specificam* ad interiora repercussa, sed ex repentina ichoris, habitudinis ad leges fluentis, suppressione nascantur: hinc nulla est ratio, cur *psoram*, foeditate, ac transitu in alios tam facili infamem, per *insersionem* aegrotanti communicemus; sed illa certe, quae sub exanthematum, impetiginumque aliarum infausta dissipatione commendavimus, sufficiunt.

## ORD. II. GEN. V.

## P S Y D R A C I A .

§. 439. *Psyraciae* sub nomine, diversae apud Graecos affectiones cutaneae veniebant. Nos eodem pro significandis variae originis pustulis, psorae (§. 433.), modo habitu externo, vix non similibus (§. 434.), contagio plerumque carentibus, solitariis, ad basin rubris ac duris, in apice pellucidis, serosis, albescentibus, prurientibus, utemur.

§. 440. Numerosa, et distinctu difficilis huius impetiginis familia est.

Nunc etenim non modo, communi psyraciacis sorte, cum psora quoad formam conveniunt; sed a causis etiam viventibus, mox acri, quem vulnuscule inflicto instillant, succo, — mox ovulis, quae huc deponunt, — mox stimulo mechanico, tum plantis, tum animalibus summopere infensis, ad partes nudas, teneriores oriuntur: ut scilicet pustulae prurientes, ardentes, quas *culex* tum *pipiens*,  
tum

tum *reptans*, quas *pulex penetrans*, tropicorum incola, vel et *cimex lectularius*, ac alia non satis nota calidarum humidarumque regionum insecta inducunt; et quae pustulae, dum, scabendo irritatae, sat largos primum ac elevatos tumores praesentant, — post paucas modo dies in papulas vix a psora distinguendas mutantur.

Nunc acre *venereum* in cute psoram aemulatur, ac pustulas non tam prurientes, quam noctis potissimum tempore dolentes, universo in corpore, ne facie quidem excepta, producit.

Alias *hypochondriacis* solemne est pruritus in cute, et maculas, et pustulas, a scabie vix abludentes, cum caeterorum symptomatum levamine, experiri.

Sed interdum post febres, sub morborum chronicorum decursu, similia cum insigni aegrotantis emolumento contingunt, quae *psorae criticae* ideam frequenter dederunt.

In *scorbuto*, apud illos, qui carceribus, aut navibus angustis detinentur, aut in locis uliginosis, impuris, vitam ducunt, ad cutem pu-

stu-



stulae oriuntur, quae, etsi psorae figuram ac prurimum habentes, non tamen a methodo in psora laudata superantur.

Interdum *periodice* ad pellem pustulae comparent: quae, sub imagine psorae, apud illas, quibus menstrua sistuntur, istorum quasi vices ac decursum absolvunt.

Qui lanas impuras rancidoque oleo imbutas, *textores, sartores*, tractant, hi ad manus digitosque, — vel ad corpus universum, abdominali, aut scorbutico, aut alio ex vitio, impetiginem a *psora* diversam patiuntur ( §. 436. ).

A cutis *immunditie*, et apud illos, qui linthea ob miseriores conditionem cum aliis mutare non queunt, nec minus ab unguentis acriori cum oleo paratis, non raro pustulae, quae psoram fere referunt, ad cutem efflorescunt.

*Infantes* non raro vel a primis iam mensibus, vel dentitionis sub opere, universum per corpus, ne facie quidem excepta, a pustulis prurientibus, ac psorae aspectu, non indole similibus obteguntur.

Juvenibus, pubertatis sub principio, plethoricis, aut cursu luctaque exercitatis, — puellis, quibus menstrua aut instant, aut fluere recusant, rubentes saepe pustulae ad cutem, ac imprimis ad faciem, erumpunt.

Qui *Venere* abutuntur, hos ad cutem subinde quasi psorae effectus ac pustulas experiri ex observationibus constat.

In *senibus* interdum, ut herpes (§. 423.), sic et psorae simillima impetigo observatur: quae, remediis plerumque rebellis, ad mortem usque sub immani cruciatu continuat, atque indolem longissime a psora distantem manifestat.

In *thermis* forte calidioribus, ad omnem superficiem pruritus ac pustulas, quae psoram inexpertis referre videbantur, vel in illis adeo, quibus nulla cutis vitia praeciverant, frequenter conspeximus.

Nec tam rarum est, apud homines vel *scrophulis*, vel *rheumate*, vel alio demum acri laborantes, similia in cute vel ad certas modo partes, quasi vitio *locali*, vel ubique, ut in *hypochondriacis*, *melancholicisque* aegrotis, contingere.

§. 441. Vel ex sola jam specierum *psydraciae* ( §. 440. ) expositione , diversa illarum tum a *psora*, tum inter se ipsas, natura ac origo intelligitur; ac plurimae, ex illis, quas omnes hic adducere vix licet, aliorum potius morborum *symptoma*, quam morbum *primarium* constituunt. Neglectum interim causarum, quae talia in cute producant ( §§. 273. — 276. 373. ), studium, ac affectuum, qui vel internorum, vel istius ex vitio, ad corporis superficiem se produnt, non observata distinctio, fecerunt, ut saepius pro *psora* haberentur, et cum externis sine quovis respectu tractarentur impetigines, quae, fontem *internum* agnoscentes, non potuerunt non a tanto Medicorum errore frequenter exacerbari, repelli; et quae methodum ad *psoram* propositam ( §. 438. ), tam male sibi ipsis adhibitam, toties infamem reddiderunt.

§. 442. Morborum, ex quibus suam trahunt originem, *psydraciae* *symptomatae* sequuntur prognosim. Pauciores illae, quae ex *primaria* cutis affectione oriuntur, vix peri-

culum agnoscunt. Quae interim pellem a multo jam tempore defoedavit psydracia, haec, remediis externis derepente suppressa, sanitatem periculosa subvertit. Ex omnibus fere peior est, quae exsucca senum corpora consumit.

§. 443. Pro tam diversis origine malis ( §. 441. ), non una, sed multiplex medendi est ratio. Quae causam internam non agnoscit, et modo *localem* in pelle affectionem constituit psydracia, haec externis solum tractanda est auxiliis; et pro originis differentia, sibi alia, aliaque exposcit. Molestos insectorum ausus, tum Africae, tum Americae meridionalis populi avertunt igne per nemora ac domos accenso, fumoque tabaci, nec minus oleo, succisque plantarum diversis, quibus corpora quotidie inungunt. Praesentem ab ictu insecti dolorem, extracto vesparum apumque aculeo, cum aceto, limonum succo, oleo, linimento volatili, theriaca, impositis moderamur. *Penetrantem culicem* ( §. 440. ), sub tropicis, cum acu solícite effodiunt, ac cineres

tabaci ulceribus inspergunt. Quas cutis impu-  
ritas induxit psydracias, has balnea tepida,  
cum sapone, vel hepate sulphuris remista dis-  
pellunt. Psydraciae *symptomaticae*, ut venereae,  
scorbuticae etc., ex aliis hujus operis locis re-  
petenda est cura.



## ORD. II. GEN. VI.

## TINEA.

§. 444. **H**erpeti ( §. 420. ) affinis fere, sed ad partem capitis capillatam, vel ad faciem defixus, ac aetati infantili magis proprius est morbus, quem Veteres, *achorum*, *favorum*, *ulcerum capitis manantium*, — posteriora vero tempora, *lactuminis*, *crustae lacteae*, *scabiei*, *leprae capitis*, ac *tineae*, magis barbaro adhuc, nomine salutarunt.

§. 445. Interim hoc ultimum, seu *tineae*, civitate jam potitum nomen pro impetigine retinemus: quae in ulcusculis prurientibus, serpenticibus aut capitis, aut faciei, humorem viscidum, copiosum ac foetidum, in coagulum fere melleum properantem, fundentibus, mox crusta friabili, granosa ac molli, mox duro, crassiore, cinereo quasi cortice, obductis, consistit.

§. 446. Capillatae partis ad caput affectio,  
te-

tenuissimis foraminibus cutem perforans, unde glutinosus humor excernitur, *achor* Graecis dicebatur.

*Favus* autem vocabatur simile fere *achoribus* vitium: cum foramina meatuum, unde humor manabat, majora, *apum favis* respondebant.

*Tineam* adesse docebant, cum sanies ex cute cranii capillatâ exstillans ad pilorum radices in crustas friabiles, aut tenaces, ac albas coiret.

Si, qua ubera sugunt pueri, aetate, ad genas istorum prius calentes, rubentes, splendentes, vesiculae nascerentur prurientes, ac flavae, quibus disruptis ichor effluens in crustas friabiles, ex flavo luteas, cum pruritu ac dolore cogeretur, *lactumen*, *crustam lacteam* appellarunt.

Rebellem magis *tineam*, et quae ad ossis usque substantiam descenderet, cariemque exciteret, *malignam*, — quae plurimum ichoris effunderet, *humidam*, — et quae duras ac fere saeas modo crustas offerret, hanc *siccam* nominarunt. Non interim tam diversa mali, quam



nominum, natura est; ac sede magis, aut aspectu, atque gradu, quam indolis ratione, in illo nascitur differentia.

§. 447. Qui achoribus aut favis subjiciuntur pueri, his pruritus inter capillos molestus, cutis tensio et ardor, vel et porrigo, praecedit; nec rarum est, glandulas lymphaticas circa col- lum et occiput his tumere, ac tensionem, do- lorem, ab attactu inferre. Apud alios cepha- lalgia hos affectus annunciat. Augetur jam pru- ritus et scabendi necessitas: quo sub opere a digito aegrotantis aut *tumor* latus, calescens ac tensus, aut *papula*, seu *pustula* inter capillos percipitur. In illo vix ulcus, sed dilatati qua- si canaliculi, seu ductus folliculosi ostiolum, ex quo humor glutinosus lente distillat, con- spicitur; in ista, quae tuberculum super cute elevatum, circumscriptum, folliculosum, pisi- forme, vel conicum, ad basin satis durum, cum apice molliore, albescente constituit, li- quor albidus, flavescens continetur: quem fo- ramine ampliori, aut exeso, aut exilibus, sub- rotundis excrescentiis obsesso, inaequali, foe- tentem ac pigrum eructat. Hic ichor vicinos  
in-

inter capillos effusus, impura quasi palude eosdem inundat; mox ab aeris attactu coagulatur, ac pilos, quos amplectitur, conglutinans, mox tubera crustosa, exterius squamosa et sicca, interiorius molliore, granosa, quasi cerea, putrescente materia repleta, ac securum fertilissimumque pediculorum nidum efformat.

Si plures ac sibi vicinae, aut confluentes forte pustulae capillitium defoedent: tunc uberiori ex fonte distillans ichor vicinas plagas sub tecto crustoso abscondit, aut, picis liquefactae super cranio effusae adinstar, qua late patet, capillatam, et frontis adeo vicini regionem obducit; ichoris unda, quae sequitur, primam jam solidescens, — secundam tertia repellit, findit, ichore novo fissionem replet, incrustat, ac singula in durum, squamosum, interjecta capillorum substantia horridum, crassumque cooperculum compingit. Interea latens sub isto sanies subjectam pellem aggreditur, capillorum radices hinc inde effodit; vix tamen bulbos istorum, sed cellulosa magis telam vicinam erodit, consumit, ac, si forte virus venereum accedat, sub dolore atro-

ci, nocturno, vel ipsis calvariae ossibus perniciem minatur. Hinc major hoc sub vitio inquietudo, ac pendens ab ista nutritionis defectus maciesque, — apud alios, vix magna salutis laesae symptomata occurrunt. Interdum locum vix tinea mutat; sed in situ eodem aut sicca, aut humida, vix aucta, persistit, seceduntque pili, quos alba in quibusdam lanugo restituit.

*Tinea faciei*, seu, ut male satis vocant, *crusta lactea*, in pueris sextum vix aetatis mensem adeptis, vel ultra annum haud natis, — interdum, licet raro, et tardius, occurrit. Infantes haec affectioprehendit, qui, *dentitionis* sub opere versantes, albidiori, subrotunda ac pingui simul facie, genisque profunde, aut ex flavo rubris instruuntur; qui scrophulosis ex parentibus descendunt; qui lautius et lacte crassiori nutriuntur. Utplurimum ad genas, non raro ad frontem, species haec tineaepincipium sumit, et sese calore, rubore, splendore, ac partis pruritu manifestat. Mox pustulae, parvaeque nunc latae, nunc acutae vesiculae, liquore pellucido, et albo flavescente

repletæ, efflorescunt. Hæc vel sponte, vel scabendo disruptæ, tenacem, flavum, et in crustas ex luteo subrubras, friabiles abiturum liquorem effundunt. Interea novus mox ichor primo succedit: qui mollem fissumque jam corticem penetrans, ac per loca declivia decurrens hæc ipsa obducit, ex alio propinquæ pustulæ impuro fomite augmentum sumit, et in larvam hinc flavam, obscuram illinc, densumque in corticem mutatus, modo genas ac mentum, modo faciem, exceptis oculis, universam, sub insigni infantis pruritu, inquietudine, ac non sine corporis pendente ex istis macie, defœdat. Nec tamen palpebris ubique parcit hic morbus; aut ad partes longe alias, ad aures, ad artus, vel ad truncum non divertitur, quin ideo vel minimam aut in facie aut alibi cicatricem relinquat. Cum aliqua *periodo* tum eruptio, tum exsiccatio pustularum in multis contingit, atque tot fere dies ad primum, quam ad secundum hoc opus consumuntur. Eruptionis sub stadio vegetior ac hilarior puer esse, — cum pustulæ siccantur, languere observatur. Eundem infantem *bis* hæc ipsa affectio

tenuisse observata est; sed tandem sub urinis, ut felis illae, foetentibus, copiosis, sponte, licet tardius, disparet.

§. 448. Aegritudinis tam late inter primae aetatis homines extensae causas vix satis perspicimus. Nec etenim parentum, nutricum, hic vitia vel ubique praecurrunt; vel tam certe prolis sanguinem, ut vulgus credit, inficiunt. Nec in ipso hoc vitae exordio, sub victu tam simplici, ac mente a pathemate fortiori tam libera, humorum tanta, ac volunt, acredo supponitur prudenter. Contagia in tinea tum capitis, tum faciei, si veneream illius aliquando originem excipiamus, non firmo satis argumento nituntur. Accedit, quod tinea faciei, dentitionis vix absoluto negotio, vel sponte dispareat; quod illa capitis, modo paucis adultis pubertatis a tempore, nisi lue venerea detentis, adhaereat; et quod tinea communis externis, plerumque sine damno, remediis, quod interna vix unquam possunt, tollatur auxiliis. Veteres, ut ubique, sic et in achorum favorumque explicatione, ad *bilem*, — Recentiores,

res, ad *mucosos, acidos, acresve humores*, pro more seculi confugerunt; sed quo subtilius his in rebus ratiocinari, — eo minus ad lectulum fecisse videbantur: ut tandem ipsis a Medicis, difficultatum curandae tineaе pertaesis, hic labor vetulis ac empyricis hominibus committi debuerit. Istorum <sup>ausibus</sup> instructi non pauci morbum, de quo agimus, non ex fluidis, ut pridem, sed solius corii capillati ex vitio locali, curationis externae melioris successu suffulti derivarunt.

Jam solus hic experientiae sermo, seu rerum eventus, pristinae loquacitatem theoriae abunde refellit: sed cur demum vix gremio emissus puer tot morbis ad caput imprimis laboret, et cur tinea tum istius, tum faciei, ad certos fere vitae humanae annos limitetur; hoc, sicut obscurum, ita perscrutatione Medentis indignum non est. Major capitis neonati ad corpus caeterum proportio, vasorum cerebri, calvariae totius, majora lumina, hanc supremam hominis partem prae aliis eo celerius, quo viciniore est ortui, nutriri, ac humorum quantitate uberiori perfundi, demonstrant. Hanc natu-

tu-



turalem capitis plenitudinem in prole jam utero exclusa saepe augent tum velamenta, quibus illud obruitur, calidiora, tum fasciae, quibus pueri corpusculum et artus tam stricte involvunt, ac alia circulationi humorum per ista, opposita obstacula. Accedit magna parvulorum multorum voracitas, ac lactis uberioris et nutriente principio ditioris felix digestio: quae specialem vasorum capitis repletionem in multis augere, ac ad morbos ex ista praedisponere valebunt. Quo vero tempore dentitionis ingruunt molestiae, nemo est, qui ex capitis calore aucto, ex rubore genarum, ex salivae ac mucii uberioris effluxu, ad majorem hac in parte irritationem, et humorum ex ista pendentem derivationem concludere recuset. Quid vel sola partium sensibilitas adaucta in producendis ad cutem morboris secretionibus valeat, jam satis evicimus (§§. 228. 274. 276. 359. 373. 386. 394.); ac illa, cum indicata jam vasorum capitis repletionem, istorum vires excedente, tum frequentes encephali sub aetate infantili hydropes; tum innumeros aurium, oculorum, oris nariumque affectus, tum denique singularem syste-



stematis lymphatici hac in parte irritationem, ac secretionis in cute, tum capillatâ, tum ipsius faciei, vitia, ad certam modo aetatem restricta, non parum illustrat.

Interim non unam ideo ac eandem semper istorum originem subesse dicamus! Venereae, quae adultos, vel et ipsos infantes divexat, tineae exempla, — causarum, quae porriginem inducunt ( §. 416. ), auctoritas, — pediculorum noti effectus, materiae morbosae facta ad caput metastasis, — scrophulosa haereditaria dispositio, diversam impetiginis, de qua agimus, scaturiginem abunde demonstrant: sed hoc unum, communem scilicet tineae tum capitis, tum faciei, causam plerumque non internam, sed universo nunc capiti, nunc corio capillato, nunc dentium viciniis fere propriam ac *localem* esse, ex dictis eruimus. Quae ex retropressis, ut ajunt, vel proficuis forte alio sub morbo tineis, ad comprobendam causae illarum *internam* originem afferuntur, exempla: ea non aliam plerumque, ac de psora vetusta, vel complicata, praepostere topicis remediis exsiccata attulimus ( §. 426. ), explicationem ad-

mit-

mittunt, ac fallaci nimis argumento superstruuntur. Forsitan haud aliter sensiliores, pinguesve infantes ac pueri, qui lautius nutriuntur, ad caput, lymphaticum, concrenentem ichorem, — quam arbores juniores solo fertili commissi ad corticem sua *gummata*, plorant; et accedens his succi nutritii divitiis, dentitionis ab opere, irritatio, in teneris pusionibus ad faciem vesiculas crustasve, — in pueris sub immunditie, pediculorum inter capillos stimulo, nisi narium haemorrhagiae, coryza, alii-que fluxus, aut citius forte corporis incrementum, materiam divertant, achores, favosque producit. Si pauperum non minus quam divitum progeniem hi morbi invadant, cogitetur oportet, ex pane secalino non pauciores, quam ex tritico nutrientis copiam materiae a sanis hauriri; nec egestas parentum, quod sibi, — hoc parvulis dilectis, miseriarum ac laborum adhucdum ignaris, detrahere consuescit. Lac igitur nutricis adultae vel crassum, copiosius ingurgitatum, si a pueri sugentis ventriculo superetur; non ob viscidum, aut acidum, quem sanguini abhinc induci contendunt, mucum, —

sed

sed ob nutrientis, quo abundat, principii exuberantiam, ad crustam, quam lacteam appellant, infantem disponere dicendum est. Urinae hujus morbi sub fine excretæ foetor nec ubique se manifestat, nec magis de mali causa per has vias ejecta, quam de turbarum prægressarum effectu testimonium largitur; ac in genere tum sudorum, tum urinae, ut alterius morborum sub fine secedentis materiae vel odor, vel alia conditio, de morborum causis sat æquum ferri non sinit iudicium ( §. 7. )

§. 449. Ad secundam valetudinem puerorum; capitis impetigines plerumque contribuere, opinio est vulgi. Nec vulgus tam sæpè, ac Medici opinantur, de morborum successibus iudicando, a vero aberrat. Non quidem in eo, qui sanus est, ut sic esse continuat, requiritur morbus: sed talis est multorum infantum voracium, succiplenorum conditio ac vitæ modus, ut a nutrientis principii copia, nisi corporis incremento sat rapido, vel aurium, vel narium alvique fluxu dissipetur interdum; cellularis tela omnis subcutanea, imprimis ad col-  
lum

lum ac faciem, mire turgeat, et succis a vero adipe distinctis infarcta, cruoris motui per laxa vascula potenter resistat; aut data quavis occasione, vel sponte, contentos humores, ac humana quasi gummata regurgitet. Quod si talia contingant, mox major in pueris hilaritas, ac functionum oppressarum libertas observatur: quae singula, dum saluti huic exuberantis principii nutrientis stillicidio per artem vel repente nimis, vel sine quovis ad causam respectu, resistitur, cum damno — non ob retentam, quae corrupta sit, materiam, sed ob luxuriantem, quae consumi omnis a corpusculo sat cito non possit, nutrientem materiam, languebunt. Si aliam et complicatam magis originem, ut veneream, metastaticam etc., haec impetigo agnoscat: tunc utique, sicut topica remedia non sufficiunt, ita, donec ipsa morbi causa superetur, periculosus eorum usus esse potest. Sed vel communissima, simplexque tineae, si diutius persistat, ob continuos pruritus, ob vigilias, inquietudines protractas, interdum vero ob nimiam succi nutritii per larga haec ulcera jacturam, debilitatem ac maciem,

riem, vel et lentam febriculam inducit: qui tamen ipsi effectus, licet aperte morbose, obcontractam jam forte habitudinem, sine damno derepente auferri non queunt; vel, si hoc ipsum tentetur, tum asthmata, hydropes, tum viscerum glandularum infarctus, suppurationes, metastases, caecitates, ac tabem ipsam, relinquunt.

§. 450. Hinc primis hujus morbi signis occurrere, causasque illius latentes investigari oportet. Si venereae, scrophulosae, aut alterius symptomaticae affectionis indicia compareant, ad primarii curationem morbi veniendum est. Si ex lactis crassioris, voracitatis ac plenitudinis effectu haec vitia oriantur, tunc ubera mutanda, lactis copia gradatim restringenda, transpiratio promovenda sunt.

Quibus caput ab ulceribus manantibus, aut a tinea affectum est: his primum victus moderatus, corporis exercitium, ac summae capitis mundities imperanda, capilli, quin frigus repentinum noceat, rescindendi, radendi, ac pediculi, si abundant, cum axungia, vel sapore molli ac albo, cui olei distillati, vel aiasi, vel lavendulae guttae aliquot adduntur,

— cum butyro, seminibus apii petroselini, in formam unguenti, remisto, — aut cum semine sabadillae, cucuphâ, quae caput arcte circumdet, recepto, per noctem aliquoties impositis necandi sunt. Jam vero crustae, quae curam ulceris manantis impediunt, emolliri, ac, ut decidant, praeparandae sunt. Favorum aethorumque illae, difficultatem non afferunt; sed vel praedictis unguentis, vel decoctis emollientibus jam cedunt. Ast crustas tineae rebellis fere saxeas ac profundas unguenta sola vix penetrant; et pars exterior ac durior illarum cum novacula caute radenda, auferenda est. His praestitis, cataplasma ( N. LIII. ) molle ac tepidum continuo imponimus, et quotidie, donec omnes fere crustae deciderint, renovamus. Alii, solutione mercurii sublimati, cum pane in cataplasmaticis formam redacta, — alii, arcano quondam, ex bufonibus calcinatis pulvere, hoc scopo utuntur: quorum primum glutinosum nimis, — alterum nullius virtutis esse remedium, experientia aliorum testatur.

Patentia nunc ulcera cum urina recenti ac sana quotidie lavantur, ac mox unguento po-  
pu-



puleo, vel unguento *albo* ( N. XLVI. ), aut *rubro* ( N. XLIII. ), aut demum citrino ( N. XX. ) mercuriali, obiecta, tali methodo simplicissima ad sanationem perducuntur. Aliis solutio phagedaenica ( N. LII. ), aut simplex mercurialis ( N. LI. ), vel decoctum tabaci, rebelle ulcus depurat. Si dura quaedam loca his auxiliis domari non possint, haec ipsa vel unguento simplici, cui octava pars pulveris cantharidum remista sit, vel caustico interdum remedio, ut butyro antimonii, cum aequali spiritus sulphuris portione, vel et lapide infernali prudenter tangenda, ex mox carptis filamentis, quibus butyrum symplex illitum sit, obtegenda, cum vero eschara deciderit, cum unguento Aegyptiaco, vel mercuriali albo, vel rubro, depuranda, ac tandem ad cicatricem perducenda sunt. Totius ulceris exsiccationem aqua saturni, vel calcis tandem sine damno coadjuvat.

Non tamen omnis sic tinea sine crudeli pilorum evulsione ad finem constantem perducitur; ac in casu mali pertinacioris, ad hoc demum recurrendum est subsidium. Si paucas



modo capitis plagas occupat tinea, tunc volsella capillis prope radices apposita, hi ipsi cum bulbis extrahendi sunt. Si nimis extensa est affectio, tunc ex pice alba ad ignem liquefacta, cum pauxillo farinae secalinae, ac olei olivarum, emplastrum paratur: quod linteis digito vix latioribus, sat longis, hinc pluribus, commissum, ac leviter calefactum, tineae, resectis prius capillis, imponitur, et post horam, sine impetu, ac lente, cum sat multis, qui huic adhaerent, solutis jam a morbo, capillis detrahitur, ac pro re nata iterum aliquoties imponitur. Alii emplastrum ex pice nigra plures per dies his crustis imponunt, atque illud cum istis, ac pilis repente detrahendo, caput omne cum impetu quasi decorticant. Hanc methodum non parva saepe partium insequitur inflammatio: quam butyro, betae foliis inuncto, sedare contendunt, et quae interdum venaesectione ac aliis indigebit auxiliis.

Alia quidem, ut diximus, in tinea primaria vix indicantur, quam *localia* remedia. Interim in adulto jam malo vel fonticulus, vel alia, per emplastrum vesicans ad nucham, ad

bra-

brachia; vel per corticem thimeleae inducta  
 exulceratio, vel et alvum purgans hinc inde  
 remedium, ac pulvis antimonialis ex Aethiope  
 ( N. LIV. ), aut alter ex sulphure antimonii  
 ( N. LV. ) ad securitatem majorem, commen-  
 dari merentur.

Ad *tineam faciei* quod spectat, ea quidem,  
 quod vel sponte tandem dispareat, ac damna  
 vix habeat, remediis, ut illa capitis, violentis  
 non indiget. Interim cum continuus pruritus,  
 ac vigiliae infantem disturbent ac emacient,  
 in causis hujus incommodi ( §. 448. ) auferen-  
 dis, et ad citiorem, quam quae a natura prae-  
 stetur, morbi curam obtinendam, auxilia re-  
 quiruntur. Experti et clari in arte viri con-  
 silio, a multis jam annis hoc rerum in statu  
 confirmato nos quoque *jaceam*, seu *violam tri-*  
*colorem* hoc in morbo tentavimus, ac variis in  
 casibus haec planta spem nostram implevit, in  
 aliis vix tantum praestitisse est visa. Exhi-  
 betur vel *recens*, in lacte decocta ( N. LVI. )  
 quod mane ac vespera infanti porrigitur; vel  
*sicca*, in pulvere, ad drachmam dimidiam quo-  
 tidie: quo sub usu tum alvus non raro, tum

imprimis urina, cum foetore, qualem jam descripsimus, apud varios cum fructu, moventur. Foliorum quoque *farfarac tussilaginis* decoctum, omni bihorio ad unciam dimidiam per menses porrectum, alterius sibi Viri laudem, quam in scrophulis jam dederant, promeruit; ac de primulae veris saturato decocto similia, a nobis necdum tentata, referuntur. Plura interim, quae, tempore longiori porrecta, hoc in morbo utilia dicuntur, an hic ipse vel sponte vel per artem recesserit, nobis dubium relinquunt. Externis hac in tineae remediis vix locus est; et quae illam exsiccant, cum damno admoventur. Fortiori tamen a crustis durioribus tormento vel malvae decocto, vel lactis cremore dulci occurrimus, ac simul alvum cum syrupo cichorei cum rheo, vel cum manna, sine stimulo movemus. Si utriusque sub tineae decursu vel ob incautam medelam, vel ob alias rationes, alterius forte mali peioris symptomata occurrunt, et ab illius suppressione pendere videantur: tunc habita tum causae suppressantis, tum praesentis affectus ratione, ex traditis in casu simili praeceptis (§§. 290. 320.) consilium petendum est.

ORD.

## ORD. II. GEN. VII.

## LEPRA.

§. 451. Vix una ex descriptis hucusque impetiginis speciebus existit, quam Veteres, et aevi medii Scriptores, — non modo cum fortius urget, sed et mitiori sub habitu, interdum non declarassent pro morbo, quem nunc veris ac distinctis coloribus depingere, ob hujus raritatem, tam ardui res laboris est. Etsi vero haec ipsa difficultas in sermonis apud Antiquos de *lepra* obscuritate, in *Arabum* garrulitate taediosa, ac in *Arabistarum* hos caeca fide exscribendi consuetudine fundamentum agnoscat: insignis tamen symptomatum, quae illam vel ut futuri *indicium* morbi comitabantur, vel ut frequentior effectus, circumfluebant, copia, — ut in altera nunc *lue*, quae *lepram* in Europa paullatim exceptit, ad imaginis manu Veterum delineatae ambiguitatem summopere contribuit. Vel sola cutis macula, vel pilorum defluvium, vel porrigo, vitiligo imprimis, herpes siccus, vel squamis, tuberculis, ulceribus ob-

sessae pellis conditiō, quin solae in cruribus varices, suspicionem de *lepra* apud eos movebant; apud quos vel ob contāgii perpetui, vel ob causae communioris ac in plurimos eundem ad finem conspirantis rationem, impetigo leprosa cutaneorum et principium et finem morborum formāre solebat.

Interim vix tanta rerum confusio ex Veterum hoc de morbo doctrina nasceretur, nisi infelix eorundem de *quatuor humoribus* theoria, et insignis Doctorum in morbo prorsus eodem nunc ex formae, nunc ex solius coloris diversitate subtilius distinguendo pruritus, accessissent. Sed et illud non parum hujus morbi historiam obscurat: quod, sicut semina vegetabilium diversa hoc sub coelo plantam inerem, — in illo fruticem altioreffingunt, ita *leprae* contagium, aut fomes, hac terrarum in parte, sub ista, — alibi, sub alia magis, forma excreverit; quin verus atque constans morborum floris character ex Veterum laboribus sat tuto ad nos usque pervenisset. Sic *venerae* quoque luis symptomata, sub coelo multum diverso, insigniter inter se differunt, ac morbos ob-

observatori incauto, ac originis primariae ignaro, fere quosvis mentiuntur. Quo vero tempore ultima haec lues Europam invasit, non mirum est, si tum istius, tum declinantis tunc *leprosae* affectionis, quae plurimum inter se conspirant, symptomata a multis commisceri, et aegritudine ab una ad alteram transferri videantur: quae singula sine dubio morbi apud nos quasi dispersi ac cessantis reliquias cum temporum obscurorum descriptionibus conferre, opus perdifficile nobis redderent, nisi Viri eximii susceptus nuper *de lepra Occidentis* utilissimus labor hoc sibi pensum assumere felici cum ausu voluisset. Nos quidem morbum, quem *Elephantiasin* Graeci dixerunt, semel ipsum, — sed oculo juvenili, in Veterum monumentis necdum satis versato, ac brevi temporis concessa mora, conspeximus: quam vero *lepram* hi proprie vocarunt, hanc pluribus exemplis impressam mente tenemus.

§. 452. Morbum tam proteiformem angustis definitionis cancellis circumscribere, res ardua est nimis. Nec enim natura, sed vehementiae modo gradu sedisque ratione, *Arabum, Graeco-*

*namque lepras* inter se differre putamus; et innumera symptomata, quae diversos apud populos, atque sub coelo eodem, aegritudinem eandem, alia aliaque circumdant, constantiam vix ullam, — sed cujusvis fere morbi atrocis phaenomena, ordine nunc isto, nunc illo disposita, in hac una ostendunt.

Quod si tamen ad praecipua hujus tetrae affectionis signa diagnostica sub variis *leprae* formis respiciamus: hanc dicemus atrocissimum impetiginis genus, cute aut *vitiligine* (§§. 402. 403.) *diffusa*, — aut *piscium* quasi *squamis*, *ulceribusque crustosis*, *orbiculatis*, *pertinacibus*, — aut demum *tuberculis nodosis*, ad faciem imprimis, ad manus ac pedes, inquinata, insigniter pruriente, aspera, rugosa, unctuosa, lividaque, cum dyspnoea, voce rauca, nasali, morositate, anaesthesia ac stupore, salacitate morbosa, alvo sicca, pedis deformitate, tumore elephantino, ulceribus profundis, ad ossa, articulos, sed paucio dolore, extensis, haec ipsa separantibus, foetore, ac aspectu totius horrendis.



§. 453. Haec vero ( §. 452. ) totius aegritudinis tum lehta primordia, tum limitatos ad cutem quasi solam progressus, tum summos ex ista in universum systema furores generatim concernunt; nec ubique tam atrox erat leprae natura, quin illam, quae *psorae* ferocioris in modum incederet, pro morbo ab *elephantiasi* diverso complures declararent. Qui interim considerat, morborum incrementa, tam coeli, victus, quam diversae apud homines constitutionis ratione, quamplurimum differre, ac in ipsa *Graecorum elephantiasi* saepe cutem non aliter, ac *Arabum* in *lepra*, ulceribus foedari: non difficulter hic sibi persuadebit, inter morbum utronque non aliam, quam vehementiae in *elephantiasi* majoris, differentiam intercedere ( §. 452. ).

Non tamen ideo vana est *leprae* diyisio, qua hunc morbum diuturnum tum in diversa sua stadia, — tum in praecipuas varietates, quibus corporis aut modo partem ( *Lep. localis* ), aut omnem compagem ( *Lep. universalis* ), aggreditur; — aut superficiem commaculat, exasperat, obtundit ( *Lep. alba*, scil. *Leuke*

*Grac-*

*Graecorum* ); — aut eandem exulcerat, ac crustis squamisque defoedat ( *Lep. squamosa*, *Lep. Graecorum* ); — aut pellis omnem, cum subiecta adiposa, substantiam in tubera nodosque attollit, corrugat, enervat ( *Lep. Elephantiasis*, *Lep. Arabum* ); — aut, ad manuum, pedumque articulos conversa, ea in crassas ac informes columnas infarcit, stupefacit, corrumpit, ac separat ( *Lep. Elephantia* ); — aut denique in simplicem, vel cum aliis affectibus complicatam ( *Lep. rubra* ), distinguimus.

§. 454. Ut impetiginum, quas novimus, crudelissima, sic inter omnes antiquissima, ac coeli ardentioris, Indiarum, Aethiopiae, Arabiae, Aegypti, primogenita quasi morborum filia, est *lepra*. Hic etenim locorum, quod Scriptores tum sacri, tum profani, ex vetustissimis, indicarunt, — sed forte et ad frigidioris septentrionalis oceani litora, exstructum primitus, et ad nostra usque tempora intactum, figitur dirissimae hujus luis habitaculum. Ex Aegypto haec in Asiam ac Graeciam ob mutui commercii rationes forte prius, quam alias

atque gentes, migravit; sed quo sibi tempore Romani Orientem victores submiserunt, per Italiam haec pestis ac per omnem Europam propagata est. Vix interim temperatum hoc orbis solum peregrino morborum semini diutius favore, sed et ipsum in illo, nisi alio, recenti, suffultum, languere ac soffocari videbatur: cum primum pietatis ambiguae instinctu Orientem visitandi, ac demum hac parte terrarum potiendi commune Europaeis desiderium, hanc stragem populorum, donec altera, non minus peregrina, eandem imperio expelleret, revocasset. Eo scilicet a tempore, si modo pauca, quibus infaustum illud leprae seminium adhuc dum adhaeret, loca excipimus, vix multa hujus morbi provecti exempla in Europa occurrunt, sed, novae infectionis pericula ex incauto cum populis hac a lue notatis commercio instare, infelici parentum nostrorum sorte admoniti veremur.

§. 455. Stadia hujus morbi (§. 453.) ex symptomatum successione, ac leprae tum principio, tum incremento manifesto, tum summo fastigio, divisionem admittunt.

Quae.

Quae a fomite hujus luis suscepto contingant, non minus ea hoc ipso, ac viis, per quas corpus ingreditur ( §. 460. ), obscura sunt et dubia. Lassitudinem generalem, morositatem, horrores cum caloribus ac *aestu interno* commistos, aut interdum *quartanae* quasi typum observantes, *formicationis* inter cutem carnesque, imprimis *faciei*, *sensum*, et locales adeo affectus, hic plures accusarunt; sed morbi tam lenti sub decursu, forte plura, quae ad ipsum non spectent, contingunt, nec leprosus a febris, aut ab alio contagio prorsus immunis videtur. Interim recens adhuc morbi virus febrem interdum accendisse, et per hanc ipsam subinde cum impetu ad cutis superficiem mox depositum fuisse, observationes tum aliorum, imprimis de lepra *elephantia locali* ( §. 458. ), — tum propria de lepra *squamosa* ( §. 457. ), testantur.

Sic, elapso vix anno, feminam triginta circiter annorum hoc ad *Clinicum Institutum* suscepimus: quae duarum licet jam prolium mater, nec tamen in vita fluxum experta erat menstruum, et lochia paucissima post partus

ex-

excreverat. Haec per quadraginta quinque jam dies a febre, ac simul ab impetigine crustosa, squamosa, universam ad cutem correpta nosocomium petierat. Faciei rubor insignis, ac plurimae tum in ista, tum ad partem capitis capillatam, ad collum, pectus, abdomen, dorsum, extremitates, crustae tum flavae, tum subnigrae. Inter istas, cutis undique sulcata, aridissimo, hinc inde fissa, a squamis majoribus, cinereis oblecta. Dolor ingens, et calor ad attactum tam insignis, ut similem nobis nunquam in aegrotante alio observare contigerit; tumor pedum, ac genuum imprimis, dolentissimus; arteriae centum et triginta ictus minuto primo, interdum plures, durissimosque et contractos absolvebant. Tres igitur venae-sectiones brevi temporis intervallo institutae nobis sanguinem denso corio oblectum obtulerunt. Ingens squamarum copia quotidie in lecto reperiebatur; et quo loco cutem deseruerant, eo rubor ac cruda quasi caro, non ulcus, subjacebat, humorque tenax ac foetidus stillabat. Quamplurima hos ad aestus extinguendos porrecta sunt, quae hic omittimus, tum

tum interna, tum externa remedia, ac in balneum aegrotam demisimus frequenter, hoc effectu, ut trium fere mensium, a quo Clinicum petierat, intervallo, ab atroci hoc morbo restituta, sine ullo pellis vitio, ad suos redierit laetabunda.

Plerumque febris nulla hunc morbum aut praecedit, aut, si finem excipiamus, comitari videtur. Incipientis vero tunc morbi signa ab aegrotantibus vel celata, vel ad partes obteatas istorum collocata, vel nimis exigua, vel pro varis aut naevis declarata, ac saepius nullo aegritudinis sensu sociata, Medicorum haud raro cognitioni subtrahuntur. Altera iudicii difficultas huic primae ex ipsa signorum multitudine et significatione ambigua aliquando accedebant. Nunc etenim lentigines; nunc pannus, nunc macula rotunda vel alba, vel rubra, subflava, vel et nigra, pruritus expertes, — nunc porrigo, alopecia, aut ulcus, aut alia, hanc labem, — in aliis, modo simplicem benignumque cutis morbum indicabant.

Praecipue vero macula, plerumque una, vel et plures, figurae potissimum rotundae, aut

parum, aut nihil elevatae, ad faciem, axillas, vel pubem, vel ubique sub descripto colore, — ac vitiligines ( §. 403. ), extensionis nunc minimae, nunc lenticularis, aut interdum amplioris, — dum ambitus earundem vel in latum, vel in profundum, nunc citius, nunc tardius augetur, — dum pili, si quos fundus macularum haberet, aut subtiliores, breviores, rariores, lanuginosi, aut albi redderentur, vel et proinus defluerent, — ac demum cum locus hic inaequalis, depressus, aut, acu perfossus, vel igne tractatus, nequidem sensu consueto gauderet, aegritudinis latentis testimonium dederunt.

Color igitur in cute aut partis, aut corporis totius, mutatus, ac *sensus* in macula recenti *decrementum*, — in adulta, atque profunda, *abolitio*, si adsint, potissimam in lepra diagnosis constituant. An deficiens aut macula, aut anaesthesia, lepram semper excludat? hoc major, ac nobis esse potest, experientia docebit; nec in lepris, quas vidimus, tam scrupulose, ac forte decuisset, cutis omnem superficiem examinavimus.



Interim et aliorum signorum, simul scilicet collectorum, cum aliam originem non agnoscere viderentur, suo tempore non parva habebatur auctoritas. Ipsae certe *maculae* nunc acute recedebant, atque, iterum iterumque redeuntes, superficiem in parte vel ista, vel illa, jam interdum majores, elevatiores, magisque obscurae (panni), foedabant; nunc cum majori constantia sedem sibi vel unam, vel ad plura simul loca defixam, eligebant. Interdum non tam maculae, quam pustulae, aut siccus ac orbiculatus herpes praecedere lepram solebat. Animi corporisque segnities insolita, morositas, facilis iracundia, vel in dolos, suspicionem, dispositio, — insomnia tristissima, terrificae, ephialtes, — lascivia insueta, ac major viribus coeundi potentia, — oculorum albedo obfusata, turbata, vel rubra, aut livida, ac in nigrum declinans, figura oculi rotunda, *leonina*, — vox rauca, vel, rarius, acuta et subtilis, cum anhelitus foetentis strictura, — narium, exterius rubrarum, livescantium, interna angustatio, vel ulcus, frequens sternutatio, et privatio olfactus, — faciei infla-

flatio, cum magna validaque rubedine, ac pelle super fronte quasi tensa, et lucente, nodosa, aspectu torvo, — capitis, superciliorum, ac menti porrigo, pilus rarior, mutatus, alopecia, — sudoris foetor, alvi tarditas; eructatio perpetua; lotium subjugale, ac turbidum, interdum tenue, aquosum, — pulsus parvi ac lenti, — praecipua venientis leprae symptomata constituebant. Alia superaddidit insulsa hoc de morbo ejusque ex cholera nigra origine, theoria: quae singula ex Veteribus referre, humanae mentis esset satyram conscribere.

Per longos saepe annos hic morbus, vix uno alterove signo stipatus, mediam quasi per salutem translucebat, ac hominem ad extremas jam miseras damnatum quascunque functiones, illibatae libertatis fraudulento sub aspectu, exercere sinebat: donec vel in pueris pubertas, vel in adultis alia rerum mutatio, latentem sub cineribus ignem attonito aegrotante rapaces in flamas eveheret, ac lepram vel in parte, vel universo in corpore diffusam ostenderet.

Hunc igitur jam propectae aegritudinis statum sequentia, sub quibus utpote leprosum a

pópulo separari curabant, in genere comitari solebant. Vitiligo incrementum jam sumit, ac in profundum latumque nunc citius, nunc lentius diffusa, sensum omnem amittit. Nunc singula, quae morbum hucusque obscurius indicaverant, augentur phaenomena: increscunt se-  
gnities motuumque difficultas, insomniam terribilia, morositas, raucedo, faciei circa nasum rubor, livido, ac inflatio; turgescunt, dilatantur exterius, angustantur interius, nares; tumet genae, labia; protuberant supercilia, ac tubercula cinnabarino, subflavo, vel et livido, colore notata, has partes non minus, quam aures, frontem, ipsumque interdum palatum, exasperant, defoedant. Intermedia his cutis crassescit, et in plicas rugasque unctuosas contrahitur: unde facies, ut vocant, *leonina* efformatur, nigrescit, ac humanae imaginis delentur vestigia. In pluribus cutis undique ulceribus foetidissimis, crustosis, albis, et squamosis, cum pruritu ac ardore, dolore, cum tactu licet obtuso, insignibus, obtegitur. Corpus integrum, si modo partium dictarum tumores excipiamus, tabescit.

At-

Atque nunc fere hinc morbus ad summum fastigium (§. 458.) ascendit. Vox penitus extinguitur, foetorque animae et corporis cum spirandi labore continuo increscit; sub lingua grandinosa, raninarum venarum varices, quae et alibi, ad pectus, ad tibias oriuntur, subnigrae comparent; secedunt pili vix non omnes, et caput, et supercilia praetumida, liminaque palpebrarum, et mentum, et axillae, et pubes, tibiaeque glabrescunt; finduntur, incurvantur, et corrupti labuntur ungues; musculorum torositas omnis disparet, imprimis illorum, qui inter pollicem et indicem digitum sunt positi; ciborum digestio prava, ac flatuum incommoda, vel et fames in quibusdam caninae augentur; vix faeces alvus, — ac jumentosam continuo vesica urinam, expellunt; infausta Veneris cupido ac tentigines in consumpto ac morituro jam homine intenduntur; extremitatum articulos, phalanges, a carie latente erosa, tumores insensiles, alii juxta alios, circumdant; vel et ulcera sicca, profunda, sensuque vix praedita, deturpant; et cutis, hinc in plicas crassiores, nodosas elevata, — in sul-

cos ac rugas asperas, profundas, aut fissas alibi contracta, *elephantini* magis, quam humani pedis, figuram aemulatur; interdum nares, intermedia cartilagine erosa, collabuntur; aut prorsus, ut digitorum phalanges, aut integra quoque membra, a vivis vel sponte ac sine dolore separantur.

Haec fere morbi truculenti, prout diversis in locis comparet, ac *leprae* imprimis *nodosae* (§. 458.), horrenda est facies. Interim non ubique haec singula in omnibus leprosis occurrunt symptomata; sed in aliis, ut dictum est, superficiem, in aliis cutem integram, extremitates et articulos in aliis, pro sede sibi eligit furorum. Hinc ob varios ejusdem aegritudinis aspectus, interdum ob solas theoriae de *quatuor humoribus* rationes, in quatuor fere species (§. 453.), aut in illas, ab aspectu impetiginis desumptas, ab Auctoribus distincta est lepra: quas morbi varietates, modo paucis coloribus depictas, trademus.

§. 456. *Lepra alba*, *zaraab* Hebraeorum, *Baras* Orientis, *Leuke* Graecorum. Antiquior  
lon-

longe aliarum leprarum notione, atque clarissima istius *plagae* in sacris paginis descriptio est. *Morphaea alba* (§. 403.) frequentissimum huius principium fuit, et sicut ista, modo cutis superficiem maculare, — sic *lepra alba* profundius per cutem, carnes, et ad ossa usque descendere, hasque partes immutare, ac se ipsam dilatare consuevit. In vitiligine *morphaea*, quam *albam* vocavimus, si qui pili ad plagam, quam illa occupabat, aut sanam prius, aut cicatrice ab igne aut alia laesione violenta foedatam, haerebant: hi colorem non mox a principio, sed tardius mutare, — et macula rotunda, plerumque depressa, albescens, nec sensu in totum privari, nec incrementum habere solebant. Quod si vero *lepra* his e signis prodibat, nunc ex lacteo color niveus ac splendens *morphaeae*, ipsique pili albedine, tenuitate distincti, asperitas, porrigo, stupor, anaesthesia, dilatatio macularum manifesta cernebantur. Interdum et pustulae nunc rubrae, nunc citrinae, nunc durae ac lividae, nunc albae, molles, ac cito puriformes, vel et maculae coloris non albi, hanc *lepram* praecurrebant.

Cum magno aegritudinis augmento morphaea, dum locus fricaretur, ruborem non contrahere, aut ferro punctus, hic non sanguinem, sed humorem albescentem, sine sensu, ex profundo plorare, pilosque canescentes, aut albos, vix non omnes dimittere cernebantur. Aliquando universa hominis leprosi cutis nunc ulceribus pustulisque obtegebatur: quae in crustas albescentes, et squamas conversa, si modo carnes fungosae sub istis non laterent, *leprae quasi crisis* constituere videbantur. Cum vero sub laxiore solidorum contextu, ac facie inflata, morphaea hucusque depressa, aut plana, cum cute ipsa pallida, subtumida, molli, sed et sicca et aspera, in altum surgebat, ac furfures, vel squamas, ut pellem serpens (*Lepra Tyria*), deponebat, et rhagades, et ulcera viscosa, et caro luxurians hac in parte nascebantur; cum glandulae, sub cute alba, in mollem tumorem adauctae, oculi lacrymantes ac fatui, gingivarum, labiorum erosio, fungositas, palpebrarum inversio, narium oppilatio, emunctio frequens, salivae effluxus copiosus, venter laxus, urinae albae, crassiores, pingues, et saniosi quid ha-

ben-



bentes, unguium, corruptio, pilorum deflu-  
vium, pedumque tumor hydropicus, in conspe-  
ctum prodibant: tunc summum jam fastigium  
haec lepra attigisse, ac plura nunc morbi uni-  
versalis symptomata communia huic ipsi con-  
jungi videbantur.

§. 457. *Lepra squamosa, Lepra Graecorum.*  
Difficilis et fallax hujus varietatis leprosa a  
*psora* inveterata (§. 435.), — a *psyracis*  
diversis (§. 440.), imprimis a venerea, scor-  
butica, scrophulosa, senili, — et ab *herpete*  
*rodente, phagedaenico* (§. 422.), diagnosis est;  
et sicut lepram haec mala interdum mentiun-  
tur, sic ista hinc inde originem, alterius im-  
petiginis sub aspectu, leprosam agnoscunt.  
Nullum certe, quod satis constans esset, hanc  
ad lepram Graecorum signum perducit; et si  
*morphaeam nigram* lubentius ac frequentius in  
istam, quam in aliam, abivisse dicendum sit,  
nulla tamen cutis defoedatio aut porriginosa,  
aut pustulosa, occurrit, quae vitii illius prae-  
cursorem non saepius egisse videatur. Quae in-  
terim ad pellem crassam, coriaceam, inflexi-  
lem,

lem, tensam, asperam, aridam, inaequalem, sulcatam, ardentem, ac insigniter prurientem, nec facie excepta, crustae pertinaces, vix non callosae, verrucosae, nunc cinerei aut obscure albescentis coloris, nunc ex flavo subrubrae, vel subnigrae, ad corpus modo integrum, modo crura vel brachia potissimum, vel et partem quamcunque, sine causis alterius impetiginis manifestis, nascuntur, ac in piscium quasi squamas majores, rotundas, siccas, copiosas, vel et corticum testarumque, quasi nive, aut farina conspersarum, sub forma, a cute subtus aut cruda, rubente, aut fissa, sanguinolenta, aut erosa, resolvuntur, ac, iterum iterumque redeunt, dilatantur, — imprimis quae junctum hinc inde vel in confiniis stuporem, tactusque sensum obtusum, articulorum rigiditatem, unguium corruptionem ac lapsum, et pilorum ex parte affecta defluvium, aut colorem mutatum agnoscunt, — quae cum sudore nocturno et cum macie extrema incedunt: haec ad *lepram Graecorum* non immerito referuntur, et nunc solae, nunc ipsius morphaeae, vel elephantiasis sociae, incedunt. Si, malo prorsus  
lo-

locali, vel coxas tibiasque, vel brachia crustae densiores, elevatae, aridae, variique, saepe nigri, coloris, cum pauca sanie ulcus lividescens cum partis stupore, subinde cum inguinalium glandularum tumore, obtegerent: tunc *mali mortui* sub nomine veniebant. Interdum et haec species impetiginis, si copiose ad pellem effloresceret, *leprae crisin* constituere credebatur.

§. 458. *Lepra tuberculosa, nodosa universalis, Elephantiasis Graecorum*. Haec morbum, de quo agimus, in summo gradu constituit, ac aliarum varietatum symptomata, una cum illis, quae supra ( §. 455. ) indicavimus, fere singula complectitur. Non quidem haec lepra, *Aegypto* endemica, sub tropicis nec nostris temporibus rara, in Europa vix unquam tam frequens, nec prorsus tamen exul, ut in homine se prodat, aliarum varietatum decursum aut formas illarum absolvat, nec prodroma ei signa, nobis quidem nota, habentur, ex quibus *Elephantiasin*, non lepram aliam, futuram esse, sat tuto concludatur; sed praeviis,

mo-

modo febre, imprimis vero maculis, vitiligine morphaea, erythemate varicode ( gutta rosea ), modo pustulis, herpete sicco, orbiculato, jam cutis, ad faciem plerumque, sed et alias ad partes, potissimum ad articulos, ad manus atque pedes, nodosa, tuberosa, cum descripto istorum *elephantino* tumore, aliisque jam satis ( §. cit. ) enarratis phaenomenis, segnitie totius corporis spontanea, mentis ignavia, proclivitate in somnum, per insomnia turbatâ, stupore, anaesthesia, atque squamis pertinaciter adhaerentibus, ulceribus nunc aridis, nunc rodentibus, subflavis, vultuque nodoso, rugoso, terribili ( *Lepra leonina* ), comparet.

Interdum lepra nodosa *localem* magis, quam universalem, ut diximus, affectionem constituit, morbique materia cum totius emolumento ad articulos, manuum, imprimis pedum crurumque, vel ad ungues abinde foedos et *globosos*, deponi videtur. In plurimis, sub morbi principio, febris manifesta, cum rigore, calore, deliriis, inguinisque dolore, tumore glanduloso, occurrit. Mox cruris hac in parte, aut utriusque, inflatio, rubedo, ac dolor, interdum

dum cum stria rubra, sat lata, vasorum lymphaticorum decursum indicante, insequuntur: quo tempore et febris et tumor glandularum inguinalium subsidere observantur. Saepius, sed tempore incerto, haec febris revertitur; et in crure, post quemvis insultum, incrementum tumoris, oedemati consimilis, sed magis renitentis, conspicitur: donec, sub melioris valetudinis, si modo *sitim* in quibusdam intensam excipiamus, aspectu, pedis elephantini figura, nunc aequalis, nunc per sulcos plicasque divisa, emergat; et sub pelle crassiori, squamosa; humor tenax, glutinosus, cellulosa dilatata; tenaciori, ac varicibus depicta circumseptus; in substantiam lardaceam concreascit; vel ex cute disrupta, per fissiones, per ulcera impura, fungosa distillet; aut pars ipsa, sine sensu, post longos modo annos, a vicinis separetur. Interdum localis hic tumor nunc manus, nunc brachium, nunc aures, vel nucham, nunc dorsum, vel lumbos, nunc ipsa pudenda, occupasse est visus; sed frequentior ad pedem ejus sedes est, ac tandem se ex isto universum per corpus dilatasse describitur.

§. 459. *Lepra alopecia*, *Lepra rubra*, *Lepra complicata*, *scorbutica*. Hujus varietatis ab *erythemate varicode*, seu gutta rosea (§. 397. 399.), principium desumi, est Veterum doctrina. Hoc, insons plerumque nunc temporis, faciei nariumque vitium, nunc leve, nunc pustulis aut siccis, aut saniosis, crustosis distinctum, — interdum non dissimiles aliis in partibus rubores, — ut *lepram elephantiasin* (§. 458.), sic et eam, de qua nunc sermo est, varietatem, praecedunt aut pessundant. Facies hic, et genae, et nares, a tumore profunde rubicundo; pruriente, pustuloso, crustisque saniosis defoedantur, maculae aut flavae ad cutem comparent, ac sponte recedunt, gingivae fungosae ab actu leviori mox cruorem emittunt halitusque ac sudor, ac urinae subpingues, aut crassae et rubrae, vel et sanguine commistae, foetorem expirant; ulcera saniosa et rubra superficiem inquinant; supercilia ciliaque pilos in totum amittunt, inflantur, et oculos rubentes lacrymantes nascondunt. Quod nisi facies potissimam hujus morbi sedem formare videretur, nisi tumor superciliarum pilorumque existis

istis defluvium accederent, non tam *leprae*, quam *veri scorbuti*, hac in descriptione ex Veteribus deprompta imaginem haberemus. Interim et suam *leprae* cum scorbuto, venerea cum lue, cum scrophulis etc., *complicationem* concedimus lubenter, quin ideo aut *rosam*, ut appellant, *Asturiensem*, aut endemicam Nostratibus *Pellagram* huic *leprae* varietati pro argumento esse, hucusque ex rationibus suo tempore referendis opinemur.

§. 460. Quid *lepram* in homine producat; hoc, nisi principium esse dicatur, quod ex parentibus per haereditatem in proles, aut ex infecto quovis, ut contagium, in sanum se transfundat, difficulter eruitur. Vel ex victu perverso atque piscium corruptorum ex usu, vel aquarum locorumque ex infausto imperio, vel ex terrore majori, ac fortunae adversitatibus hunc morbum popularem derivari, vetant rerum earundem sub eadem positione in gentes diversas ac plurimas effectus non idem, et causarum tam communium non exspectanda tam singularis in paucas modo tribus operatio. Ipsa  
in-



interim contagia, ut ad alios propagentur, certas sibi rerum conditiones omnino exposcunt: atque sic coeli tum calidioris, tum frigidioris ac humidi, constitutio haec ipsa fovere, atque cutem habitantium hoc pro semine recipiendo disponere videtur. De *haereditario* leprae ex genitoribus in prolem, aut saltem in ipsos nepotes, transitu, copiosa, et hodierna adeo, exempla sine dubio testantur. Non eadem de *contagio* certitudo habetur, et innumeri leprosi cum sanis uxoribus, insatiabili quidem cum libidine, sed sine damno istarum manifesto, concumbunt. Mulierem a lepra *squamosa* jam multos per annos insigniter affectam, ac non modo *prolium*, hoc a tempore genitarum, *sanissimarum* matrem, sed cum proprio marito, eodem in lecto sine noxa istius, cubantem, nos ipsi conspeximus. Non vanae interim sunt leges, quas ad lepram Hebraeorum (9. 456.) Legislato antiquissimus tanta cum sapientia, — et quas populi vix non omnes, ad horrendam hanc luem a civibus avertendam, ubique tam solícite tulerunt: et vel ipse, quo hic morbus Europam repetito invasit, modus, —

tristissima ac recens insularum variarum inter tropicos positarum historia, ac infauftum cum infectis *Africae* incolis in servitutem conductis commercium, nec minus complura leprae ex longa atque intimiori cum infectis consuetudine contractae exemplâ, abunde docent: *contagium* huic morbo, licet *lentum*, ac modo paucis praedispositis nunc quidem infestum, subesse; nec ob insons hodie apud plures cum *leprosis* commercium posse leges, quas quondam neglexisse Europam non semel poenituit, sub tam incertis rerum mutationibus, humanitatis sine damno aboleri. Quo tamen modo, et per quas demum vias hoc ipsum contagium suscipiatur a sanis, — quas partes id primum invadat et inficiat: hoc non minus, quam ipsius virus natura ac indoles, nos protinus latet. Infantes hoc minus feminasque, ac viros, infestasse, — et quibus *testes* ex istis resecti fuissent, hos aut nunquam, aut mitius affecisse contenditur ( §. 462. ). An, quod minora infectionis pericula, quam alii sub coitu, incurrerent *Eunuhi*? an ob rationem eandem, qua lepra *haereditaria* pubertatis sub tempo-

re potissimum, — nec sine insigni ac fere proprio partium genitalium, atque generis nervosi stimulo, prorumpit? . . . ignoramus, sed certe et *impuberes*, a parentibus leprosis oriundi, leprae signis maculati incedunt. *Blennorrhoeam* ex *lepra sola* apud quosdam venisse, ob utriusque antiquitatem mali, suspicio esse potest; certitudo non habetur. Ab *insectis*, quae utique sua ova aut larvas ulceribus, quae patent, quibusvis non raro committunt, lepram derivari, vix certa satis observatio concedit; nec illa, quae impetiginum origini adversantur, haec, ut psoram, sic et *lepram* seu *albam*, seu *nodosam*, dispellunt. Interim non minus tumores in *lepra elephantiasi* sub cute conspicui, quam *porcorum* in morbo proprio cutaneo, ut experimenta recentia, praeter ullam veritatis suspicionem, docuerunt, *causam* agnoscere *viventem* possent. Quae ex unico sub cute nidulante *gordio*, imprimis disrupto, symptomata nervosa orientur, experientia pernoscimus. Quaevis sibi *taeniae*, nec cerebro excepto, pro sede viscera certe eligunt: an in *tela cellulosa subcutanea* apud *leprosos* similia contingunt? an potius.

tius *glandulosam* tumor originem agnoscit, et *systematis lymphatici* lepra morbus est? experimenta illorum, quibus occasio se offeret, docebunt.

§. 461. Vix quidquam Medicinam in leprae curatione praestitisse, vulgaris est opinio: cui, quotquot hanc artem vel quondam exercuerunt, vel hodieum profitentur, si de morbo jam provento loquamur, non difficulter accedunt. Aequivoca signorum, quae hanc luem praecedunt, natura ( §§. 451. 455. ), sollicita eorundem ab aegrotantibus occultatio, causarum ignorantia, et singularis, quo nervosum systema hic laborat, stupor, hanc artis impotentiam excusant. Incipientis tamen leprae, ac morbi jam satis manifesti cum successu dissipati, aut saltem mitigati, exempla non prorsus deficiunt, ac in genere, *squamosae*, quam aliarum leprarum, facilior, aut saltem minus ardua, est curatio. Vitiligo morphaea, in quantum nec numero, nec in latum, nec in profundum crescebat, nec latentem in suo ambitu pilum aut colore immutabat, aut graciliorem, brevior, lanuginosum reddebat, aut

prorsus emortuum expellebat, nec sensu vel calore carebat, sed a frictione rubebat, et ab acu perfossa, doloris non expers, cruorem fundebat: leprae metum praesentis deponi, ac morbi, nisi nimis jam adulti, sanationem sperari concedebat. Contraria de morbi augmento, ac de fomitis morborum dilatatione plerumque funesta, testimonium exhibebant. Morphaeam *albam*, ad lepram hoc a colore vocatam (§. 456.), — morphaeam *nigram*, ad *squamosam* (§. 457.), plerumque conducere, experientia suffulti praedicebant. Hinc *albam praenigra* infamem declarabant, si diutius persisteret, morphaeam. Quid *lepram nodosam* (§. 458.) signorum praecedat? an quasi ex improviso, ac sub dubiis modo indiciis prorumpat? hoc, ut verisimile vix est, ita maximis adhucdum tenebris involvitur. Interdum universalis ad cutem efflorescentia, leprae, ut diximus, quasi *crisis* constituuisse videtur.

§. 462. Nemo est, qui pro morbo nunc temporis tam raro occurrente, et suas quoad cau-

sas tam obscuro, medendi methodum ab experientia, quod magis interest, desumptam, a nobis tradendam expectet. Juvat interim, quam tum alii ingressi sint, tum nos ipsi hoc in morbo tentaverimus, sanandi viam hic brevibus indicare. Ad *lepram squamosam* (§. 457.) quod pertinet, hanc eadem, quam ad *herpetem rodentem* proposuimus (§. 425.), ratione aliquoties sanavimus; ac potissimum, in atmosphaera puriori ac tepida, pro internis antimonia, hepar sulphuris cum acidis porrectum (N. LVII.), decocta rumicis seu lapathi acuti, dulcamarae, ulmi campestris, ligni Guajaci, cum lacte copiosius haurienda, — aut, quae causae forte cognitae, vel complicationem facienti, potissimum opponantur, tentari merentur. Interdum venaesectio, scarificatio, aut purgans medicamentum, praemittenda sunt. Interim spes major in externa et hic ponenda est auxilia; atque balnea tum sulphurea, tum ex aqua marina, — vel, sub majori ardore, ex lacte, emollientibus, vel ex partibus animalium pinguioribus cum aqua decoctis parata, pro virium ratione subministranda, — un-



guenta, linimenta, vel ex simplici butyro, aut oleo, aut cremore lactis dulci, vel, cum certa ob mercurium contentum cautela, alia, jam in aliis cutis vitiis laudata ( N. XLIII. XLVI. ), vel cum succo Nicotianae tabaci, aut cum acido muriatico confecta, aut linimentum saponaceum ( N. LVIII. ), in opem vocanda sunt. Mercurialia vix unquam cum fructu, sed saepius manifesto cum damno, in lepra *interius* fuerunt porrecta.

Qui lepram elephantiasin aut et albam tractandi quotidiana quondam occasione fruebantur, hi, pro temporis hoc de morbo theoria, ex quo humore aegritudinem generatam esse credidissent, hunc victu ac remediis contrariis aggressi sunt; aut potissimam in cute condecoranda, ac in maculis per *cosmetica*, vel adeo per *caustica*, remedia delendis operam collocarunt. Imprimis vero omnem, quam potuerunt, in *dieta* ordinanda sollicitudinem posuerunt, et a carnibus diversis, leporina, asinina imprimis, atque porcina, quam ultimam *Legislator Divinus* ut impuram rejecerat, — et a cibus crassioribus, flatulentis, viscosis, a pi-



scibus, qui squamis destituerentur, in genere ab alimentis aut sale, aut aromate acriori conditis, — sed a Venere quam maxime, abstinendum, — corpus vero pro viribus exercendum esse docebant. In cura morphaeae, quae antiqua non esset, ut nostro nos tempore mox a suscepto a sanis contagio faceremus (§. 94.), et vomitum frequentem, et sudores in balneo, theriacam, et frictiones commendarunt. Nec sanguini (quod de morbo, cui febris fere deest, miremur) licet multum non mitterent, parcebant; ac, praeter scarificationes, cauteria, *varices* in *elephantia* (§. 458.) comparentes incidebant, extrahebant, eradicabant; reprimantia, atque ipsas demum fascias, a calcaneo usque ad genu, vel ad inguinem, applicari curabant; atque alvum nunc fortioribus, si phlegma, aut melancholiam supponerent, stimulare, nunc blandis, ut sero lactis, remediis, movere studebant. Nec ad ipsam *castrationem*, ut hunc morbum aut averterent, aut ejusdem progressus praepedirent, descendere verebantur. Quas interim laudes haec operatio mereatur, Recentiorum, nisi contrariis, experimentis de-

stituti ignoramus. Ipsa in *elephantia*, suscepta cruris tumefacti amputatio, quin labes ad alteram mox tibiam verteretur, ut recentior experientia monstravit, non potuit impedire; sed profuit ab initio, et cum febris quasi *intermittentis*, *anomalae*, natura subesset, Peruviani usus corticis, qui sequentes insultus, pedisque tumorem monstruosum impeditivisse videbatur. *Viperinae* quoque carnes, et decoctum ex iisdem paratum, veterum Medicorum omni potita sunt fiducia. Ad *arsenicum*, cum *piperis* sex partibus remistum, apud *Indos* jam pridem Medici Sacerdotes confugerunt, et adhucdum his ipsis, ut referunt, cum successu utuntur. *Cuscutae* quoque (*Americanae?*) in aqua infusae, maceratae, contusae, cum succo limonum remistae, maculisque leprosis, tuberculis ac nodis quotidie illitae, — *ledique palustris* saturatum infusum ulceribus impositum, quorundam hoc in morbo sibi laudes promeruerunt. Nos nostrum his de rebus, donec certior experientia loquatur, suspendimus iudicium.

## FORMULAE MEDICAE

IN §§. PRAECEDENTIBUS CITATAE.

Num. XXXIX.

*Massa pro cute depuranda.*

Recipe amygdalarum amararum uncias novem,

Pinearum uncias tres.

Terantur in pollinem subtiliorem, cui adde

Vitellos ovorum sex;

Misce.

N. XL.

*Vinum camphoratum.*

℞. Camphorae rasae drachmas duas.

Terantur cum aliquot alcoholis guttulis.

Adde succum citri unius recenter expressum,

Vini optimi libram unam.

Coletur.

N. XLI.

## N. XLI.

*Linimentum camphoratum.*

- ℞. Camphorae drachmam unam,  
Nitri puri drachmas duas,  
Mellis quantum sufficit, ut fiat linimen-  
tum.

## N. XLII.

*Unguentum cum sinape.*

- ℞. Pulveris seminum sinapis subtilissimi un-  
cias tres,  
Olei amygdalarum unciam dimidiam,  
Succi citri acidi quantum satis est, ut fiat  
unguentum.

## N. XLIII.

*Unguentum mercuriale rubrum.*

- ℞. Butyri recentis uncias duas,  
Cerae albae liquefactae drachmas tres,  
Mercurii praecipitati rubri,  
Camphorae, ana drachmam unam cum di-  
midia.

M.

## N. XLIV.

## N. XLIV.

*Decoctum dulcamaræ.*

℞. Stipites dulcamaræ a drachmis duabus usque ad sex.

Concisos infunde cum aquæ libra una cum dimidia, et in vase clauso leniter ebulliant, refrigerata colentur.

## N. XLV.

*Pilulæ antimoniales.*

℞. Aethiopsis antimonialis,  
Gummi-resinæ Guajaci, ana drachmam unam,  
Extracti stipitum dulcamaræ drachmas duas.

Misce: fiant cum syrupo simplici pilulæ granorum duorum.

## N. XLVI.

*Unguentum mercuriale album.*

℞. Mercurii præcipitati albi drachmam unam,  
Axungiae porcinae unciam unam.

M.

## N. XLVII.

## N. XLVII.

*Unguentum zinci.*

- ℞. Pulveris zinci calcinati drachmas duas,  
Axungiae porcinae drachmas sex,  
M.

## N. XLVIII.

*Ceratum tabacinum.*

- ℞. Succi Nicotianae tabaci,  
Cerae flavae, ana uncias tres,  
Resinae pini unciam unam cum dimidia,  
Terebinthinae unciam unam,  
Olei myrrhae quantum satis, ut fiat ce-  
ratum.

## XLIX.

*Decoctum corticum nucis juglandis.*

- ℞. Corticum viridium nucis juglandis unciam  
unam,  
Infunde cum aquae libra una:  
Post tres horas, infusio ebulliat per horae  
quadrantem; refrigerata colentur.

## N. L.

*Unguentum Jasseri.*

℞. Pulveris subtilioris florum sulphuris,  
 Vitrioli albi,  
 Baccarum lauri, ana  
 partes aequales.

Misce; fiat cum oleo lini, vel olivarum, un-  
 guentum.

## N. LI.

*Solutio mercurialis simplex.*

℞. Mercurii sublimati albi grana sexaginta  
 Solve in aquae distillatae libris duabus.

Misce *pro usu externo.*

## N. LII.

*Solutio phagedaenica.*

℞. Aquae calcis recenter paratae uncias octo,  
 Mercurii sublimati,  
 Dulcis, ana grana viginti.

Misce *pro usu externo.*

## N. LIII.



## N. LIII.

*Cataplasma ad tineam.*

- ℞. Pulveris herbae malvae uncias quatuor  
Coque cum lacte; sub finem adde  
Pulveris herbae cicutae unciam unam,  
Butyri recentis uncias tres.  
Misce, fiat cataplasma molle.

## N. LIV.

*Pulvis Aethiopicus.*

- ℞. Aethiopsis antimonialis grana tria,  
Sacchari scrupulum unum.  
M.

## N. LV.

*Pulvis antimonialis.*

- ℞. Sulphuris aurati antimonii tertiae praecipitationis granum unum,  
Sacchari scrupulum unum.  
Misce, fiat pulvis.

## N. LVI.

*Decoctum jaceae.*

- ℞. Herbae jaceae, seu violae tricoloris, recentis manipulum unum  
Coque in lactis vaccini libra una.  
Post brevem ebullitionem coletur.

## N. LVII.

*Hepar sulphuris calcareum.*

- ℞. Ostrearum,  
Sulphuris, ana partes aequales.  
Per strata committantur crucibulo, et per horae quadrantem candefiant. Massa refrigerata minutim contundatur, et in vitro epistomio munito servetur.

## N. LVIII.

*Linimentum saponaceum.*

- ℞. Olei tartari per deliquium,  
Olei amygdalarum recentis, ana partes aequales.

M.

*Finis Lib. IV.*

## LIBRI NUOVI

*Di Medicina, Chirurgia, Farmacia,  
Veterinaria ec.*

Compendio di Polizia Medica del D. METZGER, trad. dal Tedesco con Illustrazioni dal D. FERRARI. Prima edizione. 8. Venezia 1800. L. 2:—

*La Polizia Medica costituisce senza dubbio uno de' rami i più importanti della Medicina, mentr' essa ha per oggetto la salute degli uomini che vivono in società, e quella degli animali domestici i più utili all' agricoltura, agli usi della vita, alle arti. Mancando assolutamente all' Italia un Trattato di questa Scienza, il D. FERRARI si è creduto in dovere verso la sua Patria di presentargliene uno che esaurisca pienamente il soggetto, traducendo dal Tedesco il Compendio di Polizia Medica del Prof. METZGER, uno de' migliori Medici di questo secolo. Tutti i Governi avrebbero un vero interesse a promuovere la diffusione di questo Codice Medico-Politico.*







